



Division SCB Section 1608 Robert kunvij

1.00

APOLOGIE

POVR

CEVX DE LA RELIGION.

SVR LES SVIETS D'AVERfion que plusieurs pensent auoir contre leurs personnes & leur creance.

Par MOYSE AMYRAYT.



Se vendent à Charenton,

Par Samvel Petit, Marchand Librai; re, demeurant à Paris dans la court du Palais, à la Bible d'Or.

M. DC. XLVIII.

HOUSE

ELIGION.

SHAR LES WIFTS DAFER

The first of the first of the allest centres.

EL MOYSE AMYRAYT



in and a state of the state of

THY TX CO

A

MONSIEVR MONSIEVR SARRAV, CONSEILLER

PARLEMENT.

DV ROY EN SON



ONSIEVR,

Je crains aucunement que ceux entre les mains de qui cette Apologie tombera, n'y trouuent d'a-

ÉPISTRE.

bord deux choses un peu estranges. L'une, qu'estant expressément dressée pour diminuer l'auersion que tant de gens ont contre nous, elle fort d'un lieu où nous en experimentons beaucoup moins que plusieurs de nos freres ne font ailleurs, & où nous iouissons d'une grande paix, par la prudence 🔗 par la generosité de ceux qui nous gouvernent. L'autre, qu'estant particulierement destinée à nous rendre les Magistrats equitábles dans les Prouinces, ie la vous dedie, Monsievr, qui faites partie de cet auguste Parlement, dans l'equité duquel nous auons accoustumé de trouuer du support, lors qu'on nous fait deçà delà quelques traittemens peu fauorables. Car il semble que cette sorte d'Escrits contienne quelque tacite plainte de ce qu'on a besoin de les publier. Or les plaintes ne sont pas seantes en la bouche de ceux qui en ont peu de sujet;

& si quelque raison nous induit à nous interesser en ce qui touche nos freres, on peut dire que nous deurions plustost nous. addresser aux autheurs de leurs mescontentemens, pour leur oster les maunaises impressions qu'ils ont contre nous, & leur en donner de meilleures. Mais i'espere pourtant, MONSIEVR, que quiconque prendra la peine de lire ce petit ouurage, se deliurera aisément de cét estonnement par ces considerations. Tous ceux de la Religion qui sont en ce Royaume ne constituent qu'un mesme corps, en qui le desplaisir de chacun de ses membres est sensible à tous les autres. Comme donc il arriue au corps humain, que quelques-fois la partie où est le siege de la douleur, est fort esloignée de celle d'où sortent les gemissemens et les souspirs, & neantmoins tant s'en faut qu'on blasme en cela l'institution de la Nature, qu'on

admire la sagesse de son autheur, qui luy a donné ces sentimens: si quelques-vns de nos freres ont occasion de se plaindre en des lieux separez de nous, on ne doit nullement trouuer mauuais que la communion d'une mesme foy nous en inspire la sympathie. Quant à nous, bien que par la grace de Dieu nous ayons tout sujet de nous louer de l'equité du gouvernement sous lequel nous viuons, nous sçauons pourtant quelle est quasi par tout l'inclination des peuples, & que si l'authorité superieure ne la retenoit, icy comme ailleurs nous esprouuerions le desaduantage qu'il y a d'habiter parmy des gens mal affectionnez, quand la balance n'est pas esgale. C'est pourquoy si outre la conduite de nostre vie, dont ceux auec qui nous conversons ont leurs yeux mesmes pour tesmoins, nous taschons de les informer de la pureté de nostre creance (t)

de l'innocence de nos sentimens, nous le faisons & par deuoir & par interest. Car nous sommes obligez de leur donner, s'il est possible, quelque teinture de la verité, & nous affermirons par ce moyen dauantage nostre repos, quand ils n'auront plus cette mauuaise opinion de nostre Religion, qui leur donne quelque haine couuerte contre nos personnes. Pour ce qui est de vous, MONSIEVR, soit que l'on vous considere en la dignité que vous possedez, où bien en la profession de Religion que vous faites, cet Ecrit ne pouuoit estre mieux adressé qu'a vous. En ce premier esgard c'est non tant une plainte des déportemens d'autruy, ny vne iustification des nostres, & de la Foy que nous suiuons, qu'une action de graces que nous rendons en vostre personne a cette illustre Cour dont vous estes membre, de ce que par l'authorité de ses Arrests,

elle a dinerses fois corrigé ce qu'il y peut auoir eu d'excessif dans le zele des autres Iuges. En ce second, s'il y a quelqu'un des Senateurs qui la composent, qui desire d'estre esclaircy de la sincerité de nos pensées, pour en estre d'autant plus enclin à nous rendre iustice aux occasions, le credit que vostre rare vertu vous donne entre eux, adjoustera beaucoup d'efficace aux choses que ie represente. A la verité vostre singuliere suffisance, & la parfaite cognoissance que vous auez de ce qui est de nostre profession, n'auoient point besoin d'estre aidées de ma meditation, pour donner de bonnes opinions de nous dans les occurrences. Aussi ne me suisje nullement proposé de vous instruire en rien de ce qui y peut contribuer; pource que vos cognoissances passent bien loin au delà de ces reflexions toutes simples & populaires. Ie veux dine

seulement que vostre nom peut donner beaucoup d'accés à cét Ouurage, vers ceux qu'il est expedient que nous informions plus exactement de nos creances & de nos inclinations, & que la reputation de vostre rare probité est capable de nous mettre bien en l'esprit de ceux qui pourroient auoir esté preuenus de quelques mauuais preiugez par nos aduersaires. Quoy qu'il en soit, il importe que l'on scache, que comme vous estes absolument de mesme creance auec les Ministres de la Religion que vous professez, dans la doctrine de la Foy, les Ministres sont entierement de mesme opinion auec vous en ce qui est du Politic, & de l'obeissance que les sujets doiuent à leurs Princes. En l'un il est manifeste que ce n'est pas tant le serment # l'obligation de vos charges, qui vous attachent, vous & ces autres Nessieurs qui sont de nostre Religion

dans les Parlemens, au service de sa Majesté, que le lien de la conscience & le genie de la Foy que nous vous preschons, puis que vos sentimens et les nostres y sont conformes. En l'autre il paroist que c'est la cognoissance de la verité, & non aucun interest de nostre condition, comme quelques-vns se l'imaginent, qui nous affectionne aux dogmes que nous vous annonçons dans la matiere du salut, puis que vous en estes persuadez comme nous, or que vous y perseuerez si constamment, quoy qu'aucune des raisons du monde ne vous y arreste. Mais quand ie mettray toutes ces considerations à part, il me semble que i'ay grande occasion d'ailleurs de conceuoir une confiance bien certaine, que vous prendrez en bonne part ce mien dessein de mettre vostre nom sur le front de ce petit labeur, & que tout le monde l'approuuera, bien

que les autres causes que i'en ay luy fussent entierement incognues. C'est que n'eusse-je point tant de tesmoignages de l'honneur de vostre bonne volonté, vostre exemplaire pieté, vostre sçauoir eminent, cognu dedans & dehors le Royaume, & le reste de vos excellentes vertus, me convieroient à donner quelque tesmoignage au public que i'en fais une estime tout à fait extraordinaire. Et quand les belles & grandes qualitez que Dieu a mises en vous, n'attireroient point si puissamment mes respects, cette tendresse d'affection dont il vous plaist me fauoriser, m'oblige, si ie ne veux estre ingrat, à vous en faire une solennelle recognoissance Receuez-là donc, s'il vous plaist, MONSIEVR, du mesme œil duquel vous auez accoustumé de voir son autheur, & continuez de croire, comme vous auez fait depuis que i'ay

le bien d'estre cognu de vous, qu'il n'y a personne qui fasse des vœux plus ardens que i'en fais à Dieu pour vostre entiere prosperité, ny qui soit plus inuiolablement,

MONSIEVR,

De Saumur, ce iour de Pasques 1647. Vostre tres-humble & tres - obeissant seruiteur,

AMYRAVT.



ADVERTISSEMENT.

Omme i'appelle ordinairement en cette Apologie ceux de nostre communion, les Reformez, aussi i'employe souuent ces mots de Catholiques Romains, & quelquesfois celuy de Catholiques tout seul, pour signifier ces Messieurs de la communion de Rome. Si l'on prenoit ces termes autremét que comme des noms, par lésquels on designe ces deux communions differentes, & si l'on y auoit égard à la qualité pour laquelle ils ont esté premierement attribuez chacun à son sujet, il y auroit de la contradiction en l'vsage de ces deux appellations. Car celle de Reformez signiAduertissement.

fie la profession de ceux qui ont repurgé la Religion de ce dont la corruption du temps l'auoit alterée. Et quant à celle de Catholique, elle fut premierement appliquée à l'Eglise Chrestienne, pour la distinguer d'auec la Iudaïque, pource que le Christianisme n'est affecté à aucune particuliere nation, & doit courir par tout l'Vniuers. Mais depuis on s'en est seruy pour distinguer les Orthodoxes d'auec les Sectaires, qui s'estoient separez de la communion de cette Eglise à qui le Symbole auoit, comme il y a apparence, le premier donné ce nom. Ainsi ce seroit mal à propos que i'appellerois les vns Orthodoxes, & les autres Reformez: pource que la Reformation presuppose qu'on a degeneré de l'Orthodoxie, & si elle fust demeurée Aduertissement.

en son entier en l'Eglise, il n'eust pas esté necessaire de la reformer. Mais desormais ce nom de Catholique a passé en vn tout autre vsage, & ne signifie rien autre chose sinon ceux qui font profession du Christianisme, tel qu'il estoit en l'Europe auant la predication de Luther: comme on employe celuy de Protestans & de Reformez, pour denoter ceux qui le professent tel qu'il est en la communion laquelle s'est separée d'auec Rome. Et n'y a rien de si ordinaire que de voir ainsi passer les noms d'vne signification à l'autre, ny rien de si indifferent que leur vsage quand vne fois le temps & la coustume en ont authorisé le changement. l'appelle donc Messieurs de l'Eglise Romaine Catholiques, comme plusieurs honnestes gens d'entre-cux Aduertissement.

nous nomment ceux de la Religion; & ne seroit pas raisonnable que nyeux ny moy tirassions auantage de ce respect ou de cette ciuilité, pour le fonds de la Controuerse. Pleust à Dieu que nous ne sussions en dispute que des noms: ceux qui sont de bon sens ont toûjours remarqué qu'ils ne sont du tout rien aux choses.





APOLOGIE POVR CEVX DE LA RELIGION.

Sur les sujets d'auersion que plusieurs pensent auoir contre leurs personnes & leur creance.

DESSEIN DE L'OVVRAGE.

IEN que par la grace de Dieu, & par la bonté de nos Rois, nostre condition soit merueilleusement differente de l'estat auquel

estoyent les Chrestiens autrefois; lors que Iustin Martyr & Tertullian écriuirent leurs Apologies, si ne laissons nous

2 Apologie
pas d'estre necessitez par l'auersion que beaucoup de gens ont contre nous, d'entrer en quelque iustification de nos deportemens & de nostre creance. Car il est bien vray que nous viuons en paix soubs la protection des Edicts de nostre Souuerain, & que la Reine sa mere, depuis qu'elle a le gouvernement de l'Estat entre les mains, a toussours de sa grace declaré qu'elle vouloit qu'ils sussent ponctuellement entretenus. Nosseigneurs de son Conseil secondent ordinairemet ses bonnes intentions, & nous aurions tort si nous ne recognoissions qu'en diuers lieux la douceur & l'equité des Gouuerneurs, & la iustice des Magistrats nous donnent plus de sujet de nous louer d'eux, que de nous plaindre de la seuerité de leur conduite. Comme la Noblesse a d'ordinaire les sentimens éleuez & genereux, il y en a grand nombre de cette condition, qui sans s'arrester à la differece des religions, estiment l'honneur & la vertu par tout où elle se rencontre. Et generalement en toutes sortes de professions il se trouve par tout d'honnestes gens, que non seulement la diuersité de la creance n'empes-

che pas de viure auec nous civilement, mais de la bonne volonté de qui nous pourrions bien nous asseurer dans les occurrences les plus importantes. Mais neantmoins il ne se peut pas nier qu'il ne se rencontre quantité d'occasions, où le traittement que nous receuons de la part de quelques-vns de ceux à qui l'administration des choses publiques a esté commise, porte des marques indubitables de la mauuaise disposition de leurs esprits en nostre endroit. Desorte que les bonnes volontez de sa Majesté, qui sont comme autant de douces & fauorables influences, qui deuroient se respandre en toutes les parties du Royaume où nous en auons besoin, sont interceptées auant qu'elles viennent iusques à nous, ou au moins tellement alterées & debilitées par la mauuaise constitution des esprits par lesquels elles ont à passer, qu'elles ne produisent pas à beaucoup prés tous les effets aufquels elles sont destinées. En effet, soit qu'il s'agisse des choses qui nous ont esté octroyées par les Edicts, nous trouvons affez souvent des difficultez tres conside-

rables à les obtenir, & mesmes quelques-

Aii

Apologie

fois des oppositions & des embarras qui nous sont entierement insurmontables. Soit qu'il s'agisse de celles qui peunent estre communes à tous les sujets du Roy, la difference notable qu'on y met à nostre defauantage entre les Catholiques Romains & nous, en vne infinité de rencontres, est vne preuue trop authentique de la haine que nous portent quelquesvns de ces Messieurs, à qui la puissance fouueraine à remis la dispensation de quelque partie de son authorité. Quant à ce qui regarde les peuples en general, comme ils ont accoustumé d'estre plus extremes en toutes choses, & de se laisser emporter à leurs mouvemens auec moins de circonspection, ils descouurent pour la pluspart, où les occasions s'en presentent, vne si mauuaise inclination contre nous, que sans la protection de sa Majesté, & l'authorité des Gouverneurs, & la retenue des Magistrats, nous aurions sans doute beaucoup à souffrir de ce coste là. Or sçauons nous fort bien qu'après la bon-ne Prouidence de Dieu, qui tient les cœurs des Grands & des petits en la main, le plus efficace remede que nous puissions apporter à ce mal, despend de nostre patience, & de la tranquilité de nos esprits. Neantmoins, n'estant aucunement à presumer qu'en des hommes en qui l'on void d'ailleurs tant de belles propensions à l'equité, il se rencontrast de si mauuaises dispositions en ce qui nous concerne, s'ils n'estoient imbus de fort sinistres prejugez contre nos personnes, & contre la Religion que nous professons, il est toûjours iuste & raisonnable, & mesines aucunefois absolument necessaire, que nous taschions de les informer autrement. Et quoy que depuis yn peu plus de cent ansqu'il y a qu'on commençe à parler de nous en ce Royaume, nous ayons essayé de le faire par vne infinité d'escrits de différentes façons, si est-ce que le mal ne se guerissant point entierement, & mesmes se renouvellant de temps en temps en diuers symptomes, i'ay creu qu'il ne seroit pas inutile que ie contribuasse aussi quelque chose de ma part à le diminuer. Ce n'est pas que ie doiue auoir cette opinion de moy que ie puisse produire quelque chose, ou qui n'ait point esté dite par ceux qui nous

ont deuancez, ou qui sortant de ma plume puisse auoir plus d'efficace que la leur ne luy en a peu donner. Il est sorty par le passé tant de beaux trauaux en lumiere, qui pouuoient seruir à ce dessein, soit qu'on y regarde la profondeur du sçauoir, ou l'excellence de l'éloquence, que ce seroit trop de presomption à moy si ie me proposois seulement de les égaler. Mais comme c'est vn precepte de medecine, quand on s'est pris à traitter yn mal, de n'abandonner pas sa methode, encore qu'elle ne produsse pas tout l'effet que l'on desire, pourueu qu'elle soit sondée en bonne raison; aussi est-ce vne pratique de la prudence, de ne desister pas d'inculquer les mesmes choses à des esprits preoccupez, encore qu'on n'y reussisse pas entierement, pourueu qu'elles soient conformes à la verité, & propres à les desabuser de leurs opinions anticipées. loignez à cela que les Liures ont Teur temps, & que plusieurs qui ont esté bien receus au siecle passé, sont en cestuy-cy quasi peris de la connoissace des hommes; soit que le changement qui arrive quali journellement au langage, nous

dégouste des Escrits en qui nous voyons trop de marques du stile de nos ayeuls, ou qu'il y ait à cette heure quelque air en la façon non seulement de s'exprimer, mais de conceuoir les choses mesmes, qui leur donne plus d'agréement & de lumiere qu'elles n'en auoient auparauant. Pour moy, bien que ie ne sois pas de ceux qui se plaisent extremement aux choses nouuelles, & que quand ie ne le dirois pas, i'ay peur que mon elocution ne fasse que trop paroistre que ie ne m'applique pas beaucoup à la lecture des Autheurs qui ont donné à nostre langue la delicatesse & les ornemens dont les esprits polis font maintenant tant de cas; i'espere pourtant dresser cette Apologie de telle sorte, qu'on ne pourra pas dire que ce ne soit qu'vne simple repetition de ce que les autres ont déja mis en auant. Car ce n'est nullement mon intention d'entrer dans l'examen de ces Controuerses de religion qui exercent les Chrestiens depuis vn si long-temps, & qui bien souuent ont esté traittées de telle maniere, qu'elles ont fait vn effet tout contraire à celuy que le me propose icy : pour ce que ie desire reconcilier tant que ie pourray les volontez des hommes à ceux de nostre profession, au lieu que le plusordinairement ces contestations les irritent. Et puis, c'est vne mer dont vn dessein de si petite estendue qu'est le mien, ne sçauroit trouuer ny la riue ny le fonds. La subtilité des raisonnemens y surpasse bien souuent la portée des esprits du peuple: la multitude des allegations dont chacun des deux partis a accoustumé d'appuyer son sentiment, requiert plus de temps à. les examiner que les occupations des Magistrats ne leur permettent d'y en donner: & enfin, la passion qui se mesle par tout sous l'apparence du zele, & le desir de vaincre qui l'emporte assez souuent pardessus l'amour de la verité, met en ces disputes tant de tenebres & de confusion, qu'auant que ceux de l'authorité de qui nous dependons ayent peu venir à bout de les demesser, les fascheuses opinions dont ils ont l'esprit saisi, produisent vne infinité d'effets à nostre dommage. Il y pourroit auoir vn moyen de resoudre ces difficultez, qui requerroit beaucoup moins de temps, & dont le succez servit

incomparablement plus certain & plus fauorable. C'est que les principales & plus fondamentales creances du Christianisme nous estant communes à l'Eglise Romaine & à nous, il ne faudroit que voir dans les choses dont nous disputons, ce qui s'accorde auec ces principes, & ce qui ne s'y accorde pas, comme on fait lors qu'il est question de decider ce qui pourroit estre douteux dedans les autres sciences. Car puis que iamais vne verité ne choque l'autre, au lieu que le mensonge souvent se ruïne soy-mesme, & ne s'a juste iamais auec la verité; ce quise trouueroit contreuenir aux dix Commandemens de Dieu, à la priere de nostre Seigneur, & au Symbole de ses Apostres, deuroit estre tenu sans difficulté pour rejettable, puis que nous receuons pour diuines & veritables ces formules de la creance de tous les Chrestiens. Mais on s'est engagé si auant dans cette autre maniere de disputer par authoritez & par tesmoignages, tant des anciens que des modernes, qu il n'est pas aisé de s'en retirer. Lay donc intention de monstrer par vne voye beaucoup plus courte, que soit qu'on nous regarde

comme des hommes, & dans les deupirs ausquels nous sommes obligez les vns enuers les autres entant que tels; car c'est la premiere chose qui doit venir en consideration; nous ne meritons nullement l'auersion que tant de gens ont contre nous. Soit qu'on nous considere comme François, & sujets d'vn mesme Prince auec tous les autres habitans de cét Empire, il y a quantité de raisons pourquoy nos plus grands ennemis deuroient vser de toute sorte d'equité & de iustice en nostre endroit. Soit enfin qu'on ait esgard à la qualité de Chrestiens que nous portons, on ne nous sçauroit hair pour le Christianisme tel que nous le croyons, sans pecher contre la loy de Christ, & la charité de son Euangile. Or comme mon dessein, & mon deuoir, & mon inclination encore me portent à deduire tout cela sans aucune passion, i'espere que ceux entre les mains de qui cette Apologie tombera, n'en apporteront point non plus que moy à lire ce que i'escriray pour la iustification de nos Eglises.

SECTION I.

Que si on considere ceux de la Religion dans les deuoirs ausquels ils sont obligez enuers les autres entant qu'hommes, ils ne sont dignes de l'auersion de qui que ce soit.

Our commencer par la premiere de ces choses, l'homme a ces deux qualitez qui le distinguent d'auec tous les animaux, qu'il est premierement raisonnable, & puis apres politique; ce qui vient en consequence de la raison : c'est à dire, qu'il vsed'intelligence en ce qu'il entreprend de faire, & s'y porte par la connoissance qu'il a de la nature de ses objets; & qu'il est propre à la societé, & destiné par la nature à viure en la compagnie des autres hommes comme luy. On ne sçauroit donc raisonnablement rien desirer de nous en cét esgard, pour nous rendre dignes de l'humanité & de la bonne volonté de tout le monde, sinon

12

qu'en ce qui regarde les sentimens & la creance, nous ne tenions & n'enseignions rien qui destruise les loix de la vertu mo-rale, de laquelle tous les hommes sont capables par l'vsage de la raison îny qui corrompe cette inclination que nous deuons tous auoirà entretenir vne iuste societé auec ceux auec qui nous auons à viure. Et pour ce qui concerne la pratique de ces loix de la vertu, & notamment l'exercice de l'equité & de la iustice, qui est la base & le lien de cette societé: On ne doit non plus requerir de nous, pour estre dignes de l'amitié des autres hommes, sinon que nous conduisions nostre conuersation de sorte qu'on ne puisse nous accuser de faire le contraire de ce que nous enseignons. Or pour ce qui est de nostre creance, quel que soit le reste de la doctrine que nous embrassons en matiere de Religion, tant y a que les enseignemens moraux que nous donnons à ceux de nostre profession pour modele de leur vie, n'ont iamais esté blasmez par nos plus grands & plus enuenimez aduersaires, de heurter le moins du monde contre les principes de la vertu. Nos gens ont

pour ceux de la Religion.

fait des recueils des opinios des Casuistes, où ils ont ramassé quantité de choses qui femblent contrarier aux sentimens d'yne bonne conscience, & corrompre les semences de l'honnesteré, & de la pudeur, & des autres bonnes qualitez que la nature met en nous. Ces Messieurs de la communion de Rome, qui tiennent le party. de l'Université de Paris contre les Iesuites, ont publié leur Theologie morale, & diuers autres lieux communs de leurs opinions,où ils les flestriffent du blasme d'enseigner vne infinité de choses contre les loix divines & humaines, & qui ouurent la porte toute large à la fraude, à la perfidie, à la vengeance, à l'auarice, & à la dissolution. Mais quant à nous, quoy que nous ne manquons pas de manuais amis, qui ne nous espargneroient pas s'ils trouuoient quelque chose à reprendre en nous en certe matiere, si est-ce que iusques à cette heure il ne s'en est trouué aucun qui ait eu assez de hardiesse pour nous imputer rien de tel. Et veritablement on ne le sçauroit faire sans vne extreme impudence, & contre toûte apparence de raison. La Parole de Dieu estant de tous

les Liures du monde celuy qui sans comparaison est le plus propre à former les hommes à toutes choses dignes de louange, nous l'auons expressement tournée en langue vulgaire, & la mettons entre les mains mesmes des petits enfans, afin que toutes sortes de personnes y apprennent de bonne heure en quoy la vraye vertu consiste, & quels sont les vrais motifs qui nous y doiuent porter. Les Predicateurs d'entre nous sement tous leurs propos particuliers, & toutes leurs actions publiques d'enseignemens de mesme nature, & bonne partie des lecons qu'ils font dans les Academies, ont cette matiere pour sujet. Sur tout ils ne concluent iamais leurs predications que par des exhortations à mener vne vie où toutes bonnes qualitez reluisent, & ne traittent aucune doctrine, pour sublime qu'elle puisse estre, ou pour debatue qu'elle soit entre les Catholiques & les Reformez, qu'ils ne ramenent aux instructions qui servent à mener vne vie honneste, & d'où ils ne tirent quelques aiguillons capables d'y exciter les affections de leurs auditeurs. Outre la lecture de la parole

pour ceux de la Relig.

de Dieu, & l'vsage de la Predication, le monde, par maniere de dire, est remply de liures que nous auons faits pour expliquer en quoy la vraye vertu est recommandable, quels font les commandemens que Dieu nous en a donnez: quelles les esperances qu'il propose à ceux qui s'y adonnent : quelles les menaces qu'il fait à ceux qui la mesprisent, & combien la doctrine de l'Euangile a adjousté de poids à ce que la Loy nous en enseignoit auparauant. Et ce que i'ay dit de la vertu morale en general, se peut dire en particulier de l'exercice de la Iustice, de laquelle despend la conservation de la societé: Car il n y a deuoirs de maris enuers leurs femmes, ny de femmes enuers leurs maris, ny de peres enuers leurs enfans, ny de bons enfansenuers leurs peres, que nous ne proposions, & que nous ne representions sans cesse à tous ceux qui les doiuent pratiquer. Il n'y a ny humanité & equité des maistres enuers leurs seruiteurs, ny respect & obeissance des seruiteurs à l'endroit des maistres, à quoy on n'induise perpetuellement parmy nousceux en qui il se rencontre de telles

relations. Il n'y a aucun entre nous, de quelque condition que ce puisse estre, qui soit sujet aux Magistrats, aux Gouuerneurs, & generalement à tous ceux en qui il y a quelque degré de superiorité, à qui on n'enjoigne & tres-expressément & continuellement de ne rien oublier de la reuerence & de l'honneur qu'on doit à ceux qui sont en ces charges, & à qui on ne donne à entendre qu'elles sont de linstitution de Dieu. Il n'y a qui que ce soit à qui on ne fasse cognoistre qu'à cause de cette institution, ce ne doit pas seulement estre la crainte de la vengeance, qu'ils ont toute preste en la main contre ceux qui mesprisent leur authorité, mais principalement le mouuement de la conscience, pource que Dieu le veut ainsi, qui nous porte à obeir à leurs ordonnances, quand l'honneur de Dieu & le salut eternel de l homme n'y est point interessé. Il n'y a personne entre nous qui porte la qualité de Magistrat, ou en qui la Puissance souue-raine ait imprimé quelque charactere de sa grandeur, à qui on ne represente par la parole de Dieu, quelle est la façon dont les Superieurs se doiuent comporter en-

uers

pour ceux de la Relig.

enuers leurs inferieurs, & particulierement comment ils doiuent rendre la iustice vniuersellemet à tous, sans acception de personnes, & sans autre consideration que celle de la verité, de l'equité, & du droit. Enfin il n'y a ny petit ny grand dans nostre profession, qui ait ou commerce ou liaison auec vn autre, ou parenté, ou alliance, ou voisinage, ou communication, qui ne soit iournellement incité à rendre à chacun ce qui luy appartient, & à mettre en vsage en toutes choses cette regle de charité, de ne point faire à autruy sinon ce qu'il voudroit qu'on fist à luy-mesme. Et pource que c'est par l'vnion & par la bonne intelligence que les societez se maintiennent, & qu'au contraire c'est la discorde & la division qui les perd, il n'y a aduertissement qui resonne si souuent en nostre bouche, ny qui remplisse si vniuersellement toutes les actions publiques & les entretiens particuliers de ceux qui ont la charge de nous enseigner, que celuy de conseruer inuiolablement la paix auec ses prochains, & de relascher & beaucoup de ses passions, & beaucoup de ses interests, afin de l'entretenir auec tout le monde. Le

diray encore quelque chose dauantage. Tant s'en faut qu'on ait aucune occasion de haine à l'encontre de nous, comme si nostre creance estoir pour renuerser ou la iustice, qui soustient la societé, ou les autres versus morales, qui conviennent à l'homme entant qu'il est doué de raison, que nos Eglises ont fait certains reglemens, & estably certaines softes de censures, qui nous obligent a vne plus grande integrité de vie, que les autres n'y sont obligez par les loix communes sous lesquelles nous viuons. Car les loix publiques n'ont autre esgard sinon à ce que la societé ne soit point manisestement violée, ny par l'adultere, ny par le meurtre, ny par le larcin, ny par les autres crimes esclattans, dont on a tousiours creu que l'impunité tire nécessairement après soy la ruine de la Republique. Quant aux autres choses ou ny le particulier, ny le public ne semble pas estre si notoirement endommagé, les Magistrats n'ont point accoustume d'en prendre cognoissance, & quelques vns mesmes d'entreux ne sont point de difficulté de s'y laisser quelquefois aller: au lieu que nous auons parmy

pour ceux de la Relig. 19 hous vne Discipline qui deffend les ieux qui sont purement de hazard, comme derogeans au respect qu'on doit à la divine Prouidence, & à l'excellence de l'homme, à qui la prudence & l'industrie a esté donnée pour conduite & pour moderatrice de toutes ses actions. Elle ne souffre ny les comedies, ny les mommeries, ny les danses, pource qu'elle a creu que ce sont choses indignes de la gravité des gens sages, qui peuuent mesme effleurer ou corrompre tout à fair la pudicité de l'yn & de l'autre sexe, & qui au prejudice de ce que chacun doit aux choses de sa vocation, tirent auec elles vne manifeste perte de temps. Elle a mesme reglé jusques à la superfluité des habillemens, comme si c'estoit chose contraire à la modestie, & qui nourrist & fomentast l'inclination à la vanité. Et afin que les reglemens de cette discipline ne demeurent pas inutiles par l'inexecution, nous auons estably des Consistoires, composez des Ministres & des plus sages de ceux de nostre Communion sous la qualité d'Anciens, pour ordonner des reprehensions, des satisfactions, & des peines Ecclesiastiques qu'il faut appliquer à ceux

qui sont tombez en quelqu'vne de ces fautes, dont les Magistrats ne cognoissent point. Ce qui est pour reduire la vie des Reformez à vne vertu plus exacte & plus circonspecte que ne porte l'education & l'institution des autres, qui n'ont autre regle de leur conduite que la crainte des supplices qui sont infligez par les Loix. Or est-ce sans doute vn fort bel ordre, que les Politiques louent, & qu'ils accomparent aux plus vtiles Constitutions des Re-

Bodin. lim.6.de la Rep. ch. 1.

publiques les micux policées, telle qu'estoit à peu pres la Censure entre les Romains.

Pour ce qui regarde la pratique de la vertu, quelque creance que l'on tienne au fait de la Religion, il n'y a personne qui nesçache qu'elle est toussours bien loin au dessous des loix qu'on fait pour nous y former, & des instructions qu'on nous y donne. Ceux qui en establissent les reglemens estans vuides de passions & d'interest pendant qu'ils y vacquent, n'ont rien qui les empesche de voir en leur naturel l'honnesteté des choses louables. Et quad ils en ont formé en leur entendemet la plus belle idée qu'il se peut, ils la representet toute

telle qu'ils l'ont coceuë, de sorte que d'ordinaire il n'y a rien de si beau que les leçons que les Philosophes en font, ny que les constitutions que les Legislateurs en ordonnent, ou qui en sont dressées par ceux à qui les Republiques donnent l'intendance des bonnes mœurs. Mais lors qu'il est question de les reduire à l'vsage, tant s'en faut que le commun des hommes, qui n'a pas accoustumé d'esleuer ses pensees si haut, & qui ne se represente pas la forme des belles choses si excellente, responde parfaitement en sa conuersation à toute l'integrité des bonnes loix, que mesmes ces grandes & genereuses ames, que Dieu a faites pour donner des exemples au genre humain, n'égalent pas de leurs actios tout ce qu'ils en ont conçeu en la pensée. Car quand il faut venir aux choses particulieres où nos interests sont, meslez, nos passions ne manquent iamais à s'émouvoir, & c'est merueille si elles ne corrompent la sincerité du jugement que nous faisons de ces belles idées de l'honnesteté & de la iustice, lors que nous les considerons sans esmotion. Il est bien vray que cette inclination que nous auons

B iij

naturellement à la societé, aideroit beaucoup à nous duire à la vertu, si nous auions tousiours à conuerser auec des gens qui l'aimassent. Car leurs exhortations nous y porteroient, & comme l'homme se forme volontiers à l'imitation de ce qu'il void faire continuellement, ainsi que ceux qui se pourmenent au Soleil se colorent fans y penser, nous tirerions sans doute insensiblement, mesmes sans exhortation, vne belle teinture de l'honneur, de la continuelle frequentation des gens de bien, & de la veue des bons exemples. Mais pource qu'il arriue qu'il y a tousiours au monde plus grand nombre de vicieux que de vertueux, & qu'outre l'imitation, à laquelle nous sommes enclins, nous auons naturellement vne fort violente pente vers le vice; sous quelque belle discipline que les hommes soient esleuez, quelques belles institutions que l'on fasse pour leur faire prendre le ply de l'honnesteté & de la vertu, ils se trouuent toûjours fort esloignez des preceptes qu'on leur en donne. Neantmoins il n'y a gueres de gens si peu versez en la cognoissance des choses passées, ny si peu attentifs à la con-

sideration des presentes, qui ne recognoissent qu'autresfois ceux de nostre profession audient en cet esgard vn merueilleu-sement grand aduantage pardessus leurs concitoyens, & que maintenant encore nous n'auons point si fort degeneré que pour cela nous en meritions la haine publique. En la naissance de nos Eglises en cé Royaume, & plusieurs années depuis, il ne s'entendoit entre nous ny blaspheme contre Dieu, ny mesdisance ou insure contre les hommes. Les propos sales & les chansons lasciues en estoient bannies absolument; c'estoit chose rare que de voir ceux de nostre Religion frequenter les cabarets, & les autres lieux, ou de berlan, ou de dissolutio; & s'il estoit arriué à quelqu'vn de mettre le pied en ceux que la paillardise auoit diffamez, on le tenoit come vn monstre. La rondeur, l'integrité, la bonne foy, la sincerité estoiet choses si ordinaires & si populaires parmy nous, qu'il n'y auoit pas à beaucoup prés tat de louange & de recommandation à les pratiquer, que d'horreur & d'execration à encourir, si on ne les faisoit pas assez clairement reluire en toute sa vie. La charité 24

y estoit si exemplaire, notamment où il estoit besoin de soulager les pauures & les souffreteux, qu'il sembloit quasi qu'on ne possedast rien en particulier, & qu'à l'imitation des premiers Chrestiens, chacun pensast que si Dieu luy auoit donné du bien, il l'en auoit plustost estably dispensateur pour la commodité d'autruy, que seigneur & possesseur pour ses propres auantages. La simplicité des habillemens estoit la marque exterieure de la modestie interieure du cœur, & generalement toute la conuersation de nos ayeuls estoit pleine d'instruction & d'éducation, mesmes à leurs propres aduersaires. Au commencement à la verité, lors que la rigueur des mauuais traitemens obligeoit nos peres à faire leurs exercices de pieté la nuict, ou en des lieux cachez & reculez de la cognoissance des autres hommes, quelques-vns leur ont imputé d'y commettre des actions qui à peine se feroient entre les barbares. Mais quand on en a voulu prendre cognoissance, ou bien qu'on seur a donné la liberté de paroistre à la veue du monde, la calomnie mesme a eu quel-

que honte de les en auoir accusez. pour eux, outre le tesmoignage de leur bonne conscience, qui leur estoit vn inuincible rempart contre ces horribles accusations, ils se sont consolez en la conformité qu'ils y ont euë auec les premiers Chrestiens, que les Payens ont autresfois voult diffamer des mesmes crimes. Maintenant comme personne ne nous met sus de si atroces & de si épouventables actios, aussi aduoiions nous franchement que nous ne meritons pas toute la louange qui est deuë à la vie de nos predecesseurs. Car éncore que nous ne le puissions faire sans qu'il nous en reuienne de la honte, si faut-il pourtant recognoistre que nous fommes beaucoup décheus de nostre ancienne pureté, & qu'il ne se void que trop ordinairement parmy nous des exemples de tous les vices qui ont la vogue dans le siecle. Ie ne sçay si i'en dois accuser la commune condition de toutes les choses du monde, qui ne se maintiennent iamais constamment en vn estat; ou si nostre frequentation s'estant rendue plus ordinaire & plus familiere auec ceux qui font profession de viure plus licentieusement, no

stre conversation s'est alterée par leurs exemples. Tant y a que nostre lumiere a souffert vn grand obscurcissement, & que si on compare nostre estat present auec celuy des temps passez, peu s'en faut que ie ne die qu'en beaucoup de choses, & en beaucoup de lieux à peine sommes nous recognoissables. Neantmoins si on ne nous compare point auec nos peres, en quoy sans doute nous auons du desauantage tant & plus, mais qu'on nous considere seulement du mesme œil dont on regarde la plus-part de ceux qui sont en la communion de Rome, il n'y a personne si peu équitable qui estime que nostre vie nous rende indignes de l'affection des honnestes gens. Car au moins on n'en-tend point entre nous ces execrables blasphemes contre la Diuinité, que nous voyons auec beaucoup de douleur demeurer impunis en diuers lieux, pourueu que ceux qui les commettent au veu & au sçeu de tout le monde, ie ne diray pas aillent à la Messe vne fois l'an, car on ne s'enquiert pas s'ils y assistent, mais seulement qu'ils ne viennent point au Presche auec nous. Et ne pouuons assez nous espour ceux de la Relig.

27

merueiller que s'il est arriué à quelqu'vn de nostre Profession de laisser eschapper quelque parole inconsiderée, qui se puisse mal interpreter contre son intention, comme si elle auoit esté dite au des honneur de la Bien-heureuse Vierge, ou des autres Saincts de Paradis, les Magistrats inferieurs prononcent incontinent allencontre d'eux des iugemens si rigoureux, qu'il faut que les Parlemens les corrigents & que cependant en la presence mesme de ceux qui sont en authorité, on vomisse impunément contre Dieu & contre nostre Seigneur Iesus des horreurs qui font fremir iusques à ceux qui ne sont pas fort sen-sibles à ce qui est de leur gloire. S'il y a des débauchez en nostre profession, come il n'y en a sans doute que trop, au moins faut-il qu'ils essayent de l'estre en cachette, & que leurs dissolutions ne puissent estre conuaincues ; au lieu que nous en voyons ailleurs qui font trophée de leurs vices, & qui prennent à grande gloire qu'on les tienne pour bons compagnons. Sil y a quelqu vn de nostre nombre que le Magistratsoit obligé de chastier par la seucrité des loix publiques, cela arriue

pourtant assez rarement, quoy qu'il y en a beaucoup qui ne nous sont pas si fauorables, que de vouloir conniuer à nos fautes, s'il nous arriuoit d'en faire qui fussent dignes de leur chastiment. Il reste encore entre ceux de la Religion quelque chose de cette ancienne charité, que nos peres auoient pour les pauures, au moins pour ne permettre pas, s'il est possible, que ceux qui sont necessiteux soient obligez de mandier. Si mesmes les pauures de profession contraire ne trouuoient en nous de l'humanité, nous ne les verrions pas en foule aux portes de nos maisons & dans les entrées de nos Temples; au lieu que si les nostres auoient esté reduits à cette necessité de quester par les maisons, & aux vestibules des Eglises, il y a des lieux où tant s'en faut qu'ils trouuassent les entrailles des hommes ouvertes, que ce seroit beaucoup s'ils se pouuoient retirer sans autre mécontentement que d'estre tout simplement esconduits. Enfin, lors que quelque disette extraordinaire presse ceux qui ont le soin de l'administration des Hospitaux, ils trouuent selon nos facultez, & au de là de nos facultez, nos bourses.

ouuertes pour leur soulagemenr; au lieu qu'en diuers endroits, s'il y a quelque miserable de nostre profession qui n'ait point de retraitte ailleurs, il y a toutes les peincs du monde à obtenir qu'il soit recueilly en ces lieux publics, & quandil y est, il n'y a moyen de le garentir de la persecution qu'on y fait à sa conscience. Te sçay bien que cela ne se fait pas vniuersellement par tout, & qu'en quelques-vns nous rencontrons plus de debonnaireté, & ne mets pas cela en auant, ny par forme de plainte contre ceux qui se monstrent plus rigoureux, ny pour offenser l'esprit de personne. le serois marry que ces propos, qui sont destinez à diminuer la haine que beaucoup de gens ont contre nous, en irritassent aucun par quelque parole inconsiderée; ie veux seulement dire que la condition des choses humaines estant telle, qu'il n'y a pas moyen de preseruer ny l'vne ny l'autre prosession de quelque corruption dans les bonnes mœurs, nous ne meritons pas en cét égard d'estre haïs de ceux dont les deportemens n'ont point d'auantage pardessus les nostres. Car quand ie diray que dans l'ordré de la Noblesse, & de ceux

qui frequentent les Cours des Roys, nous auons dans ce peu qui nous en reste des exemples d'vne tres-haute & tres-eminente, vertu: que dans ce petit nombre de Magistrats que nous auons dans les Cours Souueraines & inferieures, il y a des perfonnages d'vne droiture rare & singuliere, au jugement mesme de leurs ennemis; que dans la condition des Ministres il y a de l'honnesteré, de la circonspection & de la retenue, à laquelle quelques-vns d'entre les Ecclesiastiques ne voudroient pas eux mesmes se comparer, & que parmy ce qu'on appelle le peuple, quoy que celuy de nostre professió ait beaucoup degeneré de la pujeté de ses ancestres, sine somes nous pas encore absolument reduits à l'égalité, le m'asseure qu'aucun ne m'accusera d'auoir auancé vne proposition temeraire. On oit encore souvent de la bouche de nos aduersaires des tesmoignages semblables à ceux dont les Chrestiens se vantent dans Tertullien; Caius Seins est homme de bien, o n'y a rien a redire en luy; sinon qu'il fait profession du Christianssme: C'est dommage, dit-on, dequoy vn tel est Hu-guenot; car d'ailleurs c'est vn parsaitement honneste homme. Partant puis que nous ne dissipons point la Republique par nos crimes, que nous ne gastons point nos prochains par les mauuais exemples de nos actions, & que mesme nostre discipline & nos institutions peuuent contribuer quelque chose à la correction des vices qui deshonorent la vie des hommes, & qui incommodent leur societé, soit pour en arrester le courant, ou pour empescher au moins qu'elle n'en soit entierement inondée, le conclus que nous deurions receuoir de toutes sortes de personnes plus de preuues de leur bonne volonté, & particulierement de nos Superieurs vii traitement sans passion, en ce qui est de l'vsage de leur puissance. Tellement que s'ils nous y tiennent quelques rigueurs que les autres n'esprouuent pas, il y a en cela vn assez notable manquement contre les droits communs que la nature & la raison ont establis entre les hommes. Car quant à ce qui est de nos sentimens en la matiere de la Religion, c'est vne chose qui doit estre mise tout à fait à part. Nous verrons cydessous, Dieu aydant, que ny pour ce que nous en croyons, ny pour ce que

nous n'en croyons pas, nous ne meritons nullement qu'à cette occasion l'on nous traite moins fauorablement que les autres. Mais quels qu'ils soient, ie dis qu'ils ne doiuent nullement venir en consideration, foit pour nous priuer des bons offices de la commune humanité, ou pour peruertir nostre droiet en l'administration de la Iustice. Le premier droict de tous est celuy de la Nature: c'est le sondement sur lequel les autres sont edifiez, & comme la source dont ils decoulent. Le second est celuy de la Police, qui ne doit, s'il est posfible, en aucune façon prejudicier au pre-mier: pour ce que c'est yn droiet, c'est à dire vne regle de la iustice & de la vertu, qui ne peut estre violé sans peché; & pource encore qu'en le renuersant, le droist de la Police se renuerse aussi luy-mesme, & destruit la base de son establissement. Le troisiéme finalement est celuy de la Religion, qui ne sçauroit subsister si celuy de la Nature & de la Police ne demeurent; çar pource que nous sommes hommes auant que d'estre Chrestiens, les sentimens de la Nature precedent en nous les creances de la Foy. Et pource que nous sommes sociables

bles d'yne societé politique, auant que nous en formions aucune pour les deuoirs de la pieré , c'est vn peruertissement de l'ordre que Dieu a mis entre les chosess que de penser faire œuure de pieté, quand en sa consideration on ruine les droicts sur lesquels la societé politique est establie. Au contraire, qui obeït aux loix de la Nature & de la Police bien & legitimement constituée, se conforme à celles de la Religion; d'autant qu'en la Religion Dieu commande que ces deux premiers droicts nous soient absolument imiolables. La Religion veut que les peres à leurs enfans, & les enfans à leurs, peres, les superieurs à leurs inferieurs, & les inferieurs à leurs superieurs de mesmé, & que les esgaux finalement à leurs efgaux side voisin à voisin; de citoyen à citoyen, d'amy à amy, & de frere à frere, chacum à cause de ces relations, & sans en estre destourné par aucune autre consideration; rende tous les devoirs aufquels les ildix de l'humanité, & celles de la societé nous obligent. Dans les offices de la charité & de la beneficence, qui ne sont pas li exactement obligatoires que ceux de la justice & du droict, l'Apostre saince Paul ordonne aux

34

Chrestiens de faire du bien à tous, mais principalement aux domestiques de la: toy Pource qu'estant la question de donner à autruy ce qui nous appartient & non à duy ceduy aucciqui nous n'auons autre communion que celle de la Nature & de la Police ancte doit pas plaindre si nous faisons plus de consideration d'vn autre auer quil, outre la Nature & la Police, nous auons encore cette estroite liaifon qui nous conjoint en vne mésme Religion Car puis que ce sónt ces relations qui nous obligent à les gratifier de nos biens-faits, quand il les faudra mettre en comparaison, celuy en qui nous les verrons toutes conjointement, sera sans doute preferable à vn autre en qui nous n'en verrons sinon quelques-vnes. Mais en l'administration de la Iustice, il en va tout autrements car pour ce qu'il s'agist de rendreà autry ce qui luy appartient, & non à nous, nulles autres relations n'y doiuent estre considerées. En la distribution des offices de la charité, quiconque prefere les domestiques de la foy à ceux qui ne le sont pas, suît la disposition de la volonte de Dieu, qui a plus mis en cettuy-cy qu'en cerrny-là de ces raisons & de ces motifs

qui la doiuent exciter en nous. En la difpensation des devoirs de la iustice & du droit, quiconque met deuant ses yeux autre consideration que celle de rendre à chacun ce qui luy appartient, fait directement contre la disposition de la volonté deDieusqui auoit ordonné qu'vn telsquel: que profession qu'il fist en matiere de Religionsou quelqu'autre deffaut qui fust en sapersonne d'ailleurs; jouist ou de telle chose, ou de telle liberté, par les loix de la Nature & de la Police. Et puis que Dieu; qui est plus zelateur de sa gloire se qui scait mieux ce qui la peut auancer que nous, a tellement conduit les choses par sa Providence, qu'en suivant l'ordre des loix de la Nature & de la Police, desquelles il est autheur il a laissé la jouissance de diuerses choses, & l'vsage de diuerses libers tez aux ennemis de sa verité, è est passions & precipitation, & temerité à nous que de les leur vouloir ofter, iusques à ce que par la mesme Prouidence il air changé l'ordre de ces loix, ou de la Police, ou de la Nature. En effet l'Apostre ne veut pas que la différence de Religion donne de legitime occasion à la dissolution des mariagesiny à ceux que ce lien à conjoints sujet

de se priver mutuellement des devoits ausquessissont obligezu Et si le mesme Apostrejoblige les Chresties de son temps à prier Dieu pour les Roys, pour les Gouuerneurs pour les Magistrats, & generalement pour tous les hommes, pource que l'auantage qu'ils anoient d'estre Chrestiens, au lieu que les aurres ne l'estoient pas ; & que d'entreux il y en auoit plufieurs horriblement perdus & infamessine les exemptoit pas de l'obligation du droit politique, qui faisoit qu'ils composoient vn melme Eltar ; iliest certes à presumer que sites Roys, & les Gouverneurs, & les Magistrats, & la plus grade partie des peuples eussent esté Chrestiens de son temps, il n'eust pas permisno plus que le Christia-nisme leur eust este vn pretexte d'abuser de leur authorité & de leur nombre à l'oppression de ceux qui n'auoient encore pû cognoistre la verité de lesus-Christ.Comme encore que deux nations soient de Religion différente, si est-ce que le zele de la Chrestiëne ne la doit pas porter à violer à l'égard de l'autre le droict des gens, pource que c'est vne loy commune que le consentement des peuples a establic entr'eux; encore que deux personnes soient dans le

Christianisme d'vne profession toute opsée, le zele de la Catholique ne la doit point porter à l'esgard de la Reformée à enfraindre les droicts de leur societé, que la Nature, & l'authorité du Souuerain, ou leur commun consentement, a establis entr'elles de mesme. Et veritablement ie ne puis que ie ne louë icy le iugement de Monsieur de Silhon, l'yn des bons politiques de nostre temps, qui dit que ce fut iustement que Ladislas Roy de Hongrie, perdit la bataille & la vie à Varnes, pource qu'à la suggestion du Legat du Pape il auoit rompu la foy qu'il auoit donnée à Amurat Empereur des Turcs, & que cét infidele auoit raison, en la chaleur du combat, d'appeller Iesus Christ à venger la perfidie de ceux qui faisoient profession de son Nom, dont ils auoient interposé l'authorité en la paix qu'ils auoient iurée. Or quelque différence qu'il y a en matiere de creace entre les Catholiques Romains & les Reformez, si ne peut-elle estre si grande qu'elle est entre les Chrestiens & les Turcs, ou les autres infideles. Et si le Pape n'a point la puissance de dispenser du serment par lequel on a ratifié la paix auec les Mécreans, il n'y a point de raison que

Apologie

38

la passion particuliere de quelques vns les dispense de nous rendre le droit qui nous est acquis par des Edicts & par des loix si solemnellement publiées.

SECTION II.

Que si on considere ceux de la Religion dans les deuoirs ausquels ils sont obligez enuers le Roy & l'Estat entant que François, ils ne sont point dignes de l'auersion de qui que ce soit.

Vant à la seconde façon en laquelle nous pouvons estre considerez, c'est à sçavoir entant que nous sommes François, nous ne sommes certes non plus dignes de la mauvaise volonté de nos concitoyens, soit à l'esgard de ce que nous sommes à l'Estat en general, soit à l'esgard de ce que nous devons estre envers nostre Prince; car pour ce qui est de l'Estat, si nous estios ou Mores, ou Gots, ou Vandales, ou quelqu'autre nation estrangere de cette sorte, qui sust venue en France pour occuper le pays à sorce d'armes, & en reduire en servitude les naturels habitans, & que la constitution des choses ayant changé,

nous fussions deuenus plus foibles en nombre, & incapables de nous deffendre contre la nation originaire; on pourroit aucunement excuser ses ressentimens. Le maudais traitement que nous en receurions pourroit mesme estre coloré de cette raison d'Estat, que pour nous oster l'humeur de Conquerans, il nous faudroit tenir bas, afin qu'auec le pouuoir & l'esperance de reussir, nous perdissions aussi l'enuie de rien entreprendre. Si nous estions originaires du pays, & que les Catholiques Romains sussent estrangers, qui nous eussent subjuguez & asseruis de bonne guerre; on pour-roit dire s'ils nous traitoient vn peu rigoureusement, qu'ils vseroient en quelque façon du droict des gens, qui donne cét auantage aux victorieux, & que la prudence ne permet pas qu'on laisse tant soit peu leuer la teste aux vaincus, de peur que le courage ne leur reuienne. Quoy que la plus sage Politique du monde, qui est celle des anciens Romains, en vsoit ordinairement autrement; car ou bien ils incorporoient auec eux en vno mesme nation celles qu'ils auoient vaineues, en leur donnant les mesmes priui40

leges le le mesme rang au gouvernement de leur Estat jou bien au moins ils les traittoient auec toute sorte d'équité & de douceur, & les empeschoient ainsi de regretter leur fortune precedente Pour ce qu'ils sçauoient que ceux qui sont contents de leur condition, n'en desirent point yne meilleure; & qu'au contraire les mécontentemens que l'on donne à des gens vaincus, les rendent indubitablement desireux de nouueautez, & enclins à toutes sortes de partis qui leur presentent de meilres esperances. C'est pourquoy quand ils demanderent à ceux de Priuerne, qui s'estoient rebellez contr'eux, & qu'ils auoient ramenez à la raison par la voye des armes, quelle ils se devoient attendre que pourroit estre la paix s'ils la leur donnoient; & que ceux de Priuerne eurent respondu ; sidelle & perpetuelle, si vous nous la donnez bonne; mais de peu de durée, si vous nous la donnez mauuaise, ainst qu'ils estoient magnanimes, ils appromerent cette generosité. Et leur raifon fut qu'il n'y avoit nulle apparence qu'il se rencontrast ny peuple, ny homme, qui n'estant pas content de sa condition, la supportast sinon autant de temps qu'il y seroit contraint, & qu'il ne s'en pourroit pas procurer vne plus douce & plus raisonnable. Mais quel-les que soient toutes ces considerations, elles n'ont point de lieu en ce qui nous concerne. Car nous sommes, comme chacun sçait, originaires du Pays, ainsi que les autres: & s'il y en a quelques-vns d'entre nous qui soient venus des pays estrangers, ou bien ils sont en extremement petit nombre, ou ils sont sortis de Nations auec lesquelles la nostre a tousiours eu de si estroittes alliances, que quand ils ont mis le pied en France, ils ont esté tenus pour François, ou bien il y a si long-temps que leurs ancestres sont habituez parmy nous, & ils sont entez dans le corps de la Nation de si longue-main, qu'il ne reste plus de memoire de leur extraction, ny plus de marque de la distinction de leur origine. Or tout le monde sçait qu'il est naturel aux hommes de tirer occasion delà de s'entr'aimer & de s'entrefauoriser,& que si l'amour de la Patrie s'estend iusques aux costaux, & aux rivieres, & aux campagnes de nostre habitation, les affections qu'elle engendre doiuent se porter plus

directement sur les hommes mesmes, puis que ce sont eux, qui à proprement parler, tont la Patrie & l'Estat, beaucoup plus que les choses insensibles & inanimées. Adjoustez à cela que nos parentez & nos alliances sont telles en tout le Royaume, qu'il n'y a aucune famille de nostre profession qui ne soit messée auecd'autres qui n'en sont pas. Car quand nos ancestres l'ont premierement embrassée; la separation s'est faite de telle sorte, que non seulement il n'y a eu parenté qui n'ait eu des familles de son sang & de ses Illiances en I'vn & l'autre party, mais mesmes qu'il y a eu quantité de maisons particulieres partagées, le perese trouuant d'vne reliq gion, & la mere d'vne autre, & les enfans pareillement. Depuis, ou bien les Catho-liques ont tellement continué de se ranger du costé des Reformez, ou les Reformez en changeant d'aduis sont tellement retournez en la communion des Catholiques, ou enfin les mariages se sont tellement bigarrez entr'eux, que leurs familles s'entretiennent par vne infinité d'attachemens & d'alliances. Ce qui deuroit non seulement beaucoup diminuer de cette auersion, que la diuersité des opinions au fait de la Religion engendre dedans nos esprits, mais mesmes y produire des affections dignes des plus beaux & plus louables sentimens de la Nature. De plus, encore que le nombre que nous faisons n'est pas à comparer à celuy de profession contraire, si n'est-il pas si petit ny si contemptible pourtant, qu'on n'en doiue faire consideration en l'Estat: Car la grandeur & la force des Empires consiste principalement en la multitude des hommes; c'est là que sont leurs ressources quad il leur arriue quelques notables accidenss c'est ce qui les rend considerables à leurs voisins, & redoutables à leurs ennemis; c'est en vn mot ce qui les rend capables,& de soustenir les grades guerres, lors qu'on les attaque chez eux, & d'entreprendre au dehors des conquestes & vtiles & glo-rieuses. Or est-il vray qu'en quelques Prouinces de ce Royaume, comme est la Prouence, la Bretagne, le Berry, la Bourgongne, la Picardie, & la Champagne, il y a fort peu de Reformez en comparaison des autres. Mais aussi n'ignore-t'on pas que le Poictou, & la Xainctonge, & la haute & la basse Guyenne, le Bearn, le Languedoc, les Seuenes, le Dauphiné, &

44 Apologie quelques autres Provinces en sont tellement semées, sans compter ce qu'il y en a en l'Isle de France, en Normandie, & en tous les autres lieux où ils sont espars, qu'ils font une partie fort considerable de ce grand corps. Tellement qu'encore qu'ils n'y tiennent pas le lieu que la teste tient au corps humain, si est-ce que comme la teste a soin des parties inferieures, la bonté & la sagesse de nos Rois a creu qu'elle deuoit pouruoir à nostre conseruation par l'authorité des loix publiques. Or les parties qui sont au dessous de la teste, s'entr'assistent respectivement; de sorte que celles qui en sont les plus prochaines, & qui seruent à l'esgard des autres, ainsi que de canaux pour y porter les esprits, ne les arrestent pas en passant, pource que de la perclusion, ou de la foiblesse de quelques-vns de ses membres, le corps demeureroit incommodé. Ceux donc qui tiennent en ce Royaume le gouuernement & la puissance sous l'authorité de sa Majesté, & generalement tous ceux aueç qui nous viuons, sont obligez par l'affe-Étion qu'ils portent à l'Estat, de ne nous empescher point l'effet des bonnes volontez de nostre Prince, & de nous affectionnet comme composans auec eux vn mesme corps, dont la conseruation & la felicité despend de la bonne vnion de ses parties. Et veritablement nos plus grands aduersaires mesmes ne peuuent pas reuoquer en doute, que selon le nombre que nous y faisons, & les emplois que nostre propre inclination où la puissance publique nous y donne, nous ne contribuyons au bien de ce grand Empire, tout ce que nous y pouuons apporter d'ornement & d'vtilité. Les paysans, qui sont en grand nombre de nostre profession dans les Prouinces, dont i'ay fait mention cy-dessus, y cultiuent la terre, & fournissent par ce moyen à la nourriture de ceux qui les gouvernent, & aux necessitez de l'Estat. Les artisans n'y sont point inferieurs aux autres en toutes fortes d'ouurages, & n'y a guere de professions de cette nature, où nous n'en ayons toussours eu quelquesvns fort excellens. Les Marchands qui sont par tout, & notamment dans les Ports de mer, fournissent les villes des commoditez des Pays estranges, transportent chez nos voisins les choses dont nous abondons, & par le moyen de ce commerce deschargent le Royaume de ce qui 46

luy pese, l'accommodent de ce dont il a besoin, & mesmes y attirent l'argent, dont nous manquerions autrement par faute de mines. Les gens de lettres n'y reuffifsent point si mal, qu'on ne voye sortir d'entre nous des hommes eloquens pour le Barreau, de bons Medecins pour les villes, & de rares lumieres en toutes sciences, & semble mesme qu'en la belle litterature, & en la cognoissance de l'antiquité, les Casaubons, les Scaligers. & les Saumaises l'ayent emporté pardessis tous ceux qui s'en sont meslez depuis longtemps. La Noblesse, & tous ceux que la generosité de leurs inclinations attire à suiure les armes, ne sont pas en si petit nombre dans les armées, qu'ils ne s'y rendent considerables, & ils s'y acquittent de leur deuoir de telle sorte, qu'ils s'y sont signalez en de tres-grandes & tres-importantes occasions. Et c'est chose aucunement estrange, que quelquefois à l heure que les pauures artisans ont bien de la peineà surmonter la haine que l'on porte à la Religion qu'ils professent, pour auoir habitation dans les villes, & s'establir dans les Maistrises de leurs mestiers : le Roy met vne bonne partie des forces & de la

seureté de son Estat entre les mains de Generaux d'armée qui sont de mesme profession. Ainsiau Conseil de sa Majesté, l'auersion qu'on peut auoir contre nostre creance, n'empesche pas que le bon-heur, & la conduitte, & le courage, ne puissent esleuer les hommes aux grandes charges de la Couronne, & à de si glorieux em-plois: & dedans les Prouinces en diuers endroits, elle empesche que l'industrie, & l'adresse, & l'intelligence dans les plus petits arts, n'y puissent promouuoir les sujets de sa Majesté, pour l'vtilité du public, & pour le soustien de leurs familles: Enfin generalement en toutes les necessitez du Royaume, s'il y a quelque chose à faire, nous la faisons selon nostre puissance aussi alaigrement que ceux qui sont beaucoup plus fauorisez que nous, & s'il y en a quelque autre à souffrir, nous la. portons pour le moins aussi patiemment que les autres , bien qu'on ne nous espargne nullement en la distribution du faix, & que la pluspart du temps les proportions n'y font nullement gardées. Il y at donc certes quelque sujet d'estonnement que toutes ces consideratios ne sont point capables de contrebalancer un peu certe! violente passion que quelques-vns ont contre nous. Si c'estoient les Moines, & les gens particulierement destinez à la deuotion, de qui dependist l'execution des volontez de sa Majesté en ce qui nous concerne; cela ne deuroit pas estre trou? ué si estrange comme il est. Ces Messieurs sont d'ordinaire si preoccupez, & se laissent tellement transporter au zele qu'ils ont pour l'auancement de leurs dogmes? & pour l'establissement de l'authorité de leurs charges, que nostre doctrine attaque particulierement, qu'il n'y a rien de merueilleux s'ils s'emportent en cette occurrence. Ioint que leur condition ne les appellant pas au gouvernement ; ils ne peuuent pas si bien sçauoir quel temperament la bonne & sage Politique, & les raisons de la Iustice & du Public; doiuent apporter à l'ardeur de ce zele dont il faut que des gens de leur robbe fassent profession de bruster: Mais quant à ceux qui sont nourris dans le monde, & esseuez dans les charges, dont nostre religion n'entame aucunement l'authorité, & à qui l'experience des choses a deu faire comprendre qu'il y a bien de la difference entre les regles du gouvernement d'vn Glospour ceux de la Relig.

tre, & celles de l'administration de la Iustice, selon les loix d'vn grand Estat, c'est veritablement vne chose digne de quelque admiration, qu'il s'en trouue que la passion de la Religion destourne si loin du droit chemin de l'equité, qu'ils suivent assez conscientieusement en autres ren-

contres:

Si on nous considere à l'esgard de ce que nous deuons estre enuers nostre Prince, nos consciences nous rendent tesmoignage que nos ames sont si remplies du respect, de la reuerence, & de l'affection que nous auons à sa personne, & du zele & de la ialousie que nous auons pour sa gloire & pour sa grandeur, que nous ne pouuons nous persuader qu'il y ait aucun qui nous surpasse en cette louange. Et i'estime que nos plus grands ennemis nela contestent pas. Car encore que depuis que nous auons commencé de paroistre en cét Estat, il y ait eu des confusions estranges; & que quelques-vns de nos Rois, à la sollicitation de nos ennemis, ayent employé tout ce qu'ils auoient de puissance pour nous en exterminer, iusques là que sous leur nom il s'y est fait contre nous des executions capables de mettre les moins

D

50

impatiens au desespoir, si est-ce que par la grace de Dieu aucun de nous ne s'est encore iamais trouué messé dans les conseils des execrables attentats qu'on à commis contre leurs personnes. Et si nostre Nation a receu quelque deshonneur de la produ-Lion de ces monstres qui ont si traitreusement violé leur sacree Majesté, nostre communion au moins est exempte de la honte & de l'infamie de leur education. Il est vray que quelques-vns nous ont soupconnez, & mesmes ouvertement accusez d'estre ennemis de la royauté, & d'auoir eu quelque dessein, ou de changer la forme du gouvernement de l'Estat, ou au moins de nous y vouloir cantonner en quelque lieu, pour nous former en Republique. Et ceux qui veulent croire que nous auons eu cette malheureuse intention, pensent en auoir quelque preuue dans les guerres qui se sont faites en ce Royaume du temps de nos Peres & du nostre. Quelques-vns mesmes nous obiectent que les affaires qui se passent maintenant en Angleterre, descouurent assez quel est en cela le genie de nostre Religio. Mais certainement quelque malheur qui soit arriué à ceux de nostre communion,

d'estre ou forcez, ou obligez, ou portez par quelque consideratio que ç'ait esté, à prendre les armes pour la liberté de leurs confciences, c'est à grand tort qu'on nous impute d'auoir eu de si pernicieuses pensées, & c'est auec beaucoup de douleur que nous en voyons l'accusation imprimée en tant d'endroits Mais l'estime neantmoins qu'ils n'y a point de luges equitables deuant qui nous plaidions cette cause, qui ne nous en enuoyent pleinement iustifiez. Je ne veux nullement entreprendre la defense de la prise des armes cotre son Prince, pour quelque cau se que ce puisse estre. Ie sçay qu'il ya des Iurisconsultes & des Politiques, des Theologiens & des Casuistes, qui ont debattu dette question de telle sorte, qu'ou bien ils Bont: laisséeindecise, ou bien ils ont trop fauorisé ceux qui veulent limiter l'authorité de la Royauté. Mais bien que plusieurs gens de toutes professions estiment la defense de la religion que l'on croit vraye, & la liberté de la conscience à la professer; la moins illegitime de toutes les causes qu'on peut alleguer pour la iustification de cette actions i'ay tousiours creu pourtant qu'il convient beaucoup mieux à la nature de l'Euangile,

Apologie

12 & à la pratique de l'Eglise ancienne, de n'auoir recours à autres armes qu'à la patience, aux larmes, & aux prieres, en attendant qu'il plaise là Dieu changer le cœur des Rois, & donner par quelque autre voyerepos & liberté à ses seruiteurs. Età toutes les fois que ie repasse les yeux de l'esprit dessus l'histoire de nos Peres, ie ne puis que ie ne régrette tres-senfiblement qu'ils n'ayent couronné tant d'autres belles vertus dont ils nous ont laisse les exemples, de l'imitation des premiers Chrestiens, en cette inuincible patrence qu'ils monstrerent sous les persecutions des Empereurs. Car ils eussent ainsi retranché toute occasion à ceux qui cherchoient dequoy diffamer leur profession, & eussent, comme l'estime, plus glorieusement auancé la cognoissance de la verité par l'admiration de leur vertu & de leur constance, qu'ils ne l'ont defendue auantageusement par la force de leurs armes. Toutesfois, encore qu'à mon aduis leur action ne soit pas de la nature de celles qu'on doit louer; car on ne loue finoncelles en qui la vertu paroist eminente: encore qu'elle ne soit pas absolument à iustifier; pource qu'on ne iustifie sinon

pour ceux de la Relig. 53 celles qui s'accordent tout à fait aux loix, au lieu que celle-cy ne se rapporte pas parfaitement aux commandemens de l'Éuagilesie m'asseure qu'on me supportera si ie dis, que s'il y en a aucune de cette nature qui puisse estre excusée, ou supportée, ou pardonnée benignement, c'est celle que nos ancestres ont faite en cette occurrence. Chacun sçait la violence des Edicts, & des persecutions qui ont esté faites contre eux au commencement. Les prisons, les gibets, les seux, les plus insupportables suplices qui se puisset imaginer, y ont esté employez assez long-temps sans aucune misericorde. Les bourreaux ont eu quelquesfois horreur de leurs tourmes, & quoy pue les peuples fussent extremement animez à l'encontre d'eux, siont-ils eu assez souuent de la compassion de leurs souffrances. Quand donc nonobstant la dureté de ces traittemens, ils ne laisserent pas de multiplier de telle façon, qu'en beaucoup de lieux ils eussent bien peu se defendre si la patience leur eust eschappé, pour chercher quelques moyens de se garentir des extremitez ausquelles on les mettoit, & non certes attenter aux loix de l'Estat, & à la forme de son gouvernement; car 54

c'est chose à laquelle ils n'ont iamais deu penser, mais empescher seulement que les conseillers de ces inhumanitez n'abusassent de l'authorité des Rois à leur entiere destruction, eussent-ils rien fait en cela qu'on n'ait accoustumé d'excuser charitablement en toutes rencontres? Y a-t'il forre de respect dont la violation ne soit fauorablement interpretée, quand elle ne procede que du desir de la conseruatió de la vie en vne extreme & ineuitable necessité? Et de ceux qui sont les plus seucres à condamner cette impatiece de nos ayeuls, y en a-t'il aucun qui se peust vanter de monstrer autant de moderation qu'ils ont fait, s'il auoit esté mis à des espreuues aussi rigoureuses? Neatmoins pendant que dura le regne de François I. & de Henry second, lors qu'on ne pouvoit accuser ny la foiblesse, ny le bas aage de ces deux grads Rois, & que grands & petits demeuroiet en leur obeissance, & en l'observatio de l'ordre public, il ne s'est iamais veu que nos Peresayent rien opposé à la seuerité de leurs Edicts, sinon vne insurmontable patience. Depuis, le nom de l'authorité souueraine estant deuolu à des Princes à quil'agen'auoit pas encore permis d'ap-

pour ceux de la Relig. prendre l'art de regner, & toute leur puissance estant effectivemet tombée entre les mains de gens, dont l'aggrandissement extraordinaire estoit en charge aux Grads del Estat, & suspect aux Princes du sang, & à la Maison Royale mesme, ces ialousies & ces soupços partagerent manifestement & leRoyaume & la Cour. Tellement qu'y en ayant plusieurs qui pour des interests beaucoup moindres que ceux de la conscience ou de la vie,se dispenserent de ce respect qu'on accuse ceux de la Religion de n'auoir pas rendu alors, ce ne seroit pas chose bien estrange quand ils se seroient trouuez enueloppez dans vne faute, dont estoient coupables tant de gens qui n'auoient pas à beaucoup pres telle occasion de la faire qu'eux. Mais encore peut- on dire icy diuerses choses fort considerables pour leur descharge.La premiere est, qu'ils n'en sont iamais venus à prendre les armes d'vn commun consentement; de sorte qu'on puisse attribuer cette action au general de ceux de la Religion, ny mesme à vne partie fort considerable de leur corps, iusques à ce qu'ils ont pensé estre tout apparemmet fondez en droit de le faire, pour

conseruer auec leur vie & leur religion la

D iiij

Apologie

56 majesté des loix publiques, & l'authorité du Souuerain. Car ils ne les prirent qu'a-pres le fait de Vassi, qui estoit vne infra-Etion toute ouverte de l'Ediet de Ianuier, lequel auoit esté fait en leur faueur par le Roy, de l'aduis de la Reyne sa mere Regetedel'Estat,& de ceux qui ont accoustumé d'auoir quelque voix & quelque credit das le gouvernement pendant la minorité du Prince. Quand donc ils virent que l'authorité du Souverain ne leur pouvoit estre vne assezseure sauuegarde contre la violence des particuliers, & qu à ce desir naturel de la conservation de leur vie, qu'ils voyoiet autrement exposèe à la fureur de leurs ennemis, se ioignit encore cette consideration, que ce seroit faire service & au Roy & à l'Estat que d'entreprendre la defense de ses loix, ils ne firent plus de scrupule d'vne chose contre laquelle leur conscience auoit resisté iusques alors. Car quant à ce qui est de l'entreprise d'Amboise, & de cette petite guerre si sage & si bien reglée que le Sieur de Mouuas entreprit en Dauphiné, outre qu'il y auoit autant ou plus de raisons politiques qui agissoient en ces rencontres, que de causes de religion, ce

sont faits de particuliers, dont il ne faut

point accuser nos Eglises en general, & qu'on ne doit nullement imputer aux inclinations que leur creance leur auoit données. Mouuans essaya bien d'attirer les Prouinces voisines à son exemple; mais aucune ne le voulut suiure, & luymesme de son instinct mit incontinent les armes bas, laissant plustost dedans les esprits des hommes vne singuliere admiration de sa moderation & de sa continence en vne chose qui d'ordinaire en garde si peu, qu vne mauuaise impression de son attentat; car à peine void-on rien de si retenuny de si regulier maintenant en pleine paix, que furent ces petits mouuemens comme les histoires les nous rapportent, Quant à l'affaire d'Amboise, on sçait assez que c'estoient des Princes qui se servoient de la Renaudie, & qui luy faisoient jouer le jeu, beaucoup plustost pour l'interest de leur grandeur, que pour la consideration de la conscience. Mais quoy qu'il en soit, & de quelques motifs qu'on y ait esté porté, il se trouue encore des lettres de Caluin mesme qui improuuent tant & plus cette conspiration. Ce qui monstre qu'il s'en a beaucoup fallu que tous ceux de la Religion y ayent trempé, estant à presumer qu'il n'y auoit personne alors dont la plus-part suiuist plustost les conseils & les mouuemens, que de ce grand personnage. Et de fait, il est imaginable qu'elle eust peu estre si secrette si elle eust esté communiquée à tant de gens qu'il y en auoit alors de nostre profession: & celuy mesme qui la descouurit en estoit, & il a ce tesmoignage dans l'histoire de Monsieur de Thou, qu'il le fit par pur & simple mouuement de sa conscience. La seconde chose qu'on peut dire est, que quand tous ceux de la Religion prirent les armes en ce Royaume en l'an mil cinq soixante-deux, les affaires politiques & celles de la conscience se trouverent alors si messées: & la querelle entre la Maison de Bourbon & celle de Guise éclatta de telle façon, qu'encore que la Religion fust le pretexte de la guerre, si est-ce qu'à l'esgard des Grands & de quelques-vns de la Noblesse, la vraye cause en estoit en grande partie dans vne ialousie d'Estat. Or en ce qu'il y auoit de Religion, ceux de nostre profession auoient au moins cét auantage, qu'outre la couleur apparente de iustice qui se yoyoit en la deffense d'vn Edict enfraint si violemment, ils auoient pour chefs des

pour ceux de la Relig. 59 Princes du sang, dont la consideration a toûjours esté tres-singuliere en ce Royaume. Quant à ce qu'il y auoit de politique, ils soutenoient la cause des enfans de la Maison, contre ceux qu'on disoit vouloir se rendre possesseur de la Couronne, & dont quelque temps apres les deportemens ne iultifierent que trop les soupçons qu'on en auoit eus; car cette querelle, depuis la premiere guerre, iusques à l'entietiere extinction de la Ligue, qui ne fut qu'enuiron trente cinq ans apres, a esté comme vne fievre continuë, qui a eu quelquesfois ses remises à la verité, mais dont le Corps de l'Estat ne fut iamais bien net pourtant, & qui ayant tousiours son siege en mesmes parties & en mesmes humeurs, s'est renouuellée de temps en temps par de fort furieux symptomes. La troisiesme chose finalement est, que dés aussi tost qu'on a donné aux Princes de la Religion, vne partie du contentement qu'ils desiroient, & à ceux qui les suiuoient à la guerre, la seureté de leurs vies, & la liberté de leurs consciences, auec quelque exercice de leur pieté, ils ont incontinent quitté les armes,& mesme assez souvent abandonné des occasions auanta geuses, ou d'az

uancer leurs desseins, s'ils en eussent eu d'autres que moderées & dignes de bons François, ou d'asseurer leur condition, & la rendre moins sujette aux effets de la mauuaise volonté de leurs aduersaires; car ils ontrendu de bonne foy les places qu'ils auoiet occupées, & sont eux-mesmes allez les premiers assieger celles qu'ils auoient esté contraints de mettre entre les mains des estrangers, come ils firent le Haure de Grace; aimant mieux qu'on les accusast de peu de precaution en leurs affaires, & de peu de gratitude enuers ceux qui les auoient assistez, que de faute d'affection à leur pays, ou de fidelité à leur Prince. Et veritablement c'est chose tout à fait hors d'apparence que nos Peres ayent eu aucune pensée de Republicains, puis qu'ils ne failoient la guerre que sous les enseignes des Princes du sang, qui auoient vn trop notable interest en la conservation de la Monarchie, pour fauoriser de leur authorité & de leur conduite le dessein de la renuerser. En effet, par vne extraordinaire grace de Dieu leurs enfans sont maintenant dessus le Throsne & tout à l'entour, & ny à aucun de la naissance de ceux de qui se sont nos Roys, dont les peres ou

pour ceux de la Relig. les ayeuls n'ayent dans les tempestes de l'Estat, esté heureusement conseruez au milieu de nos Eglises. Certainement on a enseuely la memoire des Ligues qui se sont faites pour exclure de la succession au Royaume ceux quela Loy de l'Estat y appelloit, sous pretexte qu'ils n'estoient pas Catholiques. On ne se souvient plus des Barricades & des conspirations qui ont esté faites contre les Princes desia regnans. sous ombre qu'ils ne nous persecutoient pas assez cruellement au gré de nos ennemis. On a perdu la souuenance des menées & des monopoles qui se sont faits pour transporter la couronne aux estrangers, pource que le legitime heritier, quoy qu'il eust laissé nostre communion, estoit soupçonné ne l'auoir pas fait de bon cœur, & n'estoit pas encore bien auec Rome. Et nous ne trouuons nullement estrange que ceux qui ont esté coupables de ces actions, quandils s'en sont repentis, ny que leurs

quand ils s'en sont repentis, ny que seurs enfans, quand ils ont esté bons François, ayent esté traitez aussi fauorablement que si iamais ces choses n'estoient arriuées; car il n'est pas raisonnable que la memoire des fautes demeure à perpetuité, ny qu'elles impriment pour tousours des slestrissures ineffaçables. Il y a quelquesfois quelque mauuaise constellation qui regne des? fus vne nation, ou pour mieux dire quelque esprit de tumulte & de sedition, quelque demon ennemy de la societé du genre humain, qui charme les entendemens des hommes de ses illusions, & qui se messe dans leurs passions, & les porte à des fureurs dont ils ont les premiers horreur quand ils sont reuenus à eux-mesmes. Alors ce n'est ny iustice ny humanité que de leur reprocher leurs trasports, non blus qu'à des phrenetiques les leurs, quand ils retournent en conualescence. Pourquoy donc nous accuseroit-on encore maintenant d'estre issus de peres ennemis de la Royauté, pource que l'impatience des tourmens, & notamment l'horreur des massacres, les a fait recourir aux armes, non pour auoir des Roys de leur Religion, non pour refuser l'obeissance à ceux qui en professoient vne contraire; mais simplement pour tascher à se garentir de l'oppression, de laquelle tout aussi tost qu'ils ont pensé estre à couvert sous les Edits de paix, il se sont deportez des voyes de fait, & se sont d'eux-mesmes ragez aux termes d'yne entiere obeissance ? En vn

mot, cette parole qu'on attribue à la Reyne Catherine de Medicis, leur est vne entiere iustification; qu'il ne se falloit pas doner beaucoup de peine des guerres des Huguenots, ny craindre qu'elles tirassent d'elles-mesmes à quelque mauuaise consequence pour la France. D'autant que pour opiniastrement & furieusement qu'ils y semblassent acharnez, on leur seroit quand on voudroit tomber les armes des mains, pour ueu qu'on seur donnast

leur saoul de presches.

Pour ce qui regarde les guerres de nos temps, où nos Eglises ont eu quelque part, il y faut bien distinguer les mouuemens de quelques Grands, & peut estre encore les inclinations de quelque ville en particulier, d'auec le general de ceux de nosstre profession en ce Royaume. Si quelques Seigneurs y ont esté menez d'ambition & de desir de paroistre à la teste d'vni parti considerable, c'est un peché de leurs personnes, qui ne doit point estre autrement attribué aux peuples de nôtre communion, sinon qu'ils n'ont pas esté assez circonspects pour se donner garde de l'artissice de ceux qui se service du bien public,

pour satisfaire à leurs passions particulieres. S'il y a eu quelque ville capable de cette mutine & criminelle pensée, de se= couer l'authorité de la Monarchie, & de donner la naissance à vn nouuel Estat dans l'Estat, c'est vn crime qui est demeu ré dedans l'enceinte de ses murailles, & tant s'en faut que le reste de ceux de la religion qui sont espandus dans le Royau-me, en ayent esté ou complices ou corrompus, qu'ils peuveut protester en bonne conscience qu'il n'est iamais venu à leur cognoissance, & que s'ils en eussent fçeu quelque chose, ils l'eussent eu en horreur. Et si on ne veut croire à la sincere protestation qu'ils font de leur entiere innocence, au moins certes peut-on bien adjouster quelque foy à la voix de leur interest. En quelle ame tant soit peu senfée peut tomber cette imagination, que tant de Noblesse de la Religion, qui tient toute sa grandeur de la Monarchie, & qui ne resplendit sino des rayons de la royauté, eust voulu abandonner les esperances. de la Cour, & ses terres & ses maisons, en tant de Prouinces où elle est dispersée, pour s'en aller dépendre du caprice d'vn peuple seditieux & turbulent; comme dedans

dedans les republiques ils le sont ordinais rement ? Car qui ne sçait que les peuples qui se pensent estre les maistres de leurs loix & de leur conduite, passent incontinent de la liberté à la licence; & de la licence à l'oppression de tout ce qui paroist auoir quelque qualité eminente, & quelque charactere de grandeur ? Quelle apparence que ceux d'entre nous qui sont en quelque degré dans les Parlemens & dans les places de Iudicature, come il y en auoit assez bon nombre alors, prissent plaisir à laisser leurs offices & leurs dignitez, & à abandonner leurs biens à la confiscation, pour s'en aller estre simples bourgeois d'vne Republique populaire? Car qui ne sçait encor que non seulemet tout y est reduit à l'egalité, mais que les anciens & originaires habitans y pretendent tousiours auoir quelque droit d'estre privilegiez das le gouvernemet & dans les charges?Enfin generalement parlant nous tient-on capables de cette fureur, que pour le contentemet que nous aurions de voir vne ville de nostre profession formée en Republique à cent lieues de nous, nous nous priuassions de la protection des Edicts du Roi, sous la quelle seule nous viuons, & nous exposas-

sions à son indignation, à la haine de ses officiers, & à la rage des peuples? Car de nous proposer de nous y retirer quant à nous, pour jou'ir de cette imaginaire liberté, les heritages que plusieurs de nous possedent en diuers endroits, nos affaires qui nous tiennent attachez en vne infinité de contrées, & les inclinations que chacun a pour l'habitation de son pays, ne nous en empeschassent-elles point, quelle ville de celles qu'on peut auoir soupçonnées de vouloir se soustraire à la Royauté, seroit capable de contenir la centiesme partie de ce que nous sommes, pardessus ses naturels habitans, qu'on ne s'y estouffast les vns les autres : Où est-ce que cinque ou six cens Ministres y trouueroient leurs emplois, & tant de milliers de marchands, d'artisans, & de paysans, leur trafic, & l'exercice de leurs arts, & leur labourage? Où logeroit-on tant de vieillards, tant de femmes, & tant d'enfans, & dequoy pourroit-on fournir à leur nourriture? Quant à ce que quelques-vns ont mis en auant l'exemple des Prouinces du Pays-bas, ce n'est pas bien prendre les choses. Nous ne pretendons nullement enuers nostre Souuerain les droicts que ces peuples ont

pour ceux de la Relig.

pensé auoir à l'endroit des Ducs de Brabant, des Comtes de Hollande, que la France, & tout le reste des Puissances de l'Europe, qui ne dependent point de l'Espagne, a assez ouuertement ratifiez, par l'assistance qu'on a donnée à leur soûleuement & à leurs armes. La proximité des villes ne nous pouuoit pas donner la commodité de nous joindre, comme elle à fait aux Hollandois. La nature du pays n'eust pas permis que nous eustions pû soûtenir la puissance d'yn Roy de France; comme ils ont fait celle d'Espagne, esloignez qu'ils estoient du siege de son empire, & retranchez si auantageusement entre leurs mers & leurs canaux. Enfin, ny la terre, ny la mer ne nous eust pû permettre d'entretenir pour nostre conseruation les correspondances qu'ils ont eues. Si donc il y en a eu quelques-vns d'entre nous qui ayent pris les armes pour la deffense des villes que le feu Roy de glorieuse memoire a voulu tirer d'entre nos mains, & si ceux qui sont demeurez en leurs maisons ont eu quelques tacites in-clinations à desirer des succez contraires à ceux que nous auons veus, il ne le faut imputer qu'à la crainte que la plus-part de

E ij

nous ont cuë, que si les euenemes estoient contrairés à leurs souhaits, on ne leur ostast ce qu'ils estiment plus que la vie, & qu'ils ne sussent contraints d'aller, chercher la liberté de prier Dieu selon leur Religion chez les estrangers. Ie sçay qu'il s'en est trouué qui ont eu quelque peur de ces épouuantables executions, qui ont fait desirer à nos peres des villes de seureté. Mais bien que la crainte soit vne passion fort innocente, & que l'impression que fait vne Saint-Barthelemy soit si profonde, qu'il faut plus d'vn siecle pour l'effacer, si deuoient-ils auoir beaucoup meilleure opinion de nos temps, & ne ctoire pas que nostre nation pûst commettre deux fois des barbaries si contreuenantes à son genie. Quant à cette autre apprehension, d'estre contraints de vuider le Royaume sion vouloit auoir la liberté de l'exercice de sa Religion, ie laisse à juger à ceux qui sont plus prudens & plus entendus aux choses du monde, s'il y auoit de l'apparence que nous nous en deussions laisser preuenir. Certes ce que nous en craignions, nos ennemis l'esperoient, & c'estoit la voix commune du peuple. Ce qui est vne preuue bien manifeste que nostre

pour ceux de la Relig. 69 crainte n'estoit pas tout à fait sans fondement, & qu'encore que ce ne fust nullement le dessein du Roy, les choses pourtant, à les considerer en elles mesmes, en presentoient les apparences. Or si vne telle crainte, bien ou mal fondée, peut fournir quelque excuse à desemblables mouuemens, ie m'en rapporte à l'equité de ceux qui sçauent combien la conscience, la Religion, la liberté, le bien, la vie, la douceur de la patrie, & les autres choses femblables, sont capables de causer de viues & de violentes émotions en l'esprit humain. Car pour si profondement qu'on ait imbu les sentimens de la pieté, si est ce qu'en telles occasions il est extremement mal aisé de ne se laisser point emporter aux inclinations de la Nature. Mais en tout cas, & quelque iugemet qu'on fasse de cette action, car encore n'est-ce nullement mon dessein que de la dessendre, aucun de ceux de la Religion n'a eu de plus mauuaises intentions que celle-là, si vous en exceptez, comme i'ay dit, ou l'ambition de quelques Grands, ou, comme quelquesvns ont estimé, la folie d'vne seule ville. Encore croy-je certes qu'il n'en faut excepter ny ville, ny Grand, & que tous vniiij

70

uersellement ont esté preoccupez de la mesme crainte. Asseurément aucun ne se fustiamais laissé aller à ce qu'on a tant de fois depuis appellé de ce nom de rebellion, si on eust pû auoir assez de foy pour croire, comme nous le voyons, que la Prouidence de Dieu, & la clemence de nos Roys, eussent deu estre des digues assez puissantes pour arrester les torrens de maux qui sembloient menacer toutes nos Eglises; car n'ayant point ny de preuue certaine, ni de raison seulement apparemment concluante, que qui que ce soit ait eu de si mauuais & de si pernicieux desseins, ce n'est ny iustice ny charité de deferer, aux mauuais soupços, ou aux ouuertes accusations de personnes notoirement animées. Ievoy, comme i'ay desia dit, que quelques-vns prennent occasion de ce qui se passe en Angleterre, pour décrier generalement nostre profession, comme si d'elle mesme elle nous donnoit quelque mauuaise volonté contre les Monarques. Et bien que la Nature ait separé l'Angleterre d'auec la France d'vne mer, & que la langue & les inclinations nous essoignent encore plus des Anglois & de leur com-munication, que ne fait l'Ocean mesme, si

pour ceux de la Relig. 71 est-ce que pource que nous sommes de mesme Religion, il y a des gens si peu equitables, qu'ils ne laissent pas de s'imaginer que nous auons quelque secrette in-telligence de desir & de sentiment auec les Parlementaires. Il seroit peut-estre à desirer que les hommes de condition priuée s'attachassent tellement aux choses de leur vocation, qu'ils n'eussent pas le loisir de s'enquerir du gouvernement des Estats, ni des nouvelles des affaires estrangeres. Mais puis qu'on ne sçauroit l'empéscher,& que mesmes du consentement de l'ordre public on informe vniuersellement tout le monde des plus importantes affires dé l'Europe, au moins en ce qui est des plus notables euenemes, il n'y a pas moyen de faire que lesspeculatifs ne raisonnent sur les occurréces du temps, ny mesmes qu'ils ne s'y interessent en quelque façon, chacun selon la passion qui le gouuerne. Car il est naturel aux hommes en toutes sortes de contentions de se déterminer de quelque costé, & mesmes dedans le jeu, où les spectateurs n'ont point de part, la moindre chose du monde est capable d'encliner leurs affections, & de leur faire souhaiter sans interest l'auantage à l'yne des parties E iiii

72 Apologie plûtost qu'à l'autre. On donc soit que la Religion ou l'Estat engage leurs inclinatios, il n'est pas de merueille s'ils y portent aussi leurs vœux,& si dans la conuersation ils en donnent quelque tesmoignage. En cette guerre d'entre les Venitiens & le Turc, Catholiques Romains & Reformez ont tous vn mesme sentiment, pource que leur interest est commun contre l'ennemy du Christianisme; mais si la prosperité des mecreas apportoit quelque notable affoiblifsement au party Reformé, ie ne doute nul-lement que les Catholiques zelez n'en receussent du contément: come il s'en pourroit trouver quelques-vns entre les Protestans qui ne seroiet pas fort marris de leurs progrés, s'ils estoient cause de quelque notable déchet à la puissance de Rome. Ce n'est pas que ni les vns ni les autres aiment le Turcimais c'est que quelquesois la passió maistrise les hommes tellemet, qu'ils pensent gagner ce que leurs aduersaires perdent. An'en point mentir c'est vne puissante inclination que le zele de Religió, & qui porțe souvent les homes à des choses bien estranges. Universellement tous ceux de nostre profession en ce Royaume souhaitent ardemment toute sorte de prosperité

aux armes de sa Majesté, & auancent tant qu'ils peuvent de leurs vœux, ses victoires & ses conquestes. La nature les y oblige,& lesentiment de bons François; & pource que si ses progrez n'auancent point leur religion, au moins n'en reçoit elle aucune diminution, il ne faut nullement craindre que cet interest diuertisse leurs affections, ny qu'il leur donne d'autres pensées. Mais entre les Catholiques Romains la constitution des esprits n'est pas si absolument vniforme. Il y en a plusieurs qui sçachant bien que nos Rois ne sont pas moins affectionezà la Religion Romaine que leurs ennemis, ont dans les affaires du temps mesme passion que nous, & qui pour cette raison se portent aux occasions auec mesme courage. Quelques autres soupçonnent & craignent aucunement qu'enfin de cette ligue que la France a faite auec diuers Potentats Protestans, & de l'abbaissement de la puissance d'Espagne, la Religion Romaine ne reçoiue; quelque detriment. Neantmoins pource que l'affection au service de leur Prince prevaut en eux, & que la crainte d'vn mal incertain & à venir, ne le doit pas emporter sur la consideration d'yn deuoir certain & present, 74 Apologie

ils ne laissent pas de servir le Roy courageusement & fidelement, en remettant les euenemens futurs à la diuine Prouidence. De mesme que d'entre les nostres il s'en est trouué quelques-vns qui ont seruy le feu Roy contre la Rochelle & Montauban, pource que leur vocation les y appelloit, & qu'ils croyoient que c'estoit à Dieu, & non à eux à prendre le soin de la conservation de ses Eglises. Mais il y en a quelques autres, & nous en voyons tous les iours qui ne se peuuent empescher de tesmoigner qu'ils ont du regret & de la douleur de la prosperité des armes du Roy, pource qu'ils s'imaginent que la Re-ligion Romaine, & les interests de l'Espagne ont yne si estroite connexion, qu'ils sont entierement inseparables. Ils diminuent autant qu'ils peuuent nos bons succez, & enflent au contraire ceux de l'Espagne. Ils recueillent auec auidité les mauuais bruits qui se sement contre l'Estat, & respandent auec contentement les nouvelles des disgraces qui nous arrivent. Ils censurent à toute rencontre le Gouuernement present, & si quelqu'vn de nos desseins ne reussit pas, ils en triomphent. Si le Cardinal d'Offat liu. 3. lett. 87. a bien

pour ceux de la Relig. 75

dit du Pape Clement huictiesme, qu'encore qu'il n'eust aucune mauuaise affection enuers le Roy, ny aucun amour vers le Roy d'Espagne, & que d'ailleurs il eust l'ame bonne, neantmoins la haine qu'il portoit à la Reyne Elisabeth, & aux autres heretiques d'Angleterre, le transportoit si auant, qu'il se laissoit eschapper de la bouche des maximes pernicieuses, & indignes de tout homme de bien; ceux-là ne doiuent pas trouuer mauuais que ie die qu'ils sont indignes qu'on les tienne pour bons François, puis que leurs imaginations,& ce zele sans science qu'ils ont pour leur Religion, est eignent en eux celuy qu'ils doiuent auoir pour la gloire de leur Pays, & pour la grandeur de leur Prince. Et toutesfois non seulement on ne les chastie pas, non seulement cette passion ne leur nuit point dans leurs affaires particulieres, s'ils ont quelque chose ou à faire ou à obtenir qui depende de l'authorité des Magistrats: mais il y en a qui les en aiment d'autant mieux, & qui les en escoutent d'autant plus volontiers, qu'à leur aduis estre bon François est vne moindre qualité que d'estre zelé Catholique. Puis donc que iusques icy nostre Roy n'a point declaré qu'il prist aucune part 76

aux affaires d'Angleterre, & qu'il laisse cette querelle de ses voisins à demesser entre ceux qui y ont interest, quel grand crime y auroit-il quand quelques-vns d'entre nous fauoriseroient de leurs sentimens interieurs l'vn de ces partis plustost que l'autre? Car qui peut ignorer que s'il y en a quelques-vns qui le font, c'est le ze-le de leur Religion, & non les considerations de l'Estat, ou la forme du gouvernement qui les y inuite? Si le bruit qui s'est espandu par tout, que le Roy de la Grand' Bretagne a eu dessein d'y changer la Religion, est faux, il n'y en a pas vn d'entre nous qui se soucie des priuileges du Parlement, ny qui ne vist fort volontiers ce Prince en toute splendeur & en toute authorité dessus son throsne. S'il est vray qu'il ait eu cette intention; comme nous auons autrefois blasmé la Ligue de ce qu'elle s'est souleuée contre le Roy Henry troisiesme, & la Sorbonne, de ce qu'elle declara que ses sujets estoient quittes du serment de fidelité, il est de la iustice & de la raison que nous blasmions pareillement les Ânglois, qui se font souleuez contre leur Souuerain, si le droit de la Royauté est en Angleterre tel qu'il est en

France. Mais c'est ce que les Anglois ne disent pas, & dequoy quant à nous nous ne iugeons pas, & nous contentons d'auoir en toutes ces choses les mouuemens & les inclinations que nostre Religion nous ordonne. Car voicy la regle generale qu'elle nous prescrit en ces matieres. Cest que d'vn costé la Religion Chrestienne n'estant pas destince à donner la forme aux gouvernemens des Empires, mais estant obligée de les laisser chacun en la constitution en laquelle elle les rencontre quand elle se plante au milieu d'eux, il est du deuoir des Chrestiens de rendre en toutes les choses qui regardent la vie ciuile, vne pleine & entiere obeissance aux loix & à la forme de l'Estat où la prouidence de Dieu les fait habiter. Et si le Souuerain Magistrat, qui a la puissance absoluë entre les mains, entreprend quelque choseau fait de la Religion, qui choque l'honneur de Iesus-Christ, & l'esperance du salut, i'ay desia dit qu'il conuient incomparablemet mieux aux Chrestiens, d'imiter les Apostres de nostre Seigneur, & ceux qui les ont suiuis immediatement, qui à la verité nous ont appris qu'il n'est pasiuste & raisonnable d'obeïr aux hom78

mes plustost qu'à Dieu, mais qui ne nous ont pourtant point laissé d'exemple d'autre resistance aux violences qu'on leur faifoit, finon celuy d'vne insurmontable patience. D'autre costé cette mesme Religion n'ostant point aux peuples libres l'v-sage de leur liberté, ny à ceux dont la sujettion est temperée de quelques droits & de quelques priuileges, la iustice de leur defense si on les veut asseruir absoluments il est encore du deuoir des mesmes Chrestiens de ne iuger point temerairement des entreprises & des actions de leurs voisins, principalement quand on ne sçait pas bien les loix sur lesquelles leur Estat ou leur Republique est fondée. Caril n'y a passeulement au monde des Monarchies, des Aristocraties, & des Democraties toutes pures, mais aussi des gouuernemens meslez. Il y en a qui sont composez en partie de Monarchie & en partie des deux autres, comme celle de Sparte autrefois. Il y en a d'autres qui sont messez en partie d'Aristocratie, & en partie de Democratie, comme Rome l'a esté long-temps. Il y en a d'autres où la Monarchie & l'Aristocratie sont iointes ensemble, comme en Polongne maintenant. Les Monar-

chies toutes pures ne le sont pas d'vne mesme façon pourtant. Car autre est celle de ce Royaume, & autre celle du Turc, & peut estre encore autre celle de l'Espagne. Et enfin il y a vne si grande varieté en la constitution des Estats, qu'à peine s'en trouuera-t'il deux qui soient entierement semblables. Il n'y a donc rien qui empesche que chacun en obeissant en conscience à la puissance souveraine, telle qu'il la trouue establie dedans son Pays, n'ait quelque liberté de jugement & d'inclinations sur les occurrences des Pays estrangers, selon la cognoissance qu'il en peut auoir, & selon qu'il s'imagine y auoir quelque espece d'interest par la conscience. Partant si telle est de tout temps la forme du gouvernement de l'Angleterre, que l'authorité royale y soit aucunement limitée & moderée par celle d'vn Parlement, vn bon François qui demeurera re-ligieusement & inuiolablement en cette pensée, de respecter la Monarchie, telle qu'elle est en ce Royaume, c'est à dire absoluë & sans limitation, ne laissera pas de iuger qu'il est iuste & raisonnable qu'en Angleterre elle soit bornée par les an-

ciennes loix de l'Estat, & que le Parlement

30

fait bien d'y vouloir ramener le Roy, s'il a veritablement trop entrepris fur les droits & libertez de son peuple: Car les plus grands & les plus absolus Monarques mesmes ont sait gloire de maintenir la liberté des Republiques populaires, & de chastier les tyrans qui les ont voulu asseruir iniustement, & comme il leur conuient tres-bien d'estre extremement laloux de leur authorité, pource qu'elle vient de Dieu, aussi est-il souuerainement digne de leur iustice & de leur grandeur, de ne permettre pas qu'aucun estende la sienne plus loin que Dieu ne luy a donnée. Et c'est ce qui a fait que nos Rois, qui pour-ce qu'ils sont absolument Souuerains en leur Royaume, n'ont pas voulu souffrir qu'il y eust aucune puissance qui arrestast tant soit peu la leur, ont neantmoins soustenu l'union des Prouinces des Pays bas contre l'Espagnol, pource qu'ils ont creu qu'il y auoit rendu sa domination plus independate & plus rigoureuse que ne souffroient les Loix du Pays, & les droits que les anciens Seigneurs des lieux y auoient laissez à leurs peuples. C'est pour la mes-me raison qu'ils ont diuerses sois entrepris la defense des privileges des villes Imperiales

riales contre l'ambition des Empereurs: c'est pour cela qu'ils ont pris Geneue en leur protection contre les pretensions du Duc de Sauoye: c'est pour cela que de fraische datte ils ont tendu la main aux Catalans, dont le Roy d'Espagne opprimoit les coustumes & les libertez : & pource qu'ils ne font rien en ces occasions, sinon selon la iustice & le droit, ils ne craignent pas que leurs sujets tirent quelque humeur de rebellion de la contagion de ces exemples. Partant tandis que les affaires de la France n'ont rien de commun auec celles d'Angleterre, il demeure en la liberté des sujets du Roy de fauoriser de leurs inclinations l'vn ou l'autre des deux partis, chacun selon que la Religion dont il fait profession, ou la cognoissance qu'il a de la nature du gouvernement de cette Isle, determineses affections. Si le Roy s'estoit declaré pour l'vn ou pour l'autre des contendans, d'autant qu'il n'est pas de la vocation des sujets de s'enquerir des volontez de leurs Souuerains, & qu'ils doiuent tenir pour bien & legitimement fait, ce qu'ils font dans leurs Conseils auec connoissance de cause, en remettant à Dieu le soin de la conservation de la Religion, il

seroit du deuoir de tous les bons François de porter leurs affections où leur Prince porteroit ses armes. Car comme nous ne pouuons souffrir que le zele de la Religion Catholique Romaine en aueugle tellement quelques-vns, qu'ils ne voyent les prosperitez de la France qu'à contrecœur, pource qu'ils s'imaginent qu'elles sont enfin pour causer du dommage à Rome: ainsi ne pouuons nous approuuer que le zele de la Religion Reformée soit si puissant en l'esprit de ceux qui en font profession, que de les rendre mescontens des bons succez des armes de sa Majesté, quand il les employe où le bien de son Estat, la iustice de la cause de ses voisins, & l'interest de ses alliez l'appelle.

SECTION III.

Que si on considere ceux de la Religion en qualité de Chrestiens, ils ne meritent l'auersion de qui que ce soit. Et premierement à l'esgard des creances qu'on leur impute contre verité.

R Este le troissessme esgard auquel on nous peut considerer, c'est à sçauoir,

entant que nous sommes Chrestiens. Et cette matiere nous doit tenir vn peu plus long-temps que les precedentes, pource que les acculations qu'on y fait contre nous sont en plus grand nombre, & qu'ait fonds c'est tout le fondement de l'auersion qu'on a pour nous. Car le reste que i'ay cy-dessus examiné, quelque apparence dont on tasche de le reuestir, n'a du tout point de realité, non pas mesme au jugement de nos plus grands ennemis, s'ils vouloient dire franchement ce qu'ils en pensent en conscience. Il nous faut donc voir ce qu'on nous accuse de croire, & que nous ne croyons pas pourtant: ce qu'on voudroit que nous creussions, mais que nous ne pouuons nous persuadet, & à cause dequoy on nous veut du mal : & renfin; ce que nous croyons effectivement, & sur quoy la pratique de nostre pieté est fondée; pour sçauoir si, comme on le pretend, nousmeritons à cette occasion la haine de Dieu & des hommes.

Pour ce qui est de ce qu'on nous accuse de croire, & que nous ne croyons nullement, ie n'en produitay que peu d'exemples seulement, dont le premier sera cette vieille accusation, que nous sommes en-

nemis des bonnes œuures, sous ombre que nous ne croyons pas qu'elles meritent deuant Dieu ,ny que ce soit par elles que nous obtenons nostre iustification en son iugement. Certainement ce que i'ay dit ey-dessus de la façon de laquelle nous viuons, & particulierement de celle de laquelle on nous exhorte continuellement à bien viure, nous absout assez de cette imputation. Car comment sommes nous ennemis des bonnes œuures, si nous exhortons sans cesse le monde à s'y estudier, & si nous essayons d'en faire resplendir toute nostre vie? Il est vray que ce n'est pas en vertu de leur merite que nous esperons obtenir la iouissance du salut; & est vray encore que quand nous nous disposons à comparoistre deuant le tribunal de Dieu, ce n'est nullement sur nos bonnes actions que nous fondons l'esperance d'estre iustifiez en sa presence. Mais de cela il ne s'enfuit pas pourtant que nous ne fassions aucune estime des bonnes actions. Nous auons accoustumé d'enseigner que la pieté enuers Dieu, & la charité que nous deuons auoir pour les hommes, sont choses si excellentes en elles mesmes, & si conuenables à la dignité de nostre nature,

que quand Dieu ne les nous auroit point plus expressement commandées que parce que la Nature nous en apprend, & quand il n'y auroit attaché ny aucune promesse de recompense, ny aucune menace de punition, si est-ce que nous deurions nous y adonner auec vne affection tres-sincere & tres-ardente. Quand donc nous aurions cette opinion que la pieté & la vertun'auroient point de certaine relation au Royaume des Cieux, & qu'elles ne porteroient auec elles aucune considerable vtilité pour nous y faire paruenir, nous en ferions pourtant plus de cas, ainsi que ne font ceux qui ne les considerent sinon entant qu'ils esperent qu'elles leur produiront quelque fruit de remuneratio. Pource que chacun peut sçauoir par sa propre experience, que les choses aus quel-les nous ne nous portons sinon entant qu'elles sont propres pour nous obtenir vne certaine fin, sont en nostre opinion moins à priser que la fin mesme. Ceux donc qui n'estiment les bonnes œuures sinon pource que Dieu les recompensera de la felicité, estiment sans doute la felicité plus qu'ils ne font les bonnes œuures : au lieu que quant à nous nous les aimons à

86

cause de leur propre dignité, & les trou-uons plus dignes de nos affections que n'est cette felicité qu'on s'y propose pour salaire. Car la felicité est ce qui nous sait heureux, & la pieté & la charité est ce qui nous fait gens de bien. Or aimer mieux estre heureux qu'homme de bien, est vne marque indubitable qu'on ne recognoist pasassez que c'est que d'estre homme de bien, ny combien se proposer de le deuenir est vn objet qui merite vne constante & vehemente application de toutes les puissances de nos ames. De plus, c'est à grand tort qu'o nous accuse de croire que les bonnes œuures n'ont point de relation au salut. Outre leur excellence naturelle, à cause de la quelle on les doit souverainement priser, l'amour que nous auons pour elles naist en grade partie en nous de celle que nous portons à nostre propre felicité. Parce que nous regardons nostresalut, ou bien come vne chose de laquelle le droit nous est desia acquis par la mort de nostre Seigneur ou comme vne chose de laquelle, bien que le droit nous en soit acquis, mous ne sommes pourtant point encore venus en iouissance. Carautre chose sans doute est le droit de posseder un jour quel-

que bien, & autre l'actuelle possession du bien mesme. Quand donc nous le considerons en cette premiere façon, nous sommes rauis en admiration de la bonté de Dieu, & de la charité inenarrable de son Fils,en ce que le Pere le nous a voulu donner, & en ce que le Fils s'est volontairement donné à nous, & s'est abandonné à la mort pour nous rachepter, & nous acquerir la vie eternelle. Or il n'est pas posfible que nous soyons rauis en admiration de ce bien-fait, ny que nous l'estimions comme il faut, que le ressentimet que nous en auons ne remplisse nos ames de dilection enuers Dieu, & d'vne amour ardente & inuiolable enuers son Vnique. Comment donc pourrions nous les aimer à cette occasion auec tant d'ardeur, sans disposer toutes les facultez de nos esprits à rendre obeissance à leurs commandemens? Y a-t'il aucun plus puissant attrait, ny aucun plus ferme lien pour nous attirer & pour nous attacher aux volontez de ceux à qui nous deuons obeïr, que celuy d'vne affection violente? Certes c'est là le mouuemet qui porte les Saints qui sont au Ciel, & qui nous portera lors que nous y serons requeillis, à mener vne vie eternellement

saincte & immaculée. Car nous n'y serons pas gens de bien afin d'obtenir le Royaume des Cieux, pource que nous l'aurons desia; ny mesmes pour le nous conseruer à perpetuité, pource qu'il n'y aura plus de perilde le perdre. Mais nous serons gens de bien , par vn merueilleusement vif & permanent sentiment d'obligation, pource que nous aurons obtenu cette incomparable felicité, par vn don qui ne fe pourra jamais reuoquer, & par vne tout à fait incomprehensible misericorde. Or ie ne pense pas qu'il y ait personne qui doine trouver maunais que nous soyons excitez à aimer Dieu par la gratitude que nous auons de son amour en nostre endroit, & par les mesmes motifs qui y induisent si puissamment les bien-heureux Sainets de Paradis, à proportion de la cognoissance qu'eux & nous auons de la charité qu'il nous a portée.

Quand nous regardons l'eternelle felicité comme une chose dont nous ne sommes pas encore en possession, le desir que nous auons d'y paruenir nous fait faire sur les bonnes œuures deux restexions principales. L'une est qu'encore que Dieu nous ait declaré par sa Parole que c'est en la seule consideration de lamort de son Fils qu'il nous promet le salut, & que nostre conscience nous tesmoigne qu'il a liuré son Fils à la mort pour nous auant que nous fissions de bonnes œuures, & qu'il pous eust pû considerer comme en ayant fait, si est-ce que cette mesme Parole, & ces mesmes mouvemens de nostre conscience nous apprennent, qu'il n'est pas raisonnable qu'il execute cette promesse enuers ceux qui par leur mescognoissance se rendront indignes de son salut. Puis que si nous en jouissions desia, & que nous vintsions à le mécognoiltre, il seroit juste qu'il le nous ostast, il est iuste pareillement qu'il ne le nous donne pas, si nous nous monstrons ingrats à la faueur qu'il nous a faite de nous en donner le droict par la grace de ses promesses. Cependant toute nostre recognoissance gist en amour & en respect, & les preuues indubitables de l'amour & du respect consistent en l'obeissance aux commandemens de Dieu, & en l'exercice des bonnes œuures. Ainsi nous nous y appliquons, non pas comme à des moyens par lesquels nous puissions obtenir le droict de paruenir au falut; car nous l'auons desia en la mort de Nostre Sei90

gneur Iesus, à laquelle Dieu nous a donné de croire: mais comme à des choses dont le mespris nous en feroit déchoir, & empescheroit l'execution des promesses que Dieu nous en a données: Telles font donc nos inclinations en cét égard que doiuent estre celle des bons enfans, & qui ne doiuent pas estre blasmées en nous, puis qu'en eux on les estime louables. Ils ne sont pas enfans, pource qu'ils sont honnestes gens, & dans l'obeissance qu'ils rendent à leurs peresilsne se proposent nullement pour but l'acquisition du droiet de leur heredité. Ils sont enfans pource que leurs peres les ont engendrez, & ont le droict de venir quelque iour à leur heredité, d'autant qu'ils sont leurs enfans, & que telle est la disposition des loix, & l'institution de la Nature. Si donc quand ils deuiennent honestes gens puis apres, ils y font quelque consideration de l'esperance de l'heredité, c'est afin seulement que leurs débauches, & leurs mauuais comportemens ne portent pas l'indignation de leurs peres à les priuer du droiet de succeder à leurs biens, lequel leur auoit esté acquis par la naissance. Il est bien vray que nous ne sommes pas enfans de Dieu de nostre narure, & ne le deuenons sinon par la grace de l'adoption. Mais comme les enfans ont à leurs peres toute l'obligation de ce qu'ils les ont engendrez, nous auons pareillement à Dieu toute l'obligation de ce qu'il nous a adoptez. Et comme l'honneur qu'il luy a pleu de nous faire de nous adopter en son vnique, nous donne le mesme droit à l'heritage celeste, que la naissance don-ne aux enfans pour l'heredité de leurs parens; la grace de l'Esprit qui accompagne cette adoption engendre en nous les mesmes affections que la nature produit dans les bons enfans, lors qu'il s'agist de l'obeissance & du respect qu'il faut qu'ils portent'à leurs peres. L'autre reflexion est, que de toutes les choses que Dieu'aime, il n'en aime aucune à l'efgal de la sainteté; & toutes les autres qu'il aime, il ne les aime sinon autant qu'elles en sont participantes, ou qu'elles y peuuent seruir. Et la raison en est que de toutes les choses ausquelles il a mis quelque emprainte de sa diuinité, il n'y en a aucune autre qu'elle qui la represente à l'esgard de ce qu'elle possede de plus venerable & de plus glorieux. Toutes choses, en ce qu'elles sont, portent quelque ressemblance de son exi-

stence. Les vents & les tremblemens de terre, & la puissance des flots de la mer, ont quelque ombre de sa vertu. La fermeté des rochers, la durée des elemens, & l'incorruptibilité des cieux, semblent estre vn crayon obscur de l'immutabilité de son essence. Dans la gloire & dans l'authorité des Monarques il a rendu visible en laterre quelque rayon de sa Majesté, Mais quant à sa pureté, à sa iustice, à sa misericorde, & à la bonté inenarrable de ses inclinatios & de ses pensées, en quoy consiste sans contredit la plus belle merueille de son estre, & le couronnement de ses autres proprietez, il n'y a que la saincteté do la creature intelligente & raisonnable en qui on en voye la resplendeur. A raiso dequoy aussi il n'y a qu'elle proprement qui soit dite auoir esté faite à son image. Quat à nous, il nous a aimez à la verité des auant que nous fussions saincts; mais c'a esté pour nous rendresainces, qu'il a déployé dessus nous ses admirables misericordes; car il nous a racheptez pour nous amener à la sanctification, & pour reparer en nous la ressemblance de ses vertus, dont le peché auoit gasté tous les traits & tous les lineamens en nos ames. Mais depuis

qu'il nous a sanctifiez, il nous aime à cette occasion, & ne peut contempler en nous cette belle idée de sa diuinité, qu'il ne nous affectionne merueilleusement à cause d'elle. Comme les bons peres aiment sans doute leurs enfans auant qu'ils voyent paroistre en eux aucune lumiere de vertu: mais leurs affections se redoublent à mesure qu'ils apperçoiuent qu'en croissant ils se forment peu à peu par leur education, & s'auancent de jour en jour en l'amour des choses louables. Or est-ce l'inclination naturelle de l'amour que de bien faire à ce que l'on aime; & comme dans les choses pesantes à peine sçauroit-on distinguer entre la pesanteur & la propension au mouuement contre-bas, l'amour & l'inclination à vouloir & à faire du bien, quad on en a le moyen, ou ne font qu'vne mesme chose absolument', ou si elles en sont deux, elles font inseparables. De sorte qu'il ne se peut faire que Dieu nous embrassant de ses affections à cause de l'image de sa saincteté qui reluit en nous, il ne nous vueille faire du bien : & puis estant puissant comme il est, il ne le veut point de la façon, qu'indubitablement il ne le fasse. Nostre saincteré donc, & les bonnes 94

œuures qui en dependent ne nous acquie-rent pas le droict de la jouissance de la felicité, puis que Dieu le nous a donné gratuitement lors qu'ils nous a adoptez pour estre du nombre de ses enfans : mais elles attirent ses affections, comme celles d'vn bon pere, pour executer par inclination d'amour enuers nostre sanctification, les promesses qu'il nous auoit dessa faites de pure gratification, & à l'accomplissement desquelles il estoit desia porté comme fidele & veritable. Ainsi plus nous sommes gens de bien, plus deuons nous estre persuadez que Dieu nous aime cordialements & plus nous sommes asseurez que nous fommes aimez de luy, plus auons nous de certitude de ses fauorables inclinations à nous donner la joüissance de son Royaume. Comme au reciproque plus nous defirons ardemment cette immortelle felicité, plus soigneusement cherchons nous les moyens de nous persuader fermement que nous l'obtiendrons. Puis donc que l'asseurance de la dilection de Dieu enuers nous en est vn indubitable argument, & que nostre sanctification produit cette dilection à proportion de ce qu'elle est grande & lumineuse, & qu'elle represente excellemment la saincteté laquelle est en Dieu, il n'y a personne qui ne comprenne aisément qu'autant que nous auons de soin de nostre salut, autant faut-il necessairement que nous soyons embrasez de l'amour des bonnes œuures. Et neantmoins pour tout cela nous ne croyons nullement ny que nous soyons iustifiez à cause d'elles deuant Dieu, ny qu'elles soient aucunement meritoires de son Royaume; & cela ne doit sembler estrange à qui que ce soit, puis que nostre conscience ne nous permet pas de nous persuader l'vn, & que nostre modestie nous oblige à essoigner de nous toute opinion de l'autre. Ie dis premierement que nostre conscience ne nous permet pas de nous figurer que nous puissions estre iustifiez deuant Dieu par le moyen de nos bonnes actions; car estre iustifié deuant Dieu, c'est estre absous en son iugement. Or nous sçauons que si Dieu nous examine tant soit peu rigoureusement par nos œuures, ils ne trouuera nul-lement le sujet de prononcer pour nous sentence d'absolution. Pource qu'auant que nous fussions venus à sa cognoissance, nous pechions continuellement contre luy: ce qui aggrauoit iournellement la

malediction dans laquelle nous sommes naturellement par la corruption originelle. Tellement qu'à l'esgard de tout ce temps-là nous ne pouuons pretendre autre iustification qu'en la remission de nos pechez. Depuis que nous le cognoissons; quelques bonnes œuures que nous ayons faites, nous en auons tant fait de mauuaises, & il y a tant de deffauts mesmes dans les bonnes dont nous nous vantons, que si nous presumions d'estre iustifiez de cette façon, nous nous trouuerions trop esloignez de nos esperances. S'il y en a quelques-vns entre les Catholiques Romains qui ayent cette bonne opinion d'eux-mesmes, qu'ils n'ayent iamais commis de peché, & qu'ils ne pechent du tout point encor, c'est à eux à aduiser comment ils soustiendront quelque iour vne proposition si hardie deuant le throsne de Dieu, & comment ils la pourront accorder auec leur propre Patenostre. Pour nous, nous aimons mieux nous confesser pecheurs deuant nostre Seigneur, & auoir à sa misericorde toute l'obligation de nostre salut, que de nous mettre en vn inéuitable peril de remporter vne eternelle confusion de sa presence. Et veritablement ie ne puis que

que ie ne me plaigne icy du peu d'equité de ceux qui nous ha issent à cause de cette creance. Nostre conscience nous rend témoignage de nostre fidelité enuers nos Roys; & l'Escriture & l'experience conuainquent vniuersellement tout le monde d'vne infinité de pechez commis contre Dieu. S'il est arriué à nos peres & à nous de faire quelque chose qui ait dépleu à nos Souuerains, ce n'a point esté par faute d'affection à leurs personnes, ny de respect à leur authorité, mais par des mouuemens qu'ils ont eux-mesmes excusez; au lieu que les pechez que tous les hommes commettent en si grand nombre, procedent de l'affection de la chair, qui est inimitié contre Dieu. Hors ces actions ausquelles ou la souffrance, ou la crainte de la persecution nous a portez trois ou quatre fois seulement, on ne sçauroit nous oster cette loüange que nous n'ayons rendu quelques bons seruices à l'Estat, & que nous n'ayons vescu conformément à ses loix: au lieu que tous les iours tous les hommes pechent contre Dieu, & transgressent ses commandemens en mille & mille rencontres. Et neantmoins par tout où on parle de nous dans les Escrits politiques &

dans les productions du temps, on n'entendrien autre choie que ces mots de fa-Etion, de rebellion, de renolie; au lieu que dans les liures de Theologie, ou il est question de Dieu, on ne parle que de bonnes œuures & de satisfactions. Si nous nous estions vantez de pouuoir soustenir nos actions deuant le Conseil de nos Roys contre ceux qui les flestrissent de cestitres si odieux, & de n'auoir besoin d'autre chose que de leur iustice pour en estre iustifiez, on nous accuseroit de presomption & de quelque espece d'impudence, pour ne recognoistre pas assez combien nous auons eu besoin de leur support au lieu qu'en la controuerse de la iustification des hommes deuant Dieu, ils ne parlent que de leurs propres iustices, & s'appuyent dessus elles pour comparoistre en son iugement. Bien que, comme ie l'ay dit, nous soyons originaires du pays, & nez sujets de nostre Prince, nos ennemis disent pourtant que nous ne subsistons en ce Royaume que de sa grace seulement, pource que par nos fautes, qu'ils veulent estre si criminelles, nous aurions merité d'en estre expulsez: & cependant, bien que les hommes soient naturellement estrangers du Royaume des Cieux, & que tous les iours ils commettent quelque chose qui les en deuroit rendre indignes, on veut pourtant qu'il leur soit donné envertu de leurs iustices, & comme vne recompense deuë à leurs bones actions. Certes ou bien qu'ils ne nous fassent pas si criminels de-uant nos Roys, ou bien qu'ils confessent qu'ils ne le sont pas moins enuers Dieu; & s'ils veulent que nous recognoissions que c'est de la pure bonté de nos Souuerains que nous subsistons en cét Estat auec la liberte dont nous y jouissons, qu'ils ne fassent point aussi de leur costé difficulté de confesser que s'ils jouissent quelque iour de la felicité du Ciel, ce sera de pure misericorde. I'ay dit que nostre modestie nous dessend de croire que nos œuures puissent meriter le salut. En essect, nous voyons que les peres ne peuvent soussirir que leurs enfans se glorissent en leur presence qu'ils leur soient redeuables de quoy que ce soit. Or nous sommes enfans de Dieu, & nous luy auons fans doute plus d'obligation que nous n'en pouvons avoir à ceux qui nous ont engendrez. Et nous voyons que les Princes ne peuuent non plus endurer que leurs sujets appellent ce

G ij

qu'ils font pour eux autrement que du nom de seruice auquel la naissance les oblige. Or nous sommes beaucoup moins à l'esgard de Dieu, que les sujets ne sont à l'esgard des Princes. Et enfin, nous voyons que les Cardinaux mesmes, dont la dignité est si eminente, se recognoissent tellement inferieurs à ceux de qui ils sont nez sujets, qu'ils ne croyent pas que leurs seruices puissent iamais égaler leurs obligations, ny les en acquitter enuers eux, notamment quand à leur faueur & par leur recommandation ils ont esté esseuez à ce degré si prochain de la Majesté Pontificale. Car de cette modeste recognoissance de l'insuffisance de leurs actions à recognoistre ce bien-fait, nous auons des preuues tres-belles & tres-expresses dans les lettres des Cardinaux d'Ossat & du Perron au Roy Henry le Grand de glorieuse memoire. Or s'ils le disent en sincerité, nous auons beaucoup plus de sujet d'estre humbles en comparoissant deuant Dieu, qu'ils n'ont d'estre modestes enuers les hommes. S'ils le disent seulement par compliment, quant à nous nous estimons qu'on nous peut bien souffrir parler ainsi à Dieu en verité, & nous sentir effe-

ctiuement autant & plus tenus à sa bonté,qu'ils ont fait semblant de l'estre à celle de leur Prince. Si, dis-je, ils ont pensé qu'ils pouuoient bien telmoigner la gratitude de leurs esprits aux grands Roys par des paroles excessiues, & qui surpassent la mesure de leurs gratifications, nous croyons qu'on ne nous doit point vouloir de mal si nous estimons que la Maiesté du Roy des Roys, de qui tous les Roys mesmes & les Papes sont nez suiets, & la grandeur de ses biens-faits en nostre endroit, excedent beaucoup tout ce que les hommes peuuent ou faire ou dire pour en representer le ressentiment, & qu'elles sont bien loin au delà de toutes leurs ciuilitez & de toutes leurs hyperboles. En vn mot, on ne peut trouuer estrange que nous suivions cette belle maxime du Cardinal Bellarmin, qui apres auoir longtemps disputé de l'estime des bonnes actions, & du moyen d'obtenir la iustification, pose pour chose decisiue, liu. s. de Iustif. chap, 7 qu'à cause de l'incertitude de nostre propre instice, & du peril de vaine gloire, dans lequel on pourroit tomber, c'est le plus seur en toute maniere de mettre toute sa fiance en la seule misericorde & benignité de Dieu. Car qui nous pourroit blafmer de nous tenir au plus certain,& de ne vouloir rien hazarder en chose de telle

importance?

Ce que ie viens de dire des bonnes œuures, & de l'estime que nous en faisons, pourroit satisfaire à cette autre imputation, que nous croyons la predestination de telle sorte, que quelque chose que l'on fasse, soit que l'on croye en Iesus-Christ, ou qu'on n'y croye pas, soit qu'on fasse de bonnes œuures, ou bien qu'on n'en fasse pas, on ne laissera pas d'estre sauue, si on est predestiné pour cela, ou de tomber en damnation, si par la reprobation on est destiné à mort eternelle. Car il y en a qui ne font point de difficulté de nous accuser d'enseigner ce dogme hautement, & c'est vn des moyens qu'on employe dans les predications pour rendre nostre profession odieuse. Certainement puis que nous croyons les bonnes œuures absolument necessaires à salut, de quelque façon que nous estimions que nous sommes predestinez, nostre creance est que nostre predestination ne nous amenera pas à salut sans les bonnes œuures. Neantmoins afin d'ofter tout scrupule de l'es-

prit de ceux qui voudront s'en éclaircir, voyons s'il y peut auoir rien de plus raisonnable que nostre doctrine & nostre pratique en cette matiere. Quand on nous presche l'Euangile pour nous offrir le saluren lesus-Christ, on ne manque iamais de nous dire qu'il n'y a pas moyen d'en estre effectivement participant sinon en croyant en ce Redempteur. Alors nous ne nous enquerons nullement si nous sommes predestinez ou non se ne nous mettons nullement en peine des secrets de Dieu, ny des Arrests qu'il a donnez de toute eternité pour le salut & pour la condamnation des hommes. Nous nous dis posons seulement à croire en celuy qui nous est offert pour Sauneur, puis que quelle que soit la Predestination de Dieu, il est impossible d'estre participant du salut dont il est autheur, sinon en l'embrassant par vne foy viue & profonde. On ne peut donc pas dire que nous ayons cette creance, quesoit qu'on croye, soit qu'on ne croye pas, on sera fauue pourueu qu'on y soit predestiné, puis que nous tenons qu'absolument il n'y a point de salut en Iesus-Christ sinon pour ceux qui croyent. Apres cela, lors qu'on nous pres-

G iiij

104

che qu'il faut croire, on ne manque iamais de nous expliquer nettement quelle doit estre cette foy, & de nous dire qu'il est necessaire qu'elle soit accompagnée d'vne serieuse repentance. Car faire seulement profession exterieure du Christianisme, n'est pas croire, selon nous: non pas mesmes auoir en l'entendement quelque legere telhture de la verité de ses dogmes. Croire en nostre Theologie, est estre si viuement & si profondement persuadé des veritez de l'Éuangile de Iesus Christ, que cette persuasion maistrise toutes les autres, & qu'elle fasse telle impression dedans les volontez & les affections, qu'elle les détourne de leurs mauuaises inclinations; & qu'elle les regenere. Alors nous ne pensons point encore à la predestination, & ne nous enquerons nullement de ce que Dieu peut auoir ordonné de toute éternité pour nous, ny pour le reste des autres hommes. Nous examinons seulement nos consciences pour fçauoir si nous croyons de la façon, & nous disposons à ne nous y abuser pas, de peur qu'au lieu de la verité & de la solidité de la foy flinous n'en ayons embrassé que l'ombres Partantsquelle pour ceux de la Relig. 10

que soit ou la predestination ou la reprobation, nous croyons que la foy non seu-lement est necessaire à salut, mais vne foy qui se characterise nettement, & qui se distingue de la vaine imagination de la foy par vne sincere & ardente affection aux bonnes œuures. De plus, lors qu'on nous presche qu'il faut croire de la façon, on ne manque iamais d'y adjouster qu'il faut perseuerer en cette foy, & dans les bonnes œuures qui la marquent & qui l'accompa-gnent. Pource que le salut n'est pas promis à ceux qui croiront simplement, mais qui perseuereront en la soy & en la sanctification, & qui demeureront victorieux iusques à la fin de toutes les tentations qui les attaquent. Et alors encore nous n'estimons pas qu'il soit necessaire de penser à la predestination; seulement resueillons nous nos entendemens à cet aduertissement, & autant que nous pouuons nous nous excitons nous mesmes à receuoir l'impression de l'Euangile bien auant, pour estre capables de resister, en cas que quelque tentation nous assaille. Ainsi nous croyons encore que la perseuerance est necessaire, quelle que soit la predestination, & quels que puissent estre sur cette

matiereles sentimens des Docteurs de nostre communion, tant y a que rien n'est capable d'arracher certe persuasion de nos consciences. Enfin, on ne nous exhorte point à la perseuerance qu'on ne nous enfeigne quant& quant quels sont les moyes de l'obtenir. Car quant à la foy, pource qu'elle consiste en la cognoissance & en la persuasion des veritez Euangeliques; on nous dit que le moyen de la conseruer est de lire & d'escouter; & de mediter soigneusement la parole de Dieu, quilla premierementengendrée. Quant à la sanctification, d'autant qu'elle consiste en la haine du vice & en l'amour de la vertu, & que ces auersions & ces affections se conseruent par l'attentiue considerations de la nature de leurs objets, par l'accoustumance de faire les choses bonnes, & de s'abstenir des mauuaises, par l'imitation des bons exemples, par esuiter les vicieuses conuersations, par la crainte de la peine qui suit le peché, par l'esperance de la remuneration que Dieu a misericordieusement promise aux bonnes œuures; & sur tout par la contemplatió de la Croix de Christ & de sa Resurrection, dont l'une nous fournit le modele de la mortification de

pour ceux de la Relig. 107

nos affections, & l'autre le patron & le motif de ressusciter en nouvelle vie, on nous met continuellement toutes ces choses deuant les yeux, pour fomenter en nous la saincteté que nostre conuersion à Christ y a commencée. A quoy on ne manque iamais d'adjouster que la foy & la sanctification venant de Dieu, c'est à luy qu'il se faut addresser pour obtenir la grace par la vertu de laquelle elles soient conseruées en nous, & de nous exhorter à cette occasion de veiller auec assiduité à la priere. Et afin de nous y exciter d'autant plus viuement, on nous aduertit que nous auons à faire à vne infinité d'ennemis, qui nous obligent à vne fouueraine vigilance de nostre part, & qui nous rendent vne particuliere assistance de la grace de Dieu necessaire. Le peché que nous portons naturellement en nos assections, le monde qui nous amorce par ses voluptez, ou qui nous estonne par ses persecutions; le malin qui nous dresse mille pieges, & qui nous attaque de mille tentations, nous sont perpetuellement ramenteus, afin que nous nous tenions sur nos gardes. Là nous ne pensons point encore à la Predestination, & quelle qu'elle soit,

nous taschons d'esueiller toutes les puissances de nos esprits, & pour embrasser toutes les occasions de nous auancer en la pieté & en la verru, & pour fuïr toutes celles qui sont capables de nous en destourner, & pour demander à nostre Seigneur qu'il nous donne le pouvoir de le faires Pour quoy donc nous accuse-t'on de croire que la Predestination est si puissante en ce qui est du salut & de la condamnation, quesans auoir esgard ny à bien ny à mal elle y fait tout toute seule? Il est bien vray certes premierement, que nous sommes asseurez qu'en vertu de cette predestination nous obtiendrons indubitablement lavie eternelle. Mais pour ce qui est de la creance de la Predestination, puis que c'est vn poinct de la Foy, que S. Paul enseigne tres-ouuertement, où il faut renoncer au nom de Chrestien, où il faut aduouer qu'il y en a vne. A la verité la maniere de l'interpreter est differente entre les Catholic ques Romains & les Reformez. Mais cela nedoit pas estre trouué fort merueilleux, puis que les Catholiques ne s'en accordent pas absolument entr'eux mesmes. Tant y a qu'il y a vne predestination de quelquesvns à salut, & que pour estre bon Chrepour ceux de la Relig. 109

stien il le faut ainsi croire. Or puis qu'il y en a vne, on ne doit point trouuer mauuais que nous nous estimions estre du nombre de ceux qui sont predestinez, puis que nous trouuens en nous les marques & les effets par lesquels la Predestination se reuele. Car puis que nous croyons en Iefus-Christ, & que nous nous adonnons tant que nous pouvons aux œuures de sanctification, & que l'experience nous fait voir que beaucoup d'autres n'y croyét pas, & qu'ils se laissent emporter au peché à l'abandon, il faut necessairement ou que cette difference vienne de nous, ou que Dieu nous ait fait en cela quelque grace, laquelle il n'a pas faite aux autres. Or est-ce là où on commence à nous parler de la Predestination, lors qu'il est question de sçauoir d'où vient cette difference. Car on nous enseigne que de nature nous ne sommes pas meilleurs que les autres, & par consequent, puis que nous croyos, & que tant d'autres ne croyet pas, il faut que Dieu nous ait traittez inegalement. Et cette inegalité consiste en ce que Dieu nous ayant presenté exterieurement à tous vn commun Redempteur par la predication, & nous ayant fait

exhorter les vns & les autres à le receuoir auec foy & repentance, il s'est contenté de cette grace commune & exterieure enuers ceux-là, au lieu qu'enuers nous il en a desployé vne interieure & particuliere. Doù est venu qu'au lieu que les autres ont par leur malice reietté le Redempteur qui leur a esté offert, nous lauons quant à nous receu par la grace que Dieu nous a faite. Pour ce donc que Dieu ne prend pas les conseils de ce qu'il doit faire de iour à iour, & que comme dit l'Escriture, de tout temps toutes ses œuures luy sont cognuës, il faut necessairement que de toute eternité il ait ordonné de mette cette distinction entre les autres & nous, & c'est en cette eternelle ordonnance que la Predestination consiste. Iusques là il n'est pas possible que no-stre creance choque l'esprit de personne qui soit tant soit peu raisonnable. Car quoy? Trouuera-t'on mattuais que nous donnions à Dieu toute la louange de ce que nous croyons, & de ce que nous nous repentons de nos pechez, au lieu que les autres s'endurcissent en leur incredulité & en leur impenitence? Certes ce seroit estre trop presomptueux que de vouloir rauir cette gloire à Dieu pour se l'attribuer à soy-mesme. Ceux de l'Eglise Romaine mesmes, sur cette presupposition qu'ils sont dans la voye de salut, & que nous n'y sommes pas, rendent sans doute graces à Dieu de ce qu'il les y a mis plûtost que nous, & ainsi rendent tesmoignage à cette maxime de nostre profession, que c'est la misericorde de Dieu qui met cette distinction entre les hommes. Ou bien se scandalisera-t'on de ce que nous disons que ce que Dieu execute maintenant en nous, il l'a ordonné de toute eternité? Ce seroit aller contre la parole de Dieu & contre la raison, & rauir à Dieu la louange de sa prescience. Ou finalement estimera-t'on que cette doctrine nous rende plus nonchalans en ce qui est de nostre salut? Nullement. Car puis que tandis qu'on nous exhorte à la foy, à la repentance, à la sanctification, ny nous ne pensons point à la predestination, ny on ne nous donné point d'occasion d'y penser, elle ne peut trauerser l'esficace des exhortations qu'on nous addresse. Quand nous venons à y penser, puis que nous ne cognoissons nostre predestination que par ses effets, & que ses effets consistent en soy & en sanctification, à mesure que nous desirons d'estre du nombre des predestinez, à mesme mesure faut-il que nous taschions d'auoir la foy & la sanctification, qui en sont les seules marques. Enfin, quand nous les auons trouuées en nous, & que par ce moyen nous auons cognu que nous fommes predestinez, tant s'en faut que nous en prenions occasion de relascher quelque chose de l'ardeur que nous deuons auoir à la pieté, qu'au contraire, plus la grace de Dieu a esté speciale en nostre endroit, plus nous en sentons nous obligez de luy en rendre nos recognoissances. Pour ce qui est de cette persuasion que nous auons d'obtenir asseurément le salut en vertu de cette predestination, voicy comment on nous en instruit: On nous dit que puis que les hommes sont naturellemet aussi mauuais les vns que les autres, ce que Dieu nous a fait vne grace si particuliere, ne vient pas de quelque merite qui sust en nous. Il faut que ce soit de sa pure & libre volonté, & d'vne faueur speciale qu'il nous a portée, sans que nous l'y ayons inuité, qu'il nous ait ainsi gratissez. Et le Cardinal Bellarmin est entierement de ce sentiment, & ne veut pas que l'election & la predestination de quelques-vns soit fondée fondée sur aucune preuision ou prescience de leurs œuures. Ce qui nous donne occasion de raisonner de cette façon. Puis que Dieu n'a point eu d'autre motif que sa pure volonté qui l'ait induit à nous auantager plus que les autres en cet esgard, il n'y peut auoir de raison pourquoy il ne nous conserue pas la foy, laquelle il nous a donnée. Pourquoy changeroit-il d'aduis en vne chosedont la resolution n'a point dependu d'ailleurs que de son bon plaisir seulement? De plus, la soy & la repentance sont des qualitez souveraine-ment belles en elles mesmes, & capables à merueille d'attirer ses affections. Si donc il nous a tant aimez que de les nous vouloir communiquer du temps que nous ne les auions pas, comment ne nous aimeroit-il point apres qu'il nous les a communiquées? Et si l'amour qu'il nous a porté auant qu'il y eust rien en nous qui l'y inuitait, l'a peu exciter à nous orner de si excellentes qualitez, son amour, qui s'est redoublé depuis qu'il les à veuës en nous, ne le porteroit-il point à les conseruer apres les y auoir mises? Enfin il ne nous les a données qu'afin de nous conduire à salut: Car lesalut est la fin, la foy 114 Apologie

est le moyen par lequel il nous y amene. Puis donc qu'il s'est proposé cette sin là premierement, & qu'il a eu si fort à cœur de nous y faire paruenir que de nous en donner de tels & de si certains moyens, qui est-ce qui peut interuenir qui l'empesche de se proposer tousiours le mesme but, & par consequent d'employer aussi toûjours les moyens qui nous y conduisent? Sur ces raisonnemens qui sont tirez de la parole de Dieu, & que diuers beaux passages authorisent, nous fondons cette esperance, qu'asseurément Dieu nous sauuera, & qu'il nese presentera aucun obstacle à l'accomplissement de ce beau dessein, qu'il ne surmonte. Or comme chacun peut voir que ces raisonnemens tournent à la gloire de la sagesse & de la bonté de Dieu, & qu'ils conviennent merueilleusemet bien à la fermeté inuariable de sa nature & de fes confeils, aussi ne peut on pas dire qu'ils nous rendent negligens en ce qui est des choses qui sont necessaires pour nostre salut. Et ie m'émerueille, ou qu'on se le puisse imaginer, ou qu'on nous le puisse re-procher, veu qu'en l'Eglise Romaine on a des creances à qui on pourroit imputer de semblables consequences. Le Pape croit

qu'il ne peut errer dans les matieres de la foy. Ceux qui sont des sentimens de la Sorbonne attribuent cette prerogatiue au Concile. Soit au Concile, soit au Pape qu'appartiennent le privilege de l'infallibilité, tant y a que tous ceux de cette communion tiennent constamment qu'il a esté donné à l'Eglise. Si cela est, c'est vne certaine predestination de Dieu, par laquelleil a ordonné de preseruer son Eglise de toute erreur en la foy, & de l'illuminer eternellement de la cognoissance de sa verité. Quand donc il est question de vuider quelque controuerse en la Religion, cette creance rend-elle les Papes ou les Conciles, moins diligens à bien examiner la Parole de Dieu, & la tradition des anciens, & à se bien garder de la finessede Satan, & de la sophisterie des heretiques? On y croit que l'Église est imperissable, & que Dieu la garantira de ses ennemis iusques à la fin. Cela vient encore sans doute de quelque predestination de Dieu, qui a resolu de mener la Nasselle qu'ils appellent de S. Pierre, à bon port, & de la sauuer de tous naufrages. Cette creance donc empesche-t'elle que ceux qui sont au gouuernail n'employent toutes fortes de moyens propres pour sa conservation; ou imprime-t'elle en leur esprit vne si profonde securité, qu'ils ne se mettent point en peine du falut de leur vaisseau, & qu'ils le laissent aller à l'abandon entre les bancs & contre les roches? Comme donc ils ne considerent pas cette predestination de Dieu à l'esgard de l'intallibilité de l'Eglise, & de son indesectibilité, comme on parle, ainsi qu'vne occasion de securité & de negligence en ce qui regarde l'employ des moyens, mais seulement comme vn accouragement à les employer & soigneusement & ioyeusement, auec vne esperance indubitable d'vn auantageux succez; ainsi ne considerons nous nullement cette predestination en ce qui est de nostre salut, comme vn sujet de nous y comporter nonchalamment, mais plustost comme vn motif d'y trauailler auec grand foin & grande confolation auffi, sçachant qu'il en reuffira vn euenement fauorable. Autre donc est la predestination par laquelle Dieu a resolu de produire luy-mesme quelque euenement sans l'entremise d'aucuns moyens, ou au moins par l'entremise de certains moyens fur lesquels il ne nous donne point de

pour ceux de la Relig.

117 commandemens: & autre la predestination qu'il n'execute que par le moyen de nos actions, dont il nous a luy-mesme donné les commandemens & les regles. Là nous pouuons bien demeurer les bras croisez, & attendre pour exemple que l'e-clipse du Soleil, ou arriue, ou se passe, sans y rien contribuer de nostre part. Car ny nostre mouuement, ny nostre repos ne la hasteront, ny la retarderont pas d'vne minute. Icy c'est vne pure frenesie que de negliger de faire ce qui nous y est commandé, & neantmoins en esperer l'accomplissement, puis que cette sorte de predestination ne s'accomplit point sinon par l'execution des commandemens que Dieu nous y donne. Partant comme le mespris des moyens qui empesche l'euenement, est vne preuue indubitable qu'il n'auoit point esté preordonné; ainsi le legitime employ des moyens est vn certain argument de la predestination de l'euenement mesme. Et comme celuy qui se croit predestiné à viure, & neantmoins ne veut pas manger, est à demy furieux; ce-luy qui mange & qui boit, & qui fait les fonctions d'vn homme viuant, s'il ne croit auoir esté predestiné à viure par ce moyen

H iij

là, n'a pas la ceruelle en bonne assiette.

Le troisiesme exemple sera pris de co qu'on nous impute de ne croire pas le françarbitre, & parce moyen de dépouiller l'homme de sa nature, d'oster à ses actions la qualité de bonnes & de mauuaises, & de donner ainsi matiere d'accuser Dieu d'impertinence quand il les remunere, & d'injustice quand il les punit-Pource que ce qui n'est ny bon ny mauuais, ne peut estre vn sujet capable de louange, ny de blasme, de supplice ny de remuneration. Certainement, si nous enseignions tout cela disertement, ce seroit non seulement vn grand erreur en la Religion, mais vne doctrine pernicieuse à la vie ciuile. Car ce seroit autant que si nous ostions la difference qui est naturellement entre le vice & la vertu; ce qui sans doute apporteroit vne horrible confusion aux choses du monde. Mais iusques icy aucun n'a esté si peu soigneux de la reputation de sa pudeur, que d'oser nous en accuser; seulement on dit que ce que nous enseignons en la matiere du franc-arbitre, tire necessairement ces mauuaises doctrines en consequence. Or quand ainsi seroit, il ne seroit pourtant pas raisonnable de nous imputer

II9 ous

les consequences de nos dogmes, si nous ne les recognoissons & ne les aduoisons pas; car il y a peu d'erreurs dont on ne puisse tirer de fort dangereuses conclufions, si on veut vn peu subtilement raisonner; & il y a fort peu de gens qui ne tiennent quelques-vnes de ces erreurs dont vn subtil raisonnement peut deduire des conclusions pernicieuses. De sorte qu'il n'y auroit quasi homme au monde qui ne deust & haïr son prochain, & estre hay reciproquement de luy, si nous voulions suiure trop loin les consequéces des opinions les vns des autres. Il suffit donc que nous rejettions celles qu'on veut tirer de nos sentimens, & que ce que nous croyons en cette matiere, ne produise aucun mauuais effet au prejudice de la Religion, ny au dommage de la vie ciuile. Or que nostre creance ne produise rien de tel, c'est chose claire par l'experience; car elle ne peut gaster la pieté ny les mœurs de ceux qui ont des opinions contraires aux nostres, puis qu'ils ont & les consequences & les principes dont ils estiment qu'elles naissent en abominatió & en horreur. Et quant à nous, tant s'en faut qu'elles soient pour corrompre nos inclinations, & pour esteindre

H iiij

en nos esprits l'amour & l'estime de la vertu, que nous les auons encore en plus grande horreur que nos aduersaires, que nous soustenons qu'elles ne decoulent nullement de nostre doctrine, & que de ces mesmes principes dont quelques-vns essayent de deduire ces damnables conclusions, nous faisons sortir des enseignemens tres-efficacieux, & des exhortationstres-viues pour induire les hommes à la pieté. En effet, quoy que l'on die de nos sentimens en cette matiere, tant y a qu'en nos actions nous ne pretendons pas estre comme destroncs de bois, ou comme des pierres, dont le mouuement naturel de haut en bas, ne peut nullement estre compté entre les choses moralement bonnes ou mauuaises. Nous auons des sens exterieurs, par lesquels nous cognoissons les objets qui se presentent deuant nous, & des appetits interieurs qui nous portent vers ces objets, ou bien qui nous en retirent, apres que nous les auons cognus dignes de nostre auersion ou de nostre agréement. Nous ne pretendons pas mesmes agir à la façon des animaux destituez de la raison, dont tous les mouuemens & les appetits sont

pour ceux de la Relig.

12,1

brutes, quoy qu'ils procedent de quelque cognoissance des objets exterieurs, autant que les sens & la faculté de l'imagination leur en donne. Pource que cette cognoissance qui naist des sens exterieurs & de l'imagination seulement, ne peut pasatteindre iusques au discernement des qualitez & des circonstances qui font que les actions sont morales, c'est à dire, bonnes ou mauuaises, & dignes de peine ou de remuneration. Nous auons tous par la grace de Dieu la raison & l'intelligence, faculté naturellement capable de iuger des relations qui donnent aux actions humaines la qualité de vice ou de vertu. Et comme ainsi soit que c'est le propre de l'intelligence, de ne tirer pas ses actions à coup perdu, mais de s'y proposer vne certaine fin, comme vn blanc où elle vise, & que toutes les fins que nous pouuons nous proposer sont ou dans l'honnesteté des choses louables, ou dans le contentement qui naist des choses delectables, ou dans l'vtilité de celles qui peuuent profiter, nous ne faisons aucune action auec intelligence, que nous ne nous mettions deuant les yeux quelqu'vne de ces trois fins. De plus, toute intelligence qui se 122

propose vne certaine fin, ayant encore ce propre de la Nature de juger des moyens qui sont bons pour y paruenir, & quand il s'en presente plusieurs, de faire le choix de ceux qu'elle estime les meilleurs, & de les preferer aux autres, nous ne nous propofons iamais de telles fins en nos actions, que nous ne consultions pareillement sur les moyens, & que de cette consultation nous ne formions la resolution d'agir ou de n'agir pas, conformément à la nature tant de la fin & des moyens, que de l'intelligence qui se la propose & qui les gouuerne. Enfin toutes les actions de cette nature procedant de la volonté, & ce que l'on fait du mouuement de sa volonté ne pouuant estre imputé à contrainte ny à violence, soit bien ou mal que nous fasfions, nous nous y portons volontairemet, & n'attribuons aucune de nos actions à chose quelconque qui soit tellement au dehors de nous, qu'elle nous y force. Iusques-là nous recognoissons vn franc arbitre, & on ne peut raisonnablement nous accuser de rien croire, ny de rien enseigner autrement. Cela donc sans aucune difficulté suffisant pour rendre nos actions dignes de blasme & de punition, ou de

remuneration & de louange, peut-on iustement demander de nous dauantage? Certainement quand il est question d'al-ler plus auant, & de sçauoir quelle sin nous sommes capables de nous mettre deuant les yeux, nous disons que nous sommes de nostre nature si mauuais & si corrompus en nos passions, que nous ne nous proposons iamais, fors l'Vtile & le Delectable, sinon que Dieu nous fasse la grace d'apperceuoir l'excellece de l'Honneste, & qu'il nous donne de nous y porter. Encore nous trompons nous tousiours au iugement que nous faisons du delectable & de l'vtile, & ne le constituons sinon dans les chofes qui plaifent à nos mauuaises passions, iusques à ce que Dieu nous illumine, pour sçauoir bien discerner la solidité de la verité d'auec la vanité des apparences. Puis donc qu'il ne nous arriue iamais d'en bien iuger de nous mesmes, fans la preuention & l'assistance de la grace de nostre Seigneur, il faut qu'il y ait naturellement en nous quelque chose qui nous en rende incapables, & qui nous ofte, nonle franc arbitre mesme, car nous ne le pouuons perdre sinon en perdant la raison & la volonté, mais le bon vsage du franc

124 Apologie

arbitre en ce qui est du bien & du mal; car ce qui est ainsi vniuersel & en toutes personnes & en tous temps, doit auoir vne cause necessaire & determinée, & c'est ce qu'on appelle le peché originel, dont toutes les puissances de nos ames sont infe-Aées. Si cette doctrine-là nous priue de la bonne grace de nos superieurs & de nos concitoyens, il y a certes matiere de s'en estonner, pour ces trois raisons principales. La premiere est, qu'elle donne à Dieu la louange toute entiere de tout le bien qui est en nous & que nous faisons. Or y a-t'il sans doute moins de peril à donner à Dieu vn peu plus de louange qu'il ne faut, qu'à en donner beaucoup moins qu'il ne faut à l'homme. Quant nous attribuerions à Dieu quelque partie de la louange qui nous appartiendroit (ce que nous ne faifons nullement pourtant) nous ne croirions pas en deuoir encourir la reprehension de personne. Asseurément si ce qu'il y a de Dieu, & ce qu'il y a de l'homme en posactions, est si mal-aisé à diviser, qu'il soit comme impossible de le partager que I'vn ou l'autre n'y perde, il est sans doute plus raisonnable de tout rapporter à la gloire de Dieu, de qui nous tenons tout,

qu'à nous, qui n'auons rien de nous-mesmes. La seconde est, qu'en cela nous suiuons precisément les décissons que l'Egli-se a faites contre les Pelagiens & Semipelagiens, qui ont voulu donner plus qu'il ne faut au franc arbitre de l'homme. Et qui considerera bien la doctrine de sainct Augustin en cette matiere, trouuera qu'elle est entierement conforme à la nostre, & qu'il a combattu Pelagius & ses sectateurs des mesmes armes dont nous nous seruons maintenant. Or seroit-ce chose bien estrange qu'on nous haïst à cause d'vn sentiment en faueur de qui l'Eglise a notoirement prononcé, & qui a esté constamment tenu par ce grand Sain&, dont le nom & la memoire est en benediction en l'Eglise. La troissesme est finalement, qu'il y a vne infinité d'honnestes gens en la communion de Rome, qui sont en cela de mesme opinion auec nous, qu'on nommoit cy-deuant dans les Escoles Predeterminans, & que depuis quelques temps on appelle Iansenistes. Et on ne peut pas dire que nous en vueillions faire accroire au monde lors que nous parlons ainsi; car les escrits qu'onfait contr'eux les accusent si hautemet d'estre Caluinistes en ce poinet, qu'il ne se peut reuoquer en doute. Le seul liure que le Icsuite Petau a composé touchant le francarbitre depuis peu, en fait foy à tout le monde. Or iusques à cette heure on les a supportez doucement, & Rome mesme ne s'estoit point meslée de ce differend, ou au moins n'auoit ouuertement fauorisé aucun des partis contendans, iusques à il y a fort peu, que le Pape de maintenant, s'est, à ce qu'on dit, declaré pour les Anti-Iansenistes. Ce seroit donc certes passion si on auoit de l'atiersion contre nous à l'occasion d'vne chose que la communion de Rome n'a point encor decidée formellement, & qui n'empesche pas qu'on ne tienne pour fort honnestes gens & pour bons Chrestiens ceux qui y ont des sentimens tout à fait conformes aux nostres.

Le quatriesme exemple sera pris de cette accusation si atroce, que nous faisons Dieu autheur de peché. Ce qui veritablement seroit digne de beaucoup d'horreur, s'il estoit aussi veritable, que beaucoup de gens le nous imputent hardiment. Or d'abord il y a de la peine à conceuoir comment cette accusation s'accorde auec la precedente; car ie ne diray pas que si nous

ruinons absolument le franc arbitre, dont l'vsage est necessaire pour saire que nos actions portent iustement la qualité de vertuou de peché, nous ostons aussi tout peché de la conuersation des hommes, & que Dieu ne peut estre autheur d'vne chose qui n'est point. Ie diray seulement que si, comme nous le faisons, nous attribuons à Dieu toute la gloire des bonnes actions que nous produisons,& si,comme on nous en accuse, nous le faisons encor autheur de toutes les mauuaises, il faut qu'il y ait vne merueilleuse bizarrerie en nos opinions, & que nous ayons bien peu d'entendement de ne recognoistre pas quelle extrauagance il y auroit d'attribuer également à Dieu tout le bien & tout le mal qui se trouueroit dans les actions des hommes. Outre qu'ainsi nous ne laisserions à la creature ny louange ny blasme de bien & de mal, le zele que nous auons d'vn costé à la gloire du Createur, seroit de l'autre choqué bien rudement & bien manifestement par la mauuaise opinion que nous aurions de la saincteté de sa prouidence: Mais veritablement on a grand tort de nous attribuer des sentimens que non seulement nous rejettons comme faux, mais que nous auons en execration comme abominables. Tant s'en faut que nous soyons coupables de ce crime, qu'au contraire, nous mettons constamment & vniuersellement cette distinction entre le bien & le mal de nos actions, que nous attribuons absolument le bien à Dieu, comme à la seule cause dont il peut estre produit; & quant au mal, nous le donnons en-tierement à l'homme & au malin, qui en sont la seule origine. Or encore que cette question, que c'est que la Prouidence de Dieu fait ou ne fait pas en la productió des mauuaises actions, soit ardue d'elle-mesme, & de longue discussion, & qu'en accusations si calomnieuses, qu'on ne soustient d'aucunes preuues il suffit de nier le crime pour en estre iustifié, ie ne laisseray pas de dire icy deux ou trois choses pour nostre deffense. Premierement, il ne nous est iamais tombé dans la pensée, que Dieu par quelque operation interieure de sa Prouidence, mette au cœur des hommes de mal faire, ny qu'il y incite le moins du monde leurs affections. C'est dans la conuoitise, & dans la corruption de nostre nature qu'est le germe du peché, qui s'excite & qui bourgeonne de luy-mesme, & qui respand

respand en nos pensées, en nos actions, & en nos paroles tout le vice qui y est. Ce que la Prouidence de Dieufait en cela, est de gouverner tellement quant à l'exterieur, l'administration des objets qui sont capables d'exciter les affections & les conuoitises, qu'ils se presentent à propos deuant les facultez & les esmeuuent, lors qu'il est question de l'execution de quelque arrest de sa Prouidence, où les pechez des hommes doiuent interuenir. Comme ç'a esté cette diuine conduite & du Pere & du Fils, qui a fait que le Seigneur s'est trouué à point nommé deuant les yeux de Iudas, des Pharisiens, & de Pilate, pour esmouuoir en chacun d'eux les passions ausquelles ils estoient enclins, & de l'émotion desquelles dependoit la crucifixion du Sauueur du monde. Caril n'est point befoin d'instiller ny l'auarice, ny l'enuie, ny la cruauté dans l'esprit des hommes, à ce qu'ils soient induits à faire des actions conuenables à la nature de ces vices, lors que les occasions s'en presenteront; la corruption qui est en eux tous dés le ventre, les rend d'eux-mesmes assez enuieux, & assez cruels. Il ne faut que leur faire voir, ou quelque notable somme

130

d'argent, ou quelque eminente vertu qui offusque leur reputation, & qui abbaisse leur puissance, ou quelque autre tel objet sur lequel ils puissent contenter la barba-rie de leurs passions. Et comme si vous approchez vne matiere souuerainement combustible de la flamme, incontinent le feu s'y prend, la feule presence des choses capables d'exciter ces passions, les allume incontinent. Pour ce qui est de l'interieur, l'efficace de la Prouidence consiste principalement en ce que les pensées des hommes estans fort errantes & vagabondes, & la varieté des objets qui se presentent à eux les faisans assez souuent flotter irresolus entre diuers mauuaises actions, elle fait par des moyens secrets & tout à fait imperceptibles à nostre intelligence; qu'ils se determinent plustost à vne chose qu'à l'autre, pour seruir sans y penser au dessein lequel Dieu s'estoit formé. Ce qui fait qu'encore qu'il ne contribuë du tout rien à la naissance de ces mauuaises pensées, & que toute son operation se déploye à les gouverner seulement, l'euenement qui s'en ensuit luy est attribué comme s'il en estoit la cause. A quoy contribue beau-coup ce que Satan ne pouuant rien entrepour ceux de la Relig.

BI prendre dessus les hommes, sinon autant que Dieu luy permet, aussi-tost que Dieu luy a lasché la bride, il court & vole dedans leurs esprits, & y embrase les passions qui n'y estoient déja que trop enslammées d'elles-mesmes. Après cela, de quelque façon qu'on explique cette matiere, car sa difficulté fait prendre diuerses routes à ceux qui se messent de l'interpreter tant en l'vne qu'en l'autre communion, tant y a que nous n'auons iamais parlé de ce que Dieu y fait en termes si precis, & qui semblent tant saire dependre les manuaises actions des hommes de l'operation de la main de Dieu, que l'Escriture n'en employe de beaucoup plus emphatiques, & qui deuroient donner beaucoup plus de fujet de scandale, s'il y auoit quelque chose en l'Escriture dont on se deust scandaliser; car elle ne se contente pas de dire en ce qui est de la crucifixió de nostre Seigneur, que les Iuifs qui l'ont mis à mort n'ont rien fait sinon ce que la main & le conseil de Dieu auoient determiné se deuoir faire, Act.4: 8. mais elle enseigne disertement que c'est Dieu qui a endurci le cœur de Pharas contre ses propres commandemens, Exod. 7.3. que t'est luy qui a fait qu'Absalon a commis

inceste auec les concubines de Dauid, afin de le punir de ses pechez, 2. Sam. 12. 11.12. que c'est luy qui enuoye efficace d'erreur en ceux qui n'ont point receu la dilection de verité, afin qu'ils croyent à mensonge. 2. Thess. 11. 10. 11. & choses semblables. Comme donc la bonne opinion qu'on a de la sain-Eteté de l'Escriture & de la divinité de son inspiration, fait qu'on se porte à expliquer ces endroits detelle sorte, qu'on y trouue enfin que la conduite de nostre Seigneur y demeure exempte de blasme; la charité Chrestienne deuroit porter ceux qui lisent les escrits de nos gens sur cette matiere, à les exposer fauorablement, s'ils y trouuoient quelque chose qui de prime abord ne sust pas à leur contentement. Car c'est bien vn effet de nostre pieté que de tascher d'applanir dans les Escritures les passages qui s'y rencontrent vn peu difficiles ou scabreux; mais c'est vn grand deffaut de charité, & vne procedure qui tesmoigne de la passion beaucoup, que de condamner comme criminel dans les liures de nos gens, ce qu'on trouue moyen de justifier pleinement dans ceux des Prophetes & des Apostres. Finalement, il n'y a dans ces divins autheurs & dans les no-

stres expression si dure en cette matiere, ny si capable de donner de l'alarme à l'esprit humain, qu'il ne s'en trouue de pareilles & de plus fortes encore dans les escrits des autheurs les plus illustres de la communion de Rome. Car, ie vous prie, que peut-on rencontrer en nos gens qui soit au delà de ces paroles du Cardinal Bellarmin au second de ses liures de la Perte de la Grace, chap. 13. Pour ce qui est de l'inceste d'Absalon, Dieu est dit auoir fait ce mal-là, non entant que c'estoit une peine pour Dauid. Car encore que ce fust vn mal qu' Ab-Salon pechast, ce que Dieu ne vouloit point; mais le deffendoit; destoit pourtant un bien que David fust puny ; ce que Dieu a voulu & l'a fait. Item au chap. 16. Non seulement Dieu delaisse les pecheurs quand il les abandonne aux desirs de leurs cœurs, mais aussi quand il tourne & gouverne, & ordonne si admirablement les mauuaises volontez, lesquelles il n'a pas faites, mais n'a pas ignoré quelles seroient telles, que malgré qu'elles en ayent, elles luy seruent: c'est à dire, à l'execution de ses desseins. Ailleurs il dit que Dieu les regit, & les gouverne, & qu'il les tord, ou flechit, & mesmes auec quelque espece de violence, (car le mot torquet signifie tout cela)

operant en elles inuisiblement, tellement qu'elles s'addressent plustost à vn mal qu'à l'autre par la prouidence de Dieu. Il est vray qu'il dit que ce n'est pas positiuement, qu'il le fait, mais permissuement seule-ment, & qu'il explique cela par la comparaison d'vn chasseur duquel on dit qu'il a poussé son chien sur le lieure, quoy qu'il n'ait fait que lascher la lesse dont il le tenoit arresté. Mais outre que l'emphase de ces mots monstre qu'en cette permission, il y a quelque efficace positiue, il dit que mesdes meschans plustost à vn mal qu'à l'autre, quoy que ce soit occasionnellement & movalement, c'est à dire, en leur mettant en l'esprit quelques pensées bonnes en elles mesmes, mais dont ils abusent à mal. Puis donc que nous faisons également profession d'auoir en derestation que Dieu soit l'autheur des pechez des hommes, & que nous nous exprimons en termes qui sont esgalement capables, en les prenant trop à la rigueur, de faire soupçonner quelque chose de tel pourtant, quelle apparence de raison y peut-il auoir que les Docteurs Romains soient neantmoins receus à nous accuser continuellement, & que quant à

pour ceux de la Relig.

135

nous on ne vueille pas donner vne oreille à nos dessenses: Ou de quelle iustice peuton colorer ce procedé, que l'on recompense des dignitez les plus eminentes de l'Eglise de Rome ceux de sa communion qui parlent ainsi, & qu'à ces pauures Reformez, qui ne disent du tout rien de pis, on fasse sentir tant d'essets d'vne animosité comme implacable?

SECTION IV.

Que si on considere ceux de la Religion à l'esgard des choses qu'ils ne croyent pas, ils ne meritent point d'auersion. Et premierement touchant l'inuocation des Sainces, l'adoration des Images, & le Purgatoire.

Viennent maintenant à estre considerez les principaux chess des choses que nous ne croyons pas, ou que nous ne pratiquons pas en matiere de Religion. Car ie ne veux parcourir que les plus notables, ne doutant pas que si i'y puis donner quelque satisfaction à ceux qui nous 136

veulent du mal, ils ne se portent d'eux mesmes à juger équitablement & fauorablement du reste. Le premier que ie proposeray est l'inuocation des Saines, que nous ne croyons pas estre permise à l'Eglise, & qu'à cette occasion nous ne pratiquons point entre nous. Surquoy certes il y a sujet de s'estonner comment on le trouue si mauuais. A la verité si nous le faissions pource que nous fussions ennemis des Saincts & de la Vierge Bien-heureuse, quoy que la chose ne fust pas blasmable en elle-mesme, nous n'en pourrions pourtant nullement ny iustifier, ny mesmes excuser le motif. Mais Dieu & les hommes nous sont tesmoins, quelques calomnies qui se sement parmy le vulgaire, & à quelques excez qu'on s'emporte quelquesfois dans le zele des predications, que nous estimons les Sainets Bien-heureux, que nous admirons leurs vertus, que nous imitons leurs exemples, & sur tout, que nous auons de la glorieuse Mere de Nostre Seigneur, toutes les plus hautes & les plus auantageuses opinions que l'on peut auoir d'vne personne purement humaine. Nos escrits publics en font foy, nos propos en attestent

en toutes occasions, & nos predications, au moindre sujet qui nous en est presenté, resonnét magnifiquemet de leurs louages. Desorte que si nous ne les inuoquons pas, il le faut simplement attribuer à vn pieux & religieux mouuement de nos consciences. Or y a-t'il certes diuerses considerations pour lesquelles ceux auec qui nous viuon's nous y doiuent estre plus equitables; car pour ne dire point icy que tout tel mouuement de conscience procede de quelque reuerence enuers la Diuinité, tout le monde aduouë que nous n'auons point de commandement en l'Ecriture d'inuoquer autre que Dieu. Et de fait le Concile de Trente ne dit pas que ce soit vne chose necessaire, mais bonne & vtile seulement, que d'inuoquer les Saincts qui regnent auec nostre Seigneur. De sorte qu'on ne nous peut accuser de rebellion contre Dieu, ny de desobeyssance à ses commandemens en cet esgard. Or si l'Apostre S. Paul dit qu'il faut supporter charitablement ceux qui n'osent manger de quelque espece de viande, pource qu'ils se figurent qu'elle est defenduë, encore qu'elle ne le soit pas, il nous supporteroit sans doute beaucoup plus doucement encore 138

s'il viuoit, estant icy question d'vne chose qui quand elle ne seroit pas defendue de Dieu, nous est fort suspecte pourtant, & qui est d'incomparablement plus grande importance. Apres cela, ce qui augmente nostre soupçon, c'est que ny dedans le Vieil ny dedans le Nouueau Testament nous n'en voyons aucun exemple. Car tout ce qu'on en veut tirer pour justifier le contraire, est si friuole, que peu s'en faut que ceux mesmes qui l'alleguent n'en ayent honte. En effet, pour ce qui est du Vieux Testament, puis qu'en l'Eglise Romaine on croit que ny les Patriarches, ny les Prophetes, ny les autres Saincts de ces temps-là, n'ont point esté recueillis en Paradis sinon à l'aduenemet du Messie, c'eust esté lors chose bien impertinente que de les vouloir inuoquer. Pour ce qui est du Nouueau, les plus passionnez disputeurs n'y en trouuent pas la moindre trace. Or ce qu'il n'y a point de commandement d'inuoquer les Saints, est vn argument indubitable de l'inutilité de la chose en soy. Si elle pouvoit seruir à la gloire de Dieu & à nostre falut, tres-asseurément Dieu la nouseust commandée. Mais ce qu'il n'y en a point d'exemple, est vne tres-violente presomption qu'il y a quelque chose de vicieux en cette deuotion, n'estant nullement à presupposer que nous soyons plus aduisez ou plus deuotieux que ces Saincts à qui l'on defere cét honneur, pour inuenter en matiere de pieté quelque nouueauté qui ne leur ait point esté cognuë. Il est vray que le Concile de Trente couche icy magnifiquement de la coustume de l'É-glise Catholique & Apostolique, & qu'il en rappelle l'origine de la plus lointaine antiquité. Mais apres quinze cens ans qu'il y a que les Apostres sont morts, les traces de ces traditions nous paroissent si confuses, & la iactance de ceux qui se vantent de les nous monstrer dans les escrits des anciens Historiens & des Peres, est ou si peu fondée en bons tesmoignages, ou mesmes contredite si fortement par ceux que nous alleguons, que nous ne voyons aucune apparence de raison de nous resoudre là dessus à vne chose de telle importance. En effet, i'estime que cecy nous doit iustifier deuant tout le monde. Il faut necessairement que l'inuocation qu'on addresse à ces benistes creatures qui sont au Ciel, soit vn seruice religieux qu'on leur rende comme à des mediateurs & in-

tercesseurs entre Dieu & nous, & vn honneur qui leur soit deu à cause de cette charge, ou que ce soit seulement vn effer de la communion des Saincts, qui nous fait implorer l'assistance des prieres de nos amis dans les necessitez qui nous pressent. Si c'est le premier, il me semble qu'il n'y a personne qui entende que c'est de raison, qui n'aduouë que nous en auons beaucoup de nourrir de si fortes auersions pour ce culte: Car quant à honorer le Createur d'vn seruice religieux, c'est chose que nous deurions faire quand il ne le nous auroit pas commandé, pource que l'excellence & l'immensité de sa nature, l'estre qu'il nous a donné, la prouidence par laquelle il nous gouverne, & les autres bienfaits que nous auons receus de luy, l'exigent de nous clairement. Mais honorer vne simple creature d'vn seruice religieux, est chose que nos consciences ne peuuent gaigner sur elles mesmes, sans vn commandement tres-exprés & treseuident; & quand elles verroient quelque chose de tel, il seroit bien malaisé que la qualité de leur objet ne les fist beaucoup hesiter auant qu'elles y condescendissent; car le seruice religieux est comme l'amour

pour ceux de la Relig.

141

coniugal, ainst que l'Ecriture enseigne. Or tant s'en faut qu'vne femme chaste communique cet amour à autre qu'à son mary, sans son consentement bien exprés, que mesmes quandil le luy ordonneroit, la nature de la chose la porteroit à s'estimer dispensée de l'obeissance. Joignez à cela que la charge de mediateur & d'intercesseur est en l'Ecriture attribuée à Iefus-Christ exclusiuement à tout autre. Il y a, dit l'Apostre 1. Tim.2. 5. vn seul Dien & un (eul Mediateur entre Dieu & les hommes, à sçauoir Iesus-Christ. Or ie veux qu'on allegue icy de subtiles distinctions de Mediateur d'intercession & de mediateur de redemption, & autres telles qu'il vous plaira, tant y a que cela ne nous oste pas les scrupules de la conscience. Les termes de l'Apostre, comme il est manifeste, sont diserts; ces distinctions sont de l'invention de l'esprit humain, & fondées sur certaines suppositions dont nous ne voyons aucune trace en l'Ecriture. Ie vous prie, en vne chose dont nous n'auons point de commandement, dont nous ne voyons aucunexemple, où il y a tant d'apparence que la chasteté de la conscience, & la pureté de l'amour que nous deuons à Dieu est 142 Apologie

violée, & où la gloire de la charge de nostre Mediateur est communiquée à autruy, où trouueray-ie dequoy suffisammet authoriser ces distinctions, pour me deliurer de l'apprehension que i'ay de blesser le seruice de mon Dieu, & le salut de mon ame? Dans les choses humaines, c'est vn precepte de prudence que nul ne transgresse à moins que d'estre quasi tenu pour insensé, de nese porter iamais à faire chose quelconque sans necessité, ou sans quelque vtilité souuerainement considerable, quand il y a dans l'action quelque notable peril. Ou donc ie ne voy nulle necessité d'inuoquer les Saincts, car il n'y en a point de commandement, ou iene voy point d'euidente vtilité; car puis que le Fils vnique de Dieu est mon intercesseur, ie me puis fort bien passer de l'intercession de tous les Saincts & de tous les Anges, ou le danger est si manifeste de choquer l'honneur de mon Createur, & la gloire de mon Redempteur, ou finalement ie cours rifque de la perte de mon salut; de quel chastiment ne seroit point digne ma temeri-té, ou quel supplice ne meriteroit point mon irreligion, si le passois pardessus toutes ces considerations par inaduertance,

ou par complaisance? Si l'on prend cetté inuocation seulement comme vn effet de la communion des Saincts, les scrupules que nous en auons ne sont pas moins considerables: Car premierement nous la voyons pratiquer en l'Eglise Romaine comme vn seruice religieux. On y prie les Saincts tout de mesme que la Trinité: & comme l'air & la façon exterieure de le faire est toute semblable au seruice religieux que l'on presente à Iesus-Christ, aussi voyons nous que la deuotion & les mouuemens du cœur ne different aucunement de ceux qu'on espand en la presence du Redempteur, quand on s'addresse à sa personne: pource que l'inuocation est vne dependance de l'adoration, on n'y nie pas qu'on ne puisse & qu'on ne doiue adorer les Saincts & la Mere de Iesus-Christ, seulement on cherche quelques degrez d'adoration subalternes & quelque peu moins esleuez, pour ne les esgaler pas tout à fait au Sauueur du monde. On distingue entre l'adoration de latrie, & celle qui n'en est pas; on subdiuise encore cette-cy, pour ne mettre pas les Saincts & la Vierge bien-heureuse en mesme rang, en assignant à ceux-là la dulie tout simple

Apologie 144 ment, au lieu qu'on estime celle-cy digne de l'hyperdulie. Mais quoy qu'il en soit, latrie, dulie, hyperdulie, ce sont cultes religieux, qui different seulement de quelques degrez entr'eux; ce qui scandalise tout à fait nos consciences; car il nous semble que comme la difference des degrez au culte, induit bien necessairement la difference des degrés en l'excellence de l'objet, de sorte que les perfections des Saincts n'égalent pas celles de la Vierge, & que celles de la Vierge ne vont pas au pair de Iesus-Christ, ainsi la conformité en la nature du culte, induit pareillement la conformité de la nature de l'objet; de sorte que ce sont des Dieux & des Redempteurs à qui on addresse cette inuocation, mais d'vne dignité inferieure à nostre Seigneur, & à la Diuinité eternelle de son Pere. On ne craint pas mesmes de dire qu'ils sont Dieux & Redempteurs, quoy que ce ne soit qu'en quelque façon & par participation, comme Bellarmin les appelle. Comment donc pourrions nous conside-

rer cette inuocation comme vn simple effet de la communion des Saincts, & comment y pourrions nous participer sans crainte de polluer nos consciences? Puis

pour ceux de la Relig. apres en cette communion que les Saincts & fideles ont entr'eux, nous implorons bien l'assistance des prieres de ceux à qui nous pouuons parler, si nous nous rencontrons en mesme lieu auec eux. Si l'interualle des lieux qui nous separent, n'empesche pas le commerce & la communication, nous le pouuons faire par lettres. Mais quant à prier ceux qui sont si essoignez de nous, qu'ils ne peuuent ny entendre nostre voix, ny receuoir de nos lettres, ny estre informez par aucun autre moyen de nos inclinations & de nos necessitez, c'est ce que nous ne pensons pas qu'aucun des Catholiques pratique. Ceux donc qui inuoquent les Saincts, s'i-maginent qu'ils sont entendus d'eux, & qu'ils cognoissent leurs necessitez & les mouuemens de leurs consciences. Or comment cela se peut-il sans leur attribuer ce qui ne convient qu'à la seule divinité, c'est à sçauoir vne cognoissance infinie? Ie sçay bien encore qu'on allegue 1cy beaucoup de distinctios ingenieuses. Mais comme quand il est question d'yser d'yne drogue bien dagereuse, apres diuerses pre-

cautions, & diuerses preparations, le meilleur, & le plus salutaire est de n'en prendre

K

du tout point, pource que la moindre petite omission en tant de circonspections, est capable de faire que vous vous empoisonnerez, au lieu de prendre d'vn bon remede: ainsi en vne action de cette sorte, apres toutes ces subtilitez, le plus seur & le plus expedient est de ne la faire du tout point, pource que si vous vous y trompez, l'erreur y est pernicieuse. En estet, surquoy pouvons nous fonder aucune certitude de cette persuasion, que les Saincts qui sont en Paradis nous entendent? Quel enseignement en auons nous en la Parole de Dieu, quel exemple dans les experiences des choses humaines? Quel raisonnement tiré ou de la nature ou de l'estenduë de leur felicité est capable de nous en rendre certains: Quels Anges enuoyez des Cieux nous en ont iamais rendu tesmoignage? Et si ie ne suis point asseuré d'estre escouté de celuy que l'appelle à mon secours, à quoy faire rempliray-je la terre & les Cieux des clameurs de mes litanies? Enfin, soit qu'on considere l'inuocation des Saincts comme vn culte religieux, n'ayant point de commandement de la pratiquer, nous nesçauons si c'est chose agreable à Dieu. Or Sain& Paul dit que faire vne

pour ceux de la Relig.

147

action sans sçauoir si elle est agreable à Dieu ou non, & pecher, c'est vne mesme chose. Soit qu'on la considere seulement comme vn effet de la communion des Saincts, n'ayant aucune certitude qu'ils entendent nos oraisons, la sagesse ny la pieté ne nous permet pas de faire des actions de cette nature à la volée. Si ie m'estois proposé de disputer de la Religion, ie m'arresterois dauantage à resoudre tout ce que l'on met en auant sur cette matiere, & monstrerois que tout ce qu'on a accoustumé d'alleguer pour donner couleur à cette partie du seruice de l'Eglise Romaine, est sans solide fondement. Et sicét escrit estoit entrepris proprement & principalement à dessein de conuertir à nostre profession ceux qui en sont estoignez, ie me mettrois en deuoir de prouuer bien fortement que c'est vne pratique qui ne s'accorde nullement auec le genie de la Religion Chrestienne. Mais pource que ic n'ay dessein sinon de diminuer l'auersion que tant de gens ont contre nous il me suffit de dire que là où deux choses qui nous doiuent estre en si souueraine recommandation, la gloire de nostre grand Dieu, & nostre salut eternel, nous empeschent seules sans autre consideration d'approuuer & de pratiquer ce culte en nostre Communion, nous meritons plustost louange d'estre circonspects, & si l'on le veut ainsi, scrupuleux, par des motifs si importans, que non pas l'indignation de ceux à qui nostre creance est odieuse.

Le second point est celuy de l'adoration des images, sur lequel y a encore beau-coup plus de sujet de s'estonner que nostre creance & nostre pratique nous puisse attirer la haine de nos concitoyens; car non seulement nous n'auons dans la Parole de Dieu, ny aucun precepte, ny aucun exemple de les venerer, mais nous auons & des commandemens tres-precis, & des exemples tres-autentiques qui le nous defendent. La defense en est tres-expresse en ces paroles du second commandement de la Loy. Tu ne te feras aucune image taillée, ny ressemblance des choses qui sont là haut au Ciel, ny icy bas en la terre, tu ne te prosterneras point deuant elles, & ne les seruiras point. Et en celle-cy du quatriesme Chapitre du Deuteronome.3 Vous prendrez bien garde fur vos ames, (car vous n'auez veu ressemblance aucune au iour que nostre Dieu a parlé à vous

en Oreb du mili:u du feu:) De peur que vous ne vous corrompiez, & ne vous fassiez quelque image taillée, ou ressemblance qui vous represente chose quelconque, qui soit effigie de masse ou de femelle, ou effigie d'aucune beste qui soit en la terre, ou effigie d'aucun oiseau ayant aisle qui vole par les Cieux. Et cela est repeté & dans le mesme Chapitre & en mille autres endroits. Les exemples en sont en ce que ç'a esté la constante & inuariable pratique des Iuifs, de n'auoir aucune representation de chose viuante qui peust le moins du monde attirer leur deuotion,& en ce que les premiers Chresties y ont encore eu plus d'auersion qu'eux, & s'en sont gardez auec vne souueraine diligence. Il est bien certain que ceux qui ont introduit la coustume de mettre des images en l'Eglise,& de les y honorer, ont apporté tout ce qu'ils ont peu de subtilité, pour nous faire croire que Dieu ne nous l'a pas defendu. Tantost on y distingue entre idole & image, & representatio de choses qui sont, & de celles qui ne sont point Tatost on va chercher la forme des Cherubins dedans le Sanctuaire deffus l'Arche, & das les courtines dont le Tabernacle estoit couvert. Tantost on dit que ce comande-

K iij

ment estoit ceremonial & legal, & que nous n'y sommes plus astreints sous l'Euangile de Iesus Christ. Tantost on employe quelque autre artifice pour nous rendre la transgression de ce commandement moins scandaleuse & moins estrange. Mais on ne sçauroit tant faire pourtant, que cela nous deliure des pensées que cette sorte de deuotion iette dedans nos esprits; car quelle apparence que les Chrestiens de maintenant entendent mieux ces commandemens que les luifs, à qui ils ont esté donnez par Moyse mesme pour estre la regle de leur pieté, ny que les premiers Chrestiens qui auoient receu le Christianisme de la bouche des Saincts Apostres? Ou qui a donné le pouuoir aux Chrestiens de ces derniers temps d'interpreter les loix de Dicu, que les Juifs & les premiers Chrestiens ont receues & executées tout simplement, sans entreprendre de les gloser d'aucune exposition telle qu'est celle dont à cette heure on les enerue? Et s'il se trouve que ces interpretations ne soient pas selon le sens du Legistateur, qui nous garentira de la malediction que ces loix denoncent à ceux qui les violent? l'ay desia dit que ie ne veux

nullement entrer icy dans la Controuerse: mais cela n'empeschera pas que ie ne mette icy en auant les precautions sous lesquelles le Cardinal Bellarmin veut que les images soient venerées, afin de voir s'il y a raison de nous vouloir du mal; pource que nous n'y pouuons consentir. Il apporte donc premierement au second liure qu'il a escrit de cette matiere, trois distinctions qu'il estime prealables à la decision de la question, & à la reconciliation des diuerfes opinions des Docteurs Catholiques Romains; puis apres il met en auant quatre ou cinq propositions, dans lesquelles il comprend toutes les regles de la deuotion des Chrestiens en cet esgard. Il distingue entre les choses qui se peuvent honorer de par elles mesmes comme le Roy, & celles qui ne s'honorent sinon par accident seulement; comme la pourpre dont il est vestu. Item, entre les choses qui se peuuent honorer à cause d'elles mesmes, comme sont celles qui sont sainctes & sacrées de leur nature; & celles qui se peuuent honorer à cause de certaines autres, comme les signes des choses sacrées, à cause de la ressemblance qu'ils ont auec elles. Enfin, entre les choses qui se peuuent hono-

K iiij

rer proprement, comme quand on fait de l'honneur à vn mort, que l'on porte effe-Etiuement dans la pompe de ses sunerailles: & celles qui se peuuent honorer improprement, comme quand on fait de l'honneur à vne image de cire qui represente le mort, dont le corps est en quelque lieu ailleurs. Ces propositions sont: Que les images de Christ & des Saincts deiuent estre venerees, non pas seulement par accident, ny improprement, mais de par elles mesmes, & proprement, tellement que la veneration qu'on leur rend se termine en elles, entant qu'elles sont considerées en elles mesmes, & non pas seulement entant qu'elles suppleent à l'absence de l'original qu'elles representent. En apres: Que pour ce qui regarde, la facon de parler de cette matiere, notamment dans les predications qui se font au peuple, il ne faut pas dire qu'aucunes images doiuent estre adorées de l'adoration de latrie, qui est celle qu'on doit à la divinité, mais au contraire, il faut dire qu'il ne les faut pas ainsi adorer. Neantmoinsil adjouste en troissesme lieu; Que pour ce qui est de la chose mesme, on peut accorder que les images peuuent estre honorées ou servies improprement ou par accident, du mesme genre de culte dont l'original mesme doit estre honoré ou seruy. Ce

qui est vne merueilleuse maniere de prescher, que non seulement on cele au peuple la verité, mais qu'on luy presche le contraire; car proprement ou improprement, par elles-mesmes ou par accident, tant y a qu'elles peuuent estre honorées du culte deub à la divinité, si ce sont images de la Diuinité mesme. Ce donc qui se peut & qui se doit faire en leur esgard, pourquoy ne se doit-il pas dire? Ou pourquoy énseignera-t'on au peuple le contraire de ce qu'il faut qu'il pratique ? Il dit de plus, afin que personne ne s'y trompe; Que l'image ne doit pas estre adorée par elle mesme & proprement, du mesme culte duquel on honore l'original, & partant qu'il ne faut adorer aucune image par elle mesme & propre-ment, du culte que l'on nomme de latrie. Finalement il conclud, Que le culte qui par soy-mesme & proprement est deub aux images est un certain culte imparfait, qui se rapporte analogiquement & reductiuement à la mesme espece du culte qui est deu à son original. Qu'on me die vn peu icy au nom de Dieu, comment nous pourrions faire entendre au peuple toutes ces distinctions, de par soy & par accident, & d'à cause de soy, & d'à cause d'une autre chose, de proprement & d'impro-

ment, d'analogiquement & reductiuement, & ce que luy est opposé, de direct & de propre, de culte parfait. & de culte imparfait, dont l'vn est deub à l'original, & l'autre à la copie? Qu'on me die encore au nom de Nostre Seigneur, quand nous aurons defployé toute l'addresse de nos esprits à l'interpreter au peuple, & que Dieu luy aura donné plus de capacité que d'ordinaire il n'en a pour le comprendre, lors qu'il faudra effectivement se prosterner devant les images, comment & luy & nous pourrons nous garder en nos esprits toutes ces distinctions, & comment pourrons-nous st bien partager les mouuemens de nostre deuotion, que nous ne soyons point su jets à nous y mesprendre? Car si par yn mesme acte de mon entendement i'honore l'image & son original, comment pourra estre mon adoration directe & reflexiue, propre & analogique par soy & par accident, propre & impropre, terminée en l'image & relatiue à l'original, de latrie & non de latrie tout ensemble? Et s'il faut que cela se fasse par diuersactes de mon esprit, qui se fuccedent les vns aux autres, comment pourray-je si bien en determiner les mouuemens, que quand i'adoreray l'image de

Iesus-Christ proprement & à cause d'ellemesme, de cette sorte de culte qui luy conuient, ie ne fasse aucune reslexion sur son original, de peur de l'honorer d'vn culte inferieur à sa dignité ? Puis quand 1e l'adoreray par accident, improprement & reflexiuement à son original seulement, comment pourray je si bien faire que mon ame ne s'attache nullement à elle pourtant, de peur de luy rendre l'honneur qui ne conuient qu'à la Diuinité mesme ? Ou est l'homme viuant qui ait sçeu si bien mesurer les operations de son esprit, & notamment en vne chose si ardente & si vehemente que doit estre la deuotion, que de ne confondre point ces idées? Cependant le moindre peché en cela est mortel, la moindre inconsideration qui s'y commet, est vn adultere de l'ame: mais pour n'entrer pas plus auant dans cette dispute, ie me contenteray icy d'vne consideration, qui, ie m'asseure, nous exemptera de blasme enuers toutes personnes raisonnables. Ceux de la bonne volonté de qui nous auons le plus de besoin en diuerses occasions, sont les Iuges & les Magistrats, à qui est commise l'administration de la Iustice en ce qui nous regarde. Et la Loy, selon

laquelle ils nous doiuent iuger, sont les Edicts de nos Roys, & generalement toutes les constitutions qui ont esté faites en faueur de nos Eglises. Ie voudrois donc qu'ils me supportassent en la hardiesse que ie prendrois de leur demander, en casqu'ils y eust quelque article dedans les Edicts par lequel quelque chose nous fust aussi clairement desendue, que l'vsage des Images en matiere de pieté est desfendu à tous les hommes par la Loy de Dieu, s'ils nous receuroient à excepter contre la deffense par des distinctions & des interpretations semblables à celles qu'on apporte à ce commandement. Certes tout ce que nous pourrions attendre d'eux de plus moderé seroit, que ce n'est pas à nous à interpreter les Loix, mais à celuy qui les a faires, & que si on nous donne la liberté d'eluder par nos distinctions la volonté du Souuerain, nous auons affez d'inuention & de subtilité pour le faire : en vn mot, qu'il se faut tenir aux termes precis de la Loy, & la pratiquer exactement sans toutes ces chicaneries. Et là dessus on nous feroit incontinent des desfenses qui couperoient dans la racine toutes nos speculapour ceux de la Relig. 157

tions, & qui tireroient apres elles des chastimens bien rigoureux, si nous auions la hardiessede rien entreprendré allencontre. Nous supplions donc ces Messieurs par la charité de Nostre Seigneur, qu'ils ne nous vueillent point de mal de ce que nous ne faisons point enuers Dieu, ce qu'ils ne pourroient souffrir que nous fisfions enuers eux, & si nous redoutons encore plus la seuerité de ses iugemens, que nous ne faisons la leur en de telles occurrences. Commetant s'en faut qu'ils nous blasmassent d'estre religieux obseruateurs de la Loy de nostre Prince, & timides à l'interpreter, qu'au contraire ils nous en loueroient, & iugeroient nostre modestie digne de recommandation; ils ne nous doiuent point sçauoir mauuais gré de ce que nous sommes scrupuleux en ce qui est de l'observation des loix du Souverain iuge du monde; car la Majesté des Roys qui est imprimée dans leurs loix, est à respe-& er tant & plus; mais la Majesté du grand Dieu, dont il a mis l'emprainte enses commandemens, l'est sans contredit beaucoup dauantage.

On pourroit icy douter si ie deurois mettre la doctrine du Purgatoire au nombre 158 Apologie

des poincts sur lesquels nous auons à faire nostre Apologie, pource que nous ne les croyons pas, car il est bien vray qu'elle est extremément éloignée de nostre croyance, & est vray encore qu'elle est peut estre vne de celles pour la rejection desquelles nous auons le plus encouru de haine à l'efgard de quelques-vns. Mais ce ne sont pourtant pas ny les peuples, ny les Magistrats, ny les Grands, qui nous veulent du mal à cette occasion see sont les Ecclesia stiques, & les Moines, & l'Euesque de Rome notamment, à qui le renuersement de ce dogme peut autant preiudicier, que son establissement leur a apporté d'accommodement & d'vtilité. Car c'est là dessus que sont basties tant de bonnes & riches fondations, c'est de la que germe la necessité de tant de Messes, c'est ce qui a donné credit aux Indulgences & aux Pardons, & sans cette opinion, le thresor des Satisfactions, dont le Pape garde la clef, seroit entierement inutile. Quant aux autres de cette communion, il y en a vne infinité qui ne croyent du tout point de Purgatoire: & de ceux qui le croyent, la plus-part le craignent plus qu'ils ne l'aiment; de sorte qu'ils ne doiuent point trouuer mau-

uais, que nous ayons cherché dans la Parole de Dieu le moyen de nous en affranchir. Neantmoins pource que les Ecclesiastiques & les Religieux ont vne grande puissance sur les esprits des autres ordres de cette communion, & que la haine qu'ils ont conceuë contre nous à cause de l'abolition du Purgatoire, les rend plus ardens & plus animez à allumer celle que les autres nous portent pour d'autres occasions, il vaur mieux en dire quelque chose en passant, à ce que nostre iustification en soit plus complette. Certainement s'il y auoit en l'Escriture seulement quelque ombre apparente d'enseignement qu'il nous faut attendre quelque telle sorte de tourment apres cette vie, il faudroit tascher de resoudre nos esprits à en receuoir la persuasion, bien qu'elle doine estre accompagnée de beaucoup de douleur & de chagrin. Car bon Dieu qu'est-ce que cela, qu'apres tant de miseres qu'on a souffertes en ce mondé icy, & au milieu des angoisses de la mort qui a accoustumé d'estre si espouuantable, on nous vienne troubler l'imagination de l'apprehension d'vn feu horriblement cuisant, dans les flammes duquel nos ames doiuent estre tourmentées durant ie ne Apologie

160

sçay combien de siecles ? Nous admirons la fermeté du courage des Martyrs, qui ont pû se resoudre à la souffrance du feu pour deux ou trois heures tout au plus, & quand nous les nous representons rostir sansse desesperer, l'idée seule de ce supplice d'yn costé, & de leur constance de l'autre, comble tout ensemble nos esprits de tremeur & de merueille. Que doit-ce donc estre de ceux à qui on fait voir en mourant cét effroyable abisme ouuert, où le seu est incomparablement plus ardent que celuy que les Martyrs ont esprouué dessus leurs buschers, & auquel il n'y en a pas vn qui ne se doiue presumer estre condamné pour tant d'années? Mais puis que la Parole de Dieu n'en parle point, & qu'il n'y a Docteur en la terre qui en osast entreprendre la preuue par elle sans la Tradition, quel mal nous peut-on raisonnablement vouloir si nous nous sommes par la grace de Dieu deliurez de cette gesne? Car pour ce qui est de la Tradition, l'ay desia dit ailleurs que c'est chose qui ne nous touche pas beaucoup, à cause de l'éloignement & de l'obscurité de ses sources, & de la contestation que nous voyons estre entre les sçauans touchant la pureté ou impureté de

de ses ruisseaux, chacun des partis pretendant que la Tradition est pour luy. Ioint qu'il y a beaucoup plus de raison de croire que le Purgatoire est vne inuention de l'esprit humain, & vne imitation des Payens, dans les escrits desquels les Docteurs de l'Eglise Romaine ne nient pas qu'il ne soit tout du long, comme dans Virgile & dans Platon, que non pas vne doctrine du Christianisme. La Religion Chrestienne estat en toutes ses autres parties destinée à la joye & à la consolation de nos esprits, & propre pour les asseurer contre la crainte de la mort, & de tout ce qui peut venir en suite, il n'y a du tout point d'apparence qu'en celle-cy elle se soit estudiée à remplir nos cœurs d'alarme & d'espouuantement. Ie diray quelque chose de plus. Quoy que la Parole de Dieu n'en enseignast rien disertement, & que la Tradition y fust encore plus douteuse, quoy que le reste de la Religion ne s'y accordast pas ounertement, si nous voyions que l'abolissement du Purgatoi-re apportast quelque diminution à la gloire de Dieu, & de Nostre Sauueur, nous essayerions de faire en sorte que le zele que nous auons pour eux, l'emportast

162

pardessus le desir que nous auons de nous procurer contentement & satisfaction à nous-mesmes. Carsil'on prend à gloire d'endurer quelque chose pour l'honneur des Princes Souuerains, il seroit beaucoup plus raisonnable que nous seruissions à celuy de Nostre Sauueur', & que pour cela nous nous disposassions aux souffrances les plus redoutables. Mais quoy ? Nous protestons en la sincerité de nos cœurs, qu'outre l'interest de nostre consolation & de nostre paix, c'est celuy principalement de la gloire de Nostre Seigneur, qui nous a fait entreprendre la destruction de cét edifice. Nous voyons que l'Escriture le nomme nostre Sauueur, & ce doux & precieux Nom resonne perpetuellement en la bouche de son Eglise. Elle dit qu'il a fait la purgation de tous nos pechez, & n'excepte de cette expiation aucune de nos offenses. Elle proteste qu'il nous a deliurez de la malediction, & que desormais il n'y a plus de condamnation pour nous. Elle nous represente Nostre Seigneur introduisant le Larron en Paradis dés le jour mesme de sa mort, & nous promet qu'au déloger de ce corps, nous serons recueillis dans le domicile celeste. En vn mot elle esseue nos

esprits vers la bien-heureuse immortalité, & nous réjouit à la mort de l'esperance qu'elle nous en donne. De sorte que nous croirions trop preiudicier à l'honneur de ce Redempteur, & à l'efficace de sa Croix; si nous croyions que nous eussiós encore à souffrir quelques tourmens, & à faire quelque satisfaction pour nos crimes. En effet en l'Eglise Romaine on exempte les Martyrs du Purgatoire par vn priuslege special. Si donc l'on pretend qu'ils en doiuent estre dispensez à cause de ce qu'ils ont enduré, pourquoy ne le serons nous pas en vertu de la mort de Christ, laquelle nous est imputée ? Est-elle moins digne de nous obtenir vne entiere exemption de toute la peine de nos pechez, que les souffrances des Martyrs? Ou l'imputation que Dieu nous en a fait afin de nous rachepter par là, est-elle moins efficace à nous en deliurer, que si nous l'auions actuellement endurée ? Mais pour n'aller pas plus auant en la dispute, il me semble que Messieurs les Magistrats se doiuent interesser auec nous en la dessense de cette verité; car ils condamneroient d'iniustice vn creancier qui se voudroit faire payer deux fois d'vne mesme debte: & se con164

damneroient eux-meimes d'inhumanité, s'ils punissoient deux fois vn mesme crime selon la seuerité des Loix. Or nos pechez sont comme debtes, Dieu comme le creancier, Iesus-Christ comme nostre caution. Nos pechez sont veritablement des crimes, Dieu le Iuge de l'vniuers, Iesus-Christ le pleige de tous les fideles. De forte que leur pratique inuiolable en l'administration de la Iustice, & la creance qu'ils doiuent auoir que Dieu n'est pas moins iuste ny moins équitable qu'eux,les conuie à prendre nostre party dans la controuerse que nous auons auec les Moines & les autres Ecclesiastiques pour cette creance; car quant à la nouuelle inuention de quelques-vns, que les peines du Purgatoire ne sont pas tant satisfactoires en elles mesmes, qu'applicatives de la satisfaction de Iesus-Christ, c'est vne distinction que Messieurs les Magistrats ne doiuent iamais gouster. La raison en est, qu'ils ne souffriroient nullemet que ny le payement, ny la peine qu'vn autre a fait, ou fousserte en qualité de pleige & de caution, fust appliquée au premier & vray debteur par vn autresecond payement, ou par vn autre nouueau supplice. Asseuré.

pour ceux de la Relig.

ment si la Iustice humaine receuoit les cautions en matiere de crime, elle ne souf-friroit pas que si Meuius auoit esté pendu au bois pour le forfait de Titius, de sorte que par ce moyen il eust esté pleinement satisfait aux Loix, la satisfaction renduë par Meuius sust appliquée à Titius par la souffrance du souet, ou par quelques années de galeres.

SECTION V.

Que pour ne croire pas ny la Transsubstantiation, ny le Sacrifice de la Messe, ceux de la Religion ne meritent point l'auersion de personne.

DE cette grande multitude d'articles pour lésquels il y a tant de disputes entre les Chrestiens depuis six ou sept-vingts ans, ie n'en produiray plus que trois, pour n'estre pas long: la doctrine de de la Transsubstantiation: celle du Sacrifice de la Messe, & celle de l'authorité de l'Euesque de Rome: à quoy i'adiousteray quelques considerations sur nostre separation de sa communion. Car si ie puis mon-

166

strer, comme ie l'espere, qu'il n'y a nulle raison de nous hair à l'occasion de ces trois ou quatre chefs, ie me fais fort de la reconciliation de nos plus grands aduer-faires en tout le reste. Pour ce qui est de la Transfubstantiation, le plus grand, & peut-estre l'vnique sujet de la haine que nostre creance nous attire sur ce poinct, est que nous ne voulons pas rendre au Sacrement l'honneur que l'on pense luy estre deub comme au Seigneur Iesus-Christ Dieu & Homme tout ensemble. Nous ne l'accompagnons pas en procession, nous ne nous prosternons pas deuant luy quand nous le rencontrons, nous ne l'allons pas adorer dessus les Autels dans les Eglises, en vn mot nous ne le tenons nullement pour Dieu; ce qui offense merueilleusement ceux qui l'adorent. Veritablement si c'estoit faute d'affection enuers Nostre Seigneur qui nous portast à refuser au Sacrement l'honneur qu'on desire de nous, nous ne nions pas que nous ne meritassions d'estre en horreur à tous les Chrestiens. Car quel honneur ne doit-on point à celuy qui est Dieu benit eternellement? Et de quel amour ne doit-on point recognoistre la charité qui l'a induit à vouloir,

mourir pour nous entant qu'il est Homme? Mais puis qu'on ne nous peut accusen de cela, & qu'au contraire c'est l'extreme respect & la deuotion ardente que nous auons pour Iesus-Christ, qui ne nous peut permettre de rendre ces honneurs à autre qu'à luy, il me semble qu'il est euident que c'est à tort qu'on nous hait pour ce sujet, jusques à ce qu'on nous ait monstré que c'est opiniastreté & obstination d'esprit qui nous empesche de croire que Nostre Seigneur soit par Transsubstantiation en l'Eucharistie. Ce que les Athées sont en execration à tout le monde, c'est tres iustement, pource que Dieu ayant espans du par tout au Ciel & en la Terre tant de preques indubitables de sa Divinité? & la façon mesme de laquelle les hommes sont composez, auec les facultez dont ils sont douez, leur en fournissant des argumens irrefragables, ils ne peuuent reuoquer en doute vne verité si constante, & dont la nature mesme a mis tant de semences en nos esprits, sinon par vne obstination volontaire, & qui decouure manisestement la haine qu'ils ont contre Dieu. Car ils ne croyent pas qu'il y ait vn Dieu, pour ce qu'ils ne le veulent pas croire, & no

le veulent pas croire, pource qu'ils voudroient qu'il n'y en eust point. Ce que les Heretiques qui nient que Nostre Seigneur Iesus-Christ soit Dieu, sont en detestation à tous les Chrestiens, c'est tres-iustement encore. Pource qu'il y a dans la Parole de Dieu tant & de si éuidens tesmoignages de la Deité de Iesus-Christ; que ceux qui font profession de receuoir cette parole, ne peuuent rejetter cette verité sinon par vne incredulité affe-Aée, qui monstre ou vne tacite haine, ou vn mespris tout ouuert de la Majesté de ce grand Sauueur. Ce que les Iuifs ne le receurent pas autresfois pour le Messie que les Prophetes auoient promis, & que maintenant encore ils ne le recognoissent point pour leur Redépteur, e'est vn crime qui merite la vengeance qu'ils ont soufferte de la main de Dieu, & l'indignation qu'ils esprouuent de la part des hommes. Ce bon & glorieux Seigneur a toussours monstré dans sa personne; & dans fa doctrine; & dans ses actions, & monstre tous les jours en la verité de son Euangile, en la conduite de son Eglise, & au gouvernement de l'yniuers, tant & de si expresses

pour ceux de la Relig. 16

marques qu'il est celuy dont les Sainets oracles auoient parlé, qu'il ne peut auoir esté mecognu, & ne peut encore estre rejetté, sinon par ceux qui sont aueuglez de quelque passion desesperée. Mais quant à nous, i'atteste icy la conscience de tous les hommes, si on nous peut accuser de quelque chose de tel sans vne trop grande iniustice. Pour faire que nostre Seigneur soit en l'Eucharistie de la façon qu'on le pretend, il est necessaire que Dieu y produise iene sçay combien de miracles si grands & si extraordinaires, qu'il n'en a iamais fait de semblables, ny par les Prophetes, ny par les Apostres, ny par la main mesme de son Fils: Car desia de conuertir du pain, qui est vne substance inanimée, en vn corps humain & viuant, & doué d'vne ame agissante & raisonnable, c'est à quoy tous les siecles precedens n'auoient rien veu de pareil. A la verité Dieu a formé le premier homme de la terre, & a donné à cette matiere des dispositions & des organes qu'elle ne pouvoit avoir que par vn miracle signale. Mais il crea de rien l'ame qu'il y vouloit inspirer, & ne la tira pas de cette matiere terrestre. Icy il faut que le corps & l'ame de nostre Seigneur vien170 Apologie

nent de la substance du pain, si, comme le Concile de Trente l'a definy, toute la substance du pain est conuertie en toute la substance du corps du Sauueur du monde. Apres cela, il faut que Dieu conuertisse cette substance en vne autre, laquelle existoit desia auant que cette conversion se fist, à quoy il n'y a encore iamais rien eu de semblable: Car s'il a conuerty la verge d'Aaron en serpent, ce serpent n'estoit point auparauant : & s'il a changé l'eau des nopces de Cana en vin, ce vin n'estoit point non plus auant cette transmutation, Au lieu que le corps de nostre Seigneur existe il y a desia plus deseize siecles. De plus, il faut qu'il fasse qu'yn corps humain qui garde toutes ses dimensions, de long, de large, & de profond, ne tienne point de place pourtantsce dont il n'y eut iamais aucun exemple: Car iusquesà la Transubstantiation on auoit toussours mis cette difference entre les esprits & les corps, qu'aux yns on ne donnoit point de certain espace pour occuper, pource que les substances spirituelles n'ont ny quantité ny parties: mais quant aux autres on leur auoit tousiours assigné vn certain lieu, dont ils remplissoient les espaces par l'e-

pour ceux de la Relig. 171 stenduë des parties desquels ils estoient composez. Outre cela, il est necessaire qu'il fasse qu'vn seul & mesme corps, qui ne souffre point de division, soit en plusieurs & comme infinis lieux distans l'vn de l'autre tout à la fois. Ce qui n'estoit iamais tombé en l'imagination des hommes: car on auoit tousiours creu que comme les lieux distans de quelque interualle, sont aussi differens en nombre, & se comptent par yn, & deux, & trois, selon la multitude qu'on s'en imagine, ainsi les corps qui sont en ces lieux differens, different en nombre aussi, & se compte de mesme que les lieux où ils se trouuent. Au lieu que si ce qu'on dit de cette Transsubstantiation est vray, on peut bien compter les lieux où est le corps de Iesus-Christ, mais non luy, pource qu'il demeure toussours vn; en quelque multitude de lieux qu'il se trouue en mesme moment. Il faut encore que Dieu fasse que les accidens d'vne substance telle qu'est le pain & le vin, comme sont la figure, & la couleur, & la saueur; subsistent apres que la substance est abolie, sansauoir aucun fondement de leur existence, ny aucorps de Christ, ny en aucun autresujet. Ce qui ne s'est iamais veu en aucune autre occasion: car on auoit tousiours creu que la couleur, & la figure, & le goust, dependoient tellement de la substance en ce qui est de leur existence, qu'ils ne pouvoient demeurer sinon dans vn certain sujet. Et ce qui n'est pas moins merueilleux, il faut pardessus tout cela que Dieu fasse que les accidens d'vne substance telle qu'est le corps de Iesus-Christ, existent & resident veritablement en leur sujet, sans neantmoins l'affecter en aucune sorte, de la façon de laquelle les accidens affectent naturellement la substance dans laquelle ils sont; car le corps de Christ y doit auoir vne couleur, qui neantmoins ne le rend ny coloré ny visible; il y doit auoir vne solidité, qui neantmoins ne le rend nullement palpable: il y doit auoir vne figure, qui neantmoins ne donne à ses membres aucune configuration: & ainsi de tous les autres accidens qui l'accompagnent. Or depuis le commencement du monde on n'auoit rien cognu de tel, & n'y auoit eu iusques à la Transsubstantiation substance aucune en l'Uniuers, que l'on ne qualifiast selon les accidens & les qualitez dont elle est enuironnée. Enfin, il faut que Dieu

fasse qu'vn seul & mesme corps de nostre Seigneur, ait vne existence naturelle dans le Ciel, & vne autre Sacramentelle en la terre, vn estat glorieux là haut, & vn autre contemptible icy bas; & qu'il se voye, & qu'il se sente, & qu'il se croye assis en magnificence à la dextre de Dieu, & que neantmoins il se voye, & se sente, & se croye entre les mains d'vn Prestre en mesme temps : ce dont aucun des siecles precedens n'a iamais fait l'experience; car iusques à la Transsubstantiation on auoit tousiours creu que chaque chose, qui n'est qu'vne, n'a qu'vne essence, ny qu'vne existence par consequent; & que si elle a quelque con-noissance & quelque sentiment de soy, elle ne peut pas iuger autrement d'elle mesme sans commettre des extrauagances. Iusques là que les Comiques en ont fait des risées autrefois, qu'on a encore depuis peu portées dessus le theatre en nostre langue. Or n'auons nous que trois voyes de nous persuader la verité des choses, soit naturelles ou miraculeuses : c'est à sçauoir les Sens, la Raison, & la Foy. Les Sens sont pour discerner les choses sensibles, comme les

174 Apologie

couleurs, & les figures, & les sons, & les odeurs, & les saueurs, & toutes les qualitez qui tombent sous l'attouchement. La Raison est pour cognoistre les choses intellectuelles desquelles nous sommes naturellement capables, pour les comparer les vnes aux autres selon les rapports& les proportions qu'elles ont entr'elles, & voir comment elles s'a justent, & comment elles se contrarient, pour les affirmer ou les nier, prononcer cela est vray ou cela est faux, selon que nous en apperceuons ou l'accord ou la repugnance. La Foy est pour acquiescer à l'authorité divine dans les choses qui surpassent ou la comprehension, ou au moins certes l'inuention de nostre intelligence, & qu'à cette occasion Dieu nous a voulu reueler. Voyons donc si l'on nous peut accuser au sujet dont il s'agit de n'vser pas comme il faut de quelqu'vn de ces principes de nos cognoissances. Pour ce qui est des sens, tous les nostres nous persuadent le contraire de ce qu'on nous dit de la Transsubstantiation. Nous ny voyons, ny entendons, ny flairons, ny goultons, ny touchons rien qui ne nous atteste que c'est du pain & du vin, & non lé corps & le sang du Sauueur du monde.

pour ceux de la Relig. 17

Les sens de ceux qui croyent la Transsubstantiation en iugent de mesmes que les nostres, & depuis l'institution de la premiere Cene du Seigneur iusqu'à maintenant, il en a tousiours esté ainii, & en sera tousiours ainsi iusques à la consommation des siecles. Ie ne sçay si on appelle opinia-stres ou insensez ceux qui ne se laissent pas persuader à l'experience qu'ils sont de la nature des choses par le moyen de leurs sens. Aristote disoit qu'à ceux qui ne croyent pas que le feu soit chaud, il ne faut que le leur faire toucher; si apres cela ils persistent encore en leur opinion, il n'importe pas beaucoup comment on les nomme. Maistant y a que quant à nous on ne nous peut pas accuser ny de cette folie, ny de cette obstination, de resister determinément à la deposition de nos sens, puis que nous iugeons des choses conformément à la realité des qualitez qu'ils nous en representent; car nul ne nie que ce ne soient là veritablement les accidens du pain & du vin, comme nos yeux & nostre goust, & nos autressens nous en attestent. Pour ce qui est de la raison, c'est vne faculté superieure aux sens à la verité, & qui est destinée à nous raddresser de leurs erreurs

quand il leur arriue d'en commettre. Ainsi, encore que nos yeux iugent qu'il y a de veritables couleurs en l'arc-en-Ciel, ou qu'vn baston que nous auons mis droit en l'eau, y devient vn peu courbé, ou qu'vne longue allée se fait plus estroite à mesure qu'elle s'esloigne de nous, nostre raison nous fait croire le contraire pourtant, & nous persuade que cela vient des diuerses reflexions & positions de la lumiere, de la diuerssité des deux moyens qui nous rapportent la representation de l'objet, & de ce que ses rayons que l'on appelle visuels font en nos yeux les angles de leur ren-contre plus ou moins aigus, à proportion de la distance de l'objet où ils se portent. Et on appelle opiniastres & obstinez ceux qui s'attachent tellement à ce faux iugement dessens, qu'ils ne veulent pas defererà vne raison claire & euidente. Il est vray que pource que de son costé la raisonn'est pas infaillible, & qu'assez souuent il luy arriue de se tromper, on redresse aussifes manquemens par le tesmoignage des sens. Comme quand vn Philosophe s'estant autresois imaginé par ie ne sçay quelle bizarre speculation de sa raison, qu'il n'y auoit point de mouuement, quelqu'vn

qu'vn se leua deuant luy, & se mit à se promener en sa presence. Et c'est encore ainsi que les Peripateticiens disputent en beaucoup de choses contre les Sceptiques, en leur faisant voir à l'œil & toucher à la main la certitude des choses dont ils pensent pouvoir douter par le discours de la raison. Ainsi ces deux facultez s'entr'aident l'vne à l'autre, & s'instruisent mutuellement. Tellement que comme ceux là sont tenus pour des acariastres, qui sans vouloir escouter aucune raison, deferent absolument tout à leurs sens; ainsi tienton pour des aheurtez ceux qui sur quelque vaine imagination de raison reiettent l'attestation des sens dans les choses les plus euidentes. Mais quoy qu'il en soit, on ne nous peut icy imputer ny l'vn ny l'autre; car puis que nos sens nese trompent point en ce qui est de la Transsubstantiation, & que veritablement ils nous rapportent les qualitez des choses telles qu'el. les sont, nous n'auons pas besoin que la raison vienne à leur secours pour corriger leurs manquemens, & nous ne deferons à leur tesmoignage sinon comme il faut, en croyant que ce sont les qualitez du pain & du vin, & non les accidens d'vne autre

178 Apologie

substance. Et quand il y auroit quesque chose à corriger au jugement que nossens en font, nous ne pouvons estre accusez d'opiniastreté, comme si nous n'vsions pas assez de nostre raison pour le faire; car nous n'ysons de nostre raison sinon sur les sujets qui luy sont proportionnez, & ne sousmettons point à son examen les cho-ses qui sont au dessus d'elle. Or n'y a-t'il comme ie croy personne en la communion de Rome, qui voulust dire que les mysteres & les miracles de la Transsubstantiation fussent proportionnez à nostre raison, ny qui consentist qu'il nous sust permis de croire ce qu'elle nous en dicte. Au contraire, on nous blasme de ce qu'en ces mysteres nous voulons trop escouter la voix de la raison, & de ce que nous ne deferons pas assez à vne authorité superieure. Pour ce qui est de l'authorité, nous en parlerons tantost: mais tant y a que ce seroit vne chose bien estrange que ceux qui ne donnent icy du tout rien ny au sens ny à la raison, nous accusassent d'estre opiniastres & arrestezà nos imaginations, en ce que nous taschons d'examiner les choses par la voye des sens & de la raison, puis que d'ordinaire on nomme de ce

nom ceux qui ne les veulent pas enten-dre. Au fonds, nous faisons tout ce que nous pouuons pour comprédre comment vne chose qui est, peut estre conuertie en vne autre qui est aussi, sans que celle-cy soit premierement abolie, ny qu'elle acquiere vn nouuel estre, & nous n'y pouuons reussir. Nous faisons tout l'effort dont nos entendemens font capables, pour entendre comment vn corps humain peut estre d'vne iuste & naturelle grandeur, & que neantmoins il ne soit point besoin d'espace pour le contenir, & nous n'en pouuons trouuer le moyen. Nous partageons tant qu'il nous est possible les pensées de nos esprits pour conceuoir qu'vn corps soit en diuers lieux separez, & que neantmoins ce ne soit qu'vn melme corps, & nous n'en pouuons venir à bout. Nous faisons en nostre pensée toutes les abstractions imaginables pour separer les accidens d'auec leur substance, & pour leur donner quelque subsistance à part, & nous ne pouuons si bien faire qu'ils ne se dissipent. En vn mot, nous taschons d'ajuster nostre intelligence à toutes ces merueilles là, & tousiours nostre raison y fait vne inuincible resistance. Nous faisons

encore dauantage, afin d'esloigner d'au= tant plus de nous tout soupçon d'obstination. Nous cherchons dedans les escrits des Docteurs de l'Eglise Romaine quelques aides à nostre conception, & nous y trouuons à la verité force subtilitez, force distinctions, force speculations Scholastiques, par lesquelles ils essayent de diminuer l'étrangeté que nostre raison trouve là dedans: Mais plus nous nous y alambiquons l'esprit, & moins nous y trouuons de satisfaction i plus nous nous efforçons de les saisir, & plus eschappent-elles à nostre comprehension, & s'éuanouissent en fumée. Nous accuserions volontiers la tardiueté de nos esprits, dont le mouuement ne seroit pas assez agile pour attraper des choses si minces, & qui ont si peu de solidité, sinon que nous trouuons que nous sommes faits comme les autres, & qu'en toutes autres matieres nous ne voyons pas que ces Messieurs aillent plus auant que nous, & que depuis plus de cent ans qu'il y a eu de toutes sortes de gens parmy nous, & plusieurs doüez d'vn tresexcellent entendement, & tres-exercité en toutes choses, quelqu'vn sans doute les eust entendues si elles eussent esté intelli-

gibles. Ce qui nous fait croire que ceux mesmes qui les proposent, le font, comme disoit l'Archeuesque de Cologne au Concile de Trente, non intendendo la materia, mà per consuetudine & habito di Scola. Asseurément, s'ils en vouloient dire la verité, ils aduouëroient que ce n'est qu'vne routine d'Escole, en laquelle leur memoire agit, & leur imagination court apres certains petits fantofmes, où quand la raison fait veritablement son office, elle ne trouue pas mesme la moindre ombre d'vn vray corps. N'y eust-il que cette proposition là, qu'vn seul & mesme homme peut, s'acheminer à l'Orient & à l'Occident en mesme moment, & venir enfin en tournant par diuers chemins au deuant de luymesme, & se trouuer luy-mesme front à front, & s'il continue d'aller, se penetrer par toutes les parties de son corps, & auoir, comme Ianus, des visages à double rencontre, puis en continuant son chemin se separer de soy-mesme encore, & s'il luy prend enuie d'aller au Septentrion & au Midy en mesme temps, ne sentir au Midy la chaleur du Soleil sinon à proportion de ce que la froideur du Septentrion, luy fera de la resistance, il y en auroir

M iij

assés pour nous faire croire qu'ils s'egayet, & qu'ils nous debitent ces gentillesses comme on fait la Metamorphose d'Ouide aux petits enfans. A cela donc que ferions nous? Car puis que nostre conscience nous rend tesmoignage que ce n'est pas opi-niastreté qui nous empesche d'accommoder nostre raison à tout cela pour en receuoir la persuasion, quel sujet de mauuaise volonté peut-on auoir contre nous si nous ne nous y pouuons resoudre? Reste donc maintenant la Foy, qui a pour objet la reuelation de la Parole de Dieu, dans laquelle si nous sçauions certainement que ce mystere eust esté reuelé comme on le pretend, alors certes nous trouuerions nous bien enserrez entre nos sens & nostre raison d'vn costé, & la reuelation de Dieu de l'autre; car il est bien vray que son authorité est absolument fouueraine, & que c'est crime que d'y resister. Mais neantmoins pource qu'en toutes les autres parties de la Religion, il se sert du ministere de nos sens pour nous instruire, & que mesmes il n'y reiette nullement l'entremise de nostre raison, il y auroit beaucoup de sujet de s'estonner qu'il en ruinast entierement les fon-

&ions & les operations en cette matiere. Enfin pourtant nous recognoissons qu'il faudroit que l'vn & l'autre cedast à la Foy, si le tesmoignage de la reuelation estoit entierement irrefragable. Or est-il vray que nostre Seigneur a dit, Cecy est mon corps; & nul des Chrestiens ne le conteste. Mais aussi nul ne sçauroit-il nier que cette parole ne puisse auoir deux sens; l'vn propre, come l'Eglise Romaine la prend; l'autre metaphorique & figuré, comme les Reformez l'entendent; car qui peut douter que comme ces mots, la Pierre estoit Chrit. 1. Cor. 10. ont cette intelligence en Sainct Paul, la Pierre effoit la figure de 1esus-Christ, ceux-cy, le pain est le corps de Christ, ne puissent auoir celle-cy pareillement, le pain et la representation, ou comme dit S. Augustin, la sigure du corps de Christ, & qu'ils ne presentent ainsi à l'intellect vne idée fort raisonnable? De fait Bellarmin disputant contre toutes les autres interpretations qu'on apporte à ces paroles de nostre Seigneur, dit nettement qu'il n'y a que celle de l'Eglise Romaine ou la nostre qui leur puissent conuenir, & ne conteste nullement que si on n'a esgard si-non à la forme de s'enoncer, cette propo184 Apologie

sition, le pain est le corps de Christ, no puisse receuoir vne exposition metaphorique. On ne peut donc nous accuser d'obitination contre cette reuclation, iusques à ce qu'on nous ait clairement iustifié lequel des deux il faut embrasser à l'exclusion de l'autre: Car nous voyons que de tous les miracles que Dieu a faits, aucun n'a iamais dementy le tesmoignage des sens. Au contraire, il a necessairement salu qu'ils ayent tres-viuement & tres-certainement conuaincu les sens pour se faire croire miracles. Il ya plus. Iamais Dieu n'a fait aucun miracle qui ait choqué la raison: Car il est bien vray que tous les miracles ont quelque chose au dessus de la raison, en ce que la raison estant la faculté qui est destinée à comprendre les proportions naturelles qui sont entre les choses, & particulieremet entre les causes & leurs effers, comme entre la chaleur du feu & l'action de brusser, nous voyons que certains tels effets se produisent sans telles causes, & ne voyons point detelles naturelles proportions entr'eux, & la cause qui les produit, qui est l'operation de la Diuinité; car cette puissance de Dieu n'est point determinée à certaine sorte d'effets par

pour ceux de la Relig. 18

aucune qualité, come le feu l'est à brusler par sa chaleur, & le Soleil à esclairer par la lumiere. Elle est au dessus de cette determination, & contient tellement en soy par eminence toutes sortes de facultez & de vertus, que neantmoins quand elle se desploye en quelque operation, nous n'en conceuons en façon du monde la maniere. Mais tant y a que si vous mettez à part la consideration de la cause qui produit les miracles, & que vous les consideriez en eux-mesmes quand vne fois ils ont esté faits, il ne s'en est iamais fait aucun dont la constitution ne se soit parfaitement bien accordée auec la raison. L'eau qui fut conuertie en vin, auoit apres sa transmutation vne certaine quantité qui remplissoit certains vaisseaux; elle estoit en vn certain lieu determiné, & n'estoit nullement en l'autre; elle auoit le goust & la force du vin,& verifioit sa trasmutation par là, elle auoit perdu les accidens de l'eau, & ils n'y subsistoient plus sans substance: bref, la raison admiroit bien la cause de ce miraculeux euenemet, mais en l'euenement mesme il n'y auoit rien d'extrauagant, ny hors des termes de la constitutió du vin, telle qu'elle doit estre

186

par les loix de la nature. Au lieu qu'en la Transsubstantiation ce n'est pas tant la vertu à laquelle on attribuë l'effect, qui donne de l'admiration, que l'estre mesme de la chose produite, qui choque toutes les reigles de la raison & de l'intelligence. Ioignez à cela que Nostre Seigneur semble auoir pris plaisir à ces faconsde parler, tant il s'en sert ordinairement. Il dit qu'il est la porte, qu'il est le chemin, qu'il est le sep, que son pere est le vigne-ron; & le Vieil & le Nouveau Testament n'ont rien de plus frequent que cette locution, par tout où il s'agit de choses qui sont destinées à la representation des autres. Lessept vaches sont sept années, & les sept espics pareillement: les sept chandeliers d'or sont sept Eglises, & les sept estoiles font sept Anges & ces façons de s'exprimer sont vsitées en toutes langues. La Carte de la France est la France, au langage de tout le monde, & l'image du Roy est le Roy; le Crucifix est Iesus-Christ, & quand il nous arriue de parler ainsi, nul ne se figure des miracles. Peut-on donc accuser d'opiniastreté ceux qui aiment mieux embrasser vne interpretation facile, vsitée en toutes nations, familiere & commune dans les

propos de Nostre Seigneur, & qui n'a rien de contraire aux sens, ny de repugnant à la raison, qu'vne qui ne peut subsister si Dieu ne renuerse la nature des choses tout à fait, s'il ne démonte tout ce qu'il y a de certitude au iugement de la raison, & s'il ne met en trouble & en erreur tout ce qu'il y a de plus asseuré dans les fonctions de nos sens pour la cognoissance des choses? Mais quoy? Il ne faut que rapporter icy les paroles du Cardinal Cajetan, personnage de grande reputation en sa communion, pour nous absoudre pleinemet d'estre obstinez en cette matiere. C'est une chose qu'il faut sçauoir, dit-il en escriuat sur la Somme de Thomas, que de l'authorité de l'Escriture Sainte touchant l'existence du Corps de Christ au Sacrement, on n'a autre chose d'exprés sinon la parole du Sauueur disant, Cecy est mon Corps ; car il faut que ces paroles soient vrayes. Et d'autant que les paroles de l'Escriture Sainte s'exposent en deux façons; c'est à sçauoir, on proprement ou metaphoriquement, le premier erreur sur ce sujet a esté de ceux qui interpretent ces paroles de Nostre Seigneur metaphoriquement, lequel erreur le Maistre des Sentences traite en la distinction 10. liu.4. qui aussi est rejetté en cét article de Thomas: & la force de

la raison pourquoy on le rejette consisse ence que les paroles de Nostre Seigneur sont par l'Eglise entenduës proprement, & partant il faut qu'elles soient verifiées proprement. Or ie dy par l'Eglise, pource qu'il ne paroistrien en l'Euangile qui force à entendre ces paroles proprement: car par ces mots que le Seigneur a adioustez, Qui est donné pour vous en remission des pechez, on ne peut pas conclure euidemment que les paroles precedentes doiuent estre entenduës proprement; car cette parole, qui, n'est pas employée pour monstrer la conionction de l'attribut auec le suiet, mais pour monstrer l'attribut, c'est à dire, mon corps, ce qui n'empesche pas que la proposition precedente ne se trouue vraye, est ant prise en un sens metaphorique seulement. Comme là où l'Apostre dit, Or la pierre estoit Christ, quand il eust adioust é, Qui a esté crucifié pour nous, qui est ressuscité pour nous, qui est monté au Ciel, en disant, Or la pierre estoit Christ, qui a esté crucifié pour nous, &c. cette proposition precedente, Or la pierre estoit Christ, ne laisseroit pas de s'entendre metaphoriquement & non proprement: & semblablement en ce qui se propose & dont ils agist, en ces paroles de Nostre Seigneur, Cecy est mon Corps, qui sera liuré pour vous, de cette addition, qui sera liuré pour vous, la premiere proposition n'est pas restreinte à un fens propre, mais ne laisseroit pas d'esire vraye quand mesme elle seroit priseen un sens metaphorique seulement. Et c'estoit l'opinion de quelques Theologies au Concile de Trente, qu'il ne falloit pas fonder la doctrine de la Transsubstantiation dessus ce passage, comme s'il estoit inéuitablement necessaire de l'interpreter ainsi, mais sur la tradition de l'Eglise en vertu & par l'authorité de laquelle elle l'a ainsi entendu. Pourquoy donc nous accuseroit-on d'opiniastreté, en ce que nous ne pouuons gagner fur nous d'entendre ces paroles en ce sens, veu que par l'adueu mesme de quelques Theologiens celebres en la communion de Rome & de quelques Cardinaux, elles se peuuent prendre en vn qui n'est pas moins clair ny moins certain, & qui s'accorde mieux auec la raison en toutes manieres? Car quant à ce qui est de l'authorité de la Tradition, nous auons vne infinité de preuues en l'Antiquité, que plusieurs siecles depuis la naissance du Christianisme, l'Eglise n'a rien crû de tel. Quad les preuues en seroient moins euidentes qu'elles ne sont, il y en a assez pourtant pour rendre, notamment en ce poinct, la

190 Apologie

Tradition douteuse. Quand elle seroit moins douteuse, nous voyons vne si grande difference entre la probabilité qu'il y a que les hommes se soient trompez, & que Dieu fasse tant & de si prodigieux miracles tous les iours, que nous ne pouuons comprendre comment on nous pourroit condamner, si nous ne croyons pas si tost des choses de cette nature, dont il n'y a aucun exemple dans tous les fiecles precedens, que nous croyons que les hommes se sont abusez, veu que nous auons tant d'experiences de leur inclination à l'erreur en tous temps & en toutes choses. Neantmoins s'il n'estoit question que de la vie ciuile, ou d'vne loy politique seulement, peut estre que le desir & l'interest que nous auons de nous reconcilier la bien-veillance de nos superieurs & de nos compatriotes, nous porteroit à quelque condescendance. Non que nous peussions obtenir de nous-mesmes de croire la Transsubstantiation; car nous ne sommes ny les maistres de nos sens, qui nous rapportent les choses telles qu'elles sont, & non telles que peut - estre les voudrions nous bien estre: ny les dominateurs de nostre raison, pour luy commander de croire

ce qu'elle void contredit par des preuues aussi éuidentes que des demonstrations; ny les Autheurs de nostre foy, pour luy faire embrasser d'autres objets que ceux qu'elle void & qu'elle cognoist certainement estre de reuelation divine. Mais au moins ferions-nous peut-estre quelque espece de semblant que nous n'y auons point d'auersion, & dissimulerions tant que nous pourrions le mescontentement de nostre raison, pour nous accommoder en vne mesme communion auec ceux qui font profession de croire toutes ces merueilles. Il y a quelquesfois certaines opinions populaires ausquelles les sages ne s'opposent pas ouuertement, quoy qu'ils les reprouuent en l'interieur, pource qu'il est ou inutile, ou mesme assez souvent dangereux de nager contre lestorrens, & que c'est mal vier de la raison, que de l'exposer à estre foulée aux pieds par ceux qui sont aueuglez de leurs preiugez, ou à qui la nature n'a pas donné assez de capacité pour l'entendre. Si mesmes il n'estoit question que d'vn erreur qui ne fust pas de grande consequence en la Religion, & particulie-rement qui n'apportast aucune alteration au culte de la Divinité, peut-estre y conniuerions nous encore, & que l'amour de la Paix l'emporteroit pardessus celuy de la Verité, au moins pour ne pas rompre la communion, & pour laisser dans leurs sentimens ceux qui nous laisseroient dans les nostres; car il faut supporter beaucoup de choses en autruy, quand de sa part il ne vous astreint à rien qui choque l'honneur de Dieu, & la paix de la conscience. Mais il y va du seruice de Nostre Seigneur, qu'il nous est absolument impossible de deferer au Sacrement, tel qu'on le desire de nous, tandis que nous ne sommes pas persuadez dela Transsubstantiation, sans que nostre conscience nous conuainque d'vne idolatrie inexcusable. Et il y va du salut eternel & de nos corps & de nos esprits, dont nous croirions qu'vne telle action commise contre nostre conscience nous priueroit iustement, pour estre precipitez dans vne perdition entierement irremediable. Partant nous supplions tout le monde de considerer auec quelle équité on peut desirer de nous vne si pernicieuse & si criminelle complaisance. Nous estimons qu'en la communion de Rome il y a vn peril manifeste pour le salut, à cause qu'on y adore du culte de la Diuinité ce qui n'est pas Dieu.

Dieu. On s'excuse sur ce qu'on croid qu'on n'y adore rien de cette espece de culte, qui ne soit Dieu veritablement. Et sion ne le croyoit ainsi, on proteste qu'on n'y adoreroit pas le Sacrement. Cette excuse ne peut estre bonne, sinon que les preuues sur lesquelles on fonde cette creance, soient fi certaines & si euidentes, qu'il n'y ait pas moyen d'y resister. C'est donc à ceux qui ont receu cette persuasion, que l'Hostie est vrayement Dieu, à les bien examiner, afin de ne se pas tromper en vne chose de telle importance. Ceux de la communion de Rome nous croyent perdus sans resource, pource que nous n'adorons pas le Seigneur Iesus au Sacrement. Nous nous excusons sur ce que nous ne croyons pas qu'il y soit, & protestons que si nous en auions vne autre opinion nous ne manquerions nullement de luy rendre toute sorte de veneration, selon sa dignité incomprehensible. C'est à nous à nous bien examiner, à ce que ne soit my passion ny opiniastreté qui nous empesche de voir la verité des preuues qu'on nous allegue. Et ie m'asseure que ce que ie viens de representer nous garantit assez de cette imputation. Comme donc ce seroit

iniustice à nous si nous voulions obliger les Catholiques à n'adorer pas le Sacrement, que premierement nous ne leur eussions monstré par des preuues indubitables qu'il n'est pas Dieu, puis que nous sommes ainsi disposez que si nous croyions qu'il sust Dieu, nous l'adorerions sans doute ce ne peut estre iustice à eux de nous vouloir obliger à adorer le Sacrement, iust que s'à ce qu'ils nous ayent persuadé qu'il est Dieu, puis que telle est la disposition de leurs esprits, qu'ils ne l'adoreroient iamais s'ils n'auoient de luy cette creance.

Le Sacrifice de la Messe est vne doctrine que nous ne pouvons recevoir, principalement pour deux raisons. L'vne, qu'elle
presuppose la Transsubstantiation, la quelte nous ne croyons pas. L'autre, que nous
tenons ce sacrifice non seulement pour
inutile, car ce seroit peu de chose s'il n'y
avoit rien de plus, mais encore pour iniurieux à l'honneur du sacrifice de la Croix
du Sauueur du mode. Et quant à la premiere de ces raisons, puis que nous ne pouvons
croire la Transsubstantiation, & qu'il n'y
a nulle pertinente raison de nous blasmer
à cette cause, il vient necessairement en
consequence que la rejection du sacrifice

soit à nostre esgard exempte de blasme; car puis que de l'adueu de nos aduersaires il ne peut estre de sacrifice de la Messe sans Transsubstantiation, & puis que, comme ie viens de monstrer, il n'y a point d'opiniastreté à ne croire point la Transsubstantiation, ny de sujet de mauuaise volonté de la part des gens raisonnables, il n'y en peut auoir non plus à ne croire point le Sacrifice qui a ce dogme pour fondement, Quant à la seconde, afin qu'on n'ait pas cette opinion de nous que nous soyons mal-aisez à contenter, & que nous cherchions de gayeté de cœur matiere de diui; fion & rupture, apres qu'on nous aura monstré qu'il faut necessairement receuoir la doctrine de la Transsubstantiation : car c'est vne prealable ineuitable, nous nous satisferons volontiers si on nous respond suffisamment à cette difficulté sur le Sacrifice: car bien qu'il y ait yne infinité d'autres preuues de noître doctrine en cette matiere, & que l'Epistre aux Hebrieux y fourmille de passages euidens, la solution de cette ratiocination suffira pour mettre à couuert l'interest de la Croix du Sauueur du monde. Ou bien le Sacrifice fait en la Croix nous a pleinement racheptez de

nos pechez, ou non. Sil nous en a rache-ptez, c'est chose inutile de tascher de faire vne chose desia faite; & iniurieuse à celuy qui l'a entreprise, comme si elle ne l'estoit pas. S'il ne nous en a pas racheptez, c'est ou pource qu'il ne l'a pas pû, ou pource que Christ ne l'a pas voulu. S'il ne l'a pas pû, comment l'expiation qui n'a pû se faire en la Croix, se pourra-t'elle paracheuer en l'Eucharistie : Et quelle asseurance auons nous de nostre redemption, si la mort de Nostre Seigneur n'a pû satis-faire pleinement à la iustice de Dieu son Pere? S'il l'a pû & qu'il ne l'ait pas voulu, qui asseurera que ce qu'il n'a pas voulu fai-re en la Croix, il le vueille faire en la sain-& Cene? La celebration de ce Sacrement porte-t'elle plus de marques de la bonne volonté qu'il a pour nostre redemption, que la souffrance d'vne Croix maudite & ignominieuse? Il est vray qu'on distingue encore icy entre sacrifice de redemption & sacrifice d'application & de representation. Mais cela ne sauisfait pas à nostre demande; car ou bien ces representations & ces applications font vne effective & actuelle propitiation de nos pechez, en satisfaisant à la Iustice de Dieu, ou non. Si

on pretend qu'elles en font, il faut retourner à respondre à la raison precedente, & soudre cette difficulté, si Christ nous a racheptez, ou ne nous a pas racheptez en la Croix. Si on ne le pretend pas, pourquoy ceux qui distinguent auss nous veulent-ils persuader ce qu'ils ne se persuadent pas eux-mesmes? Et puis qu'ils ne croyent pas qu'en la Messe il se fasse aucune reelle expiation, quel sujet d'indignation peuuentils auoir contre nous si nous n'y pouuons non plus consentir? Qu'ils nous souffrent doncs'il leur plaist mettre toute nostre esperance en la Croix de Nostre Sauueur, & ne recognoistre autre oblation propitiatoire de nos pechez, sinon celle qu'il y a offerte. Qu'ils ne nous vueillent point de mal si nous ne pouuons digerer qu'on adjouste à la plenitude de sa satisfaction, comme si la redemption que nous auons en elle estoit imparfaite. Qu'on ne nous impute point comme vn dessaut de pieté, que nous ne donnons point de compagnons à Nostre Scigneur Iesus en fa charge de Sacrificateur. Qu'on ne nous tourne point à crime cette respectueuse timidité qui nous empesche de nous ingerer à faire des oblations ausquelles nous ne voyons point que la vocation de Dieu nous appelle. Bref, qu'on ne trouue ny estrange, ny mauuais si ayant deuant nos yeux de si memorables exemples de la vengeance de Dieu sur ceux qui ont osé entreprendre sur la sacrificature d'Aaron, que les flammes de Dieu les ont consumez, & que pour les engloutir la terre s'est entrebaillée, nous craignons de rien attenter à la sacriscature de Christ, dont la sainsteté est plus grande sans comparaison, & la majesté plus inuiolable.

SECTION VI.

Que ceux de la Religion ne sont point dignes d'auersion, ny pour ne deferer pas à l'authorité de l'Euesque de Rome comme il le veut, ny pour s'estre separez de la communion de l'Eglise, Romaine.

A cause de cette auersion qu'vne grande partie des peuples, & quelques vns de ceux qui sont en authorité, & quasi generalement tous les Ecclesiastiques ont contre nous, peut bien estre en ce que

nous ne croyons pas toutes les choses qui sont receuës en la Religion de Rome; mais ie suis tres-asseuré que quant au Sie-ge Romain, la haine implacable qu'il nous porte, & les persecutions qu'il suscite cotre nous par tout où il le peut, ont pour principal, & peut-estre pour vnique motif, que nous ne voulons pas recognoistre sa puis-sance; car il voudroit qu'il luy en cust cousté le Purgatoire, & la Transsubstantiation, & le Sacrifice de la Messe encore, & tout ce que le commun tient de plus sacré & de plus inuiolable en sa Religion,& que toute l'Europe fust bien reunie dessous son authorité, tellement que le party Catholique & le Reformé luy prestassent leurs forces conjointement pour s'assujettir l'Afrique & l'Asie. Apres cela il voudroit disposer des parties les plus éloignées de l'Orient & de l'Occident, & de fait il a entrepris en ces derniers temps de donner le droict de conquester les vnes & les autres Indes. Et ie ne parlerois pas si hardiment de ce genie de domination, qui depuis Romulus iusqu'à maintenant a tousiours esté inseparablement attaché au Capitole, si les Cours Souueraines de cét Estat ne l'auoient expressément remarqué, & si elles

N iiij

200

ne s'estoient opposées à les entreprises par la generosité de leurs Arrests encore depuis peu d'années. Or si l'ambition de ce Siege le porte à nous hair à cette occasion, tant s'en saut que ceux qui ne sont pas menez de mesmes interests, doiuent imiter sa passion, que toutes sortes de gens nous deuroient aimer de ce que nous combattons sa puissance. En effet, il en affe-&ede deux sortes. L'vne temporelle, dessus les Estats politiques : & l'autre spirituelle, sur les consciences des Chrestiens. Quant à ce qui est de celle-cy, il faut que ie repete icy ce que i'ay desia dit ailleurs, que mon intention n'est pas d'entrer dedans la Controuerse. Ie diray seulement qu'on ne doit pas trouuer estrange si nous ne luy voulons pas deferer tou-te l'authorité qu'il s'attribuë en cét esgard, puis que plusieurs de sa communió la trouuent exorbitante. Pour exemple, si on l'en croyoit, il auroit pareil pouuoir de pardonner les pechez que Nostre Seigneur Iesus, non pascomme ministre de sa grace & de Sa paix, qui dit, Si vous croyez & si vous vous repentez, vos pechez vous sont pardonnez, ce qui est la voix de l'Euagile; mais comme Prince Souuerain en l'Église de Dieu, à qui il

appartient de retenir & de remettre les pechez auec plenitude de puissace. Or qu'elle apparence y a-t'il de souffrir cette presomption en vn homme mortel, que chacun içait estre pecheur comme nous, & qui quelquesfois surpasse les autres pecheurs en atrocité de crimes? S'il ne met pas en auant cette plenitude de puissance ordinairement si cruëment, que de ne faire despendre la remission des pechez d'aucune condition, quoy que chacun sçait que, Sievolo, sie iubec, est la plus ordinaire loy de son Empire, les conditions sous lesquelles il la promet ne monstrent pas moins sa presomption, que s'il lefaisoit d'vne authorité absolument souveraine; car il ne dit pas, si vous croyez, & si vous vous repentez, vos pechez vous scront pardonnez, en quoy il se monstreroit Seruiteur de Iesus-Christ; mais, si vous dites tant de fois vne telle oraison, si vous venerez les reliques d'un tel Sainct, si vous visitez telle ou telle Eglise. A ce qu'il paroisse que c'est luy qui a le droit & l'authorité de faire des loix, à l'observation desquelles il attache & la promesse de la remuneration, & la menace de la punition, comme bon luy semble. Il est vray qu'il ne dit pas ouuertement qu'il

abroge la loy de Christ. Mais tant y a que puis qu'il en ordonne de nouuelles ausquelles nostre Seigneur n'a iamais pensé, & qu'il promet à ceux qui les observeront la mesme remuneration que celle que Iesus-Christ fait esperer à ceux qui garderont les siennes, il s'attribue en l'Eglise vne puissance aussi absoluë que celle de Iesus-Christ. Or de qui est-ce que cela ne choque point l'entendement, qu'vn simple homme, & mortel, & pecheur, s'en vueille tant faire accroire? Il passe mesmes en quelque façon au delà de nostre Seigneur en la distribution de ses recompenses; car ou bien nostre Seigneur a promis vne mesme remuneration vniuersellement à tous les croyans, ou s'il y a mis quelque inegalité, tant y a qu'il en a remis la reuelation au dernier iour, & qu'il n'a point designé les personnes particulieres à qui vne plus grande mesure de gloire est assignée. Au lieu que l'Euesque de Rome pretend auoir le droict de distribuer les couronnes de là haut, en faisant les vns Sainets, & se contentant de faire les autres Bien heureux, & leur assigne leur culte religieux proportionnéà l'eminence de ces degrez, ainsi qu'il plaist à sa Sainteté & à

pour ceux de la Relig.

sa Beatitude Pontificale. Qui nous accusera d'incredulité ou d'opiniastreté si nous ne pouuons croire que ceux-là dispensent la gloire & la felicité de là haut, de qui leurs propres historiens disent qu'ils n'y ont point de part; & que Baronius & Genebrard ne traittent point autrement que comme des Apostats & des monstres? Il nese contente pas de faire plus que nostre Seigneur n'a fait en cela, il deffait ce que nostre Seigneur a fait & constitué en autres choses. Ie vous prie à quoy faire les Dispenses qu'il distribue ainsi qu'il luy plaist, sinon à monstrer qu'il a le droit, ou de permettre ce que Iesus-Christ a defendu, ou de defendre ce que Iesus-Christ auoit laissé libre? Car si ce dont il dispensea esté defendu de Dieu, il entreprend sur l'authorité de ses loix. Si ce dont il dispense auoit esté laissé en nostre liberté, la defense qu'il en auoit faite luy-mesme, & dont il nous veut dispenser, est vn attentat à la liberté que Dieu auoit laissée à nos consciences. Or quelle ombre de verisimilitude y peut-il auoir en cela, que le Sauueur nous ait laissé ses loix pour regle de nostre conduite quand il est monté au Ciel, & qu'il ait donné aux hommes mor204 Apologie

tels la puissance de les enfraindre? Mais infraction des loix de Dieu, qu'il y ait en ces Dispenses, ou non, tant y a que nous ne pouuons digerer, & nul ne le doit trouuer mautais, que l'Euesque de Rome don-ne des loix à nos consciences. Si quand il en establit quelques-vnes, il disoit; Ie n'auance rien de mon chef, & ne veux point dominer sur les beritages du Seigneur, ainsi que Sain&t Pierre l'ordonne; le mets seulement en auant ce que nostre Seigneur nous a laissé en sa Parole: Nous aurions en cela la voix d'vn seruiteur qui fait profession de ne vouloir rien faire valoir sinon la volonté de son Maistre. Ainsi ce seroit à nous à chercher en cette parole si ce qu'il diroit y seroit fondé, pour disposer nos consciences à respecter comme il faut l'authorité de ce grand Dieu, à quiseul, en ce qui est de la Religion, elles doiuent oberissance. Mais ou bien il ne nous parle du tout point de la Parole de Dieu en ses loix, où il veut que s'il y en fait mention, nous nous en rapportions entierement à son interpretation: de sorte qu'il vaudroit autant qu'il les nous donnast absolument de son chef, que de nous y alleguer la Parole de Dieu, & neantmoins ne vouloir

pas que nous les examinions, pour voir si elles y sont conformes. Or quoy? Que peut auoir l'Euesque de Rome qui donne telle authorité à ses constitutions, que nous y soûmettions nos ames? Est-il Dieu pour regner dedans nos esprits, comme les Rois de la terre regnent dessus nos corps? Ou de quelles preuues peut-il soustenir vne si haute pretention, que Dieu luy ait resigné son authorité, pour auoir vnempire absolu dessus les ames des hommes? Enfin, i'atteste nos plus passionnez aduersaires, s'il est raisonnable de nous condamner pour ne fouffrir pas qu'il empiete la dominatió absolue dessus nos consciences. Si nous demandons à l'Euesque de Rome les titres sur lesquels il sonde sa vocation, & cette puissance illimitée qu'il pretend sur l'Eglise de Dieu, il nous produit quelques textes de l'Escriture: Comme, Tues Pierre; & Pais mes brebis, & semblables. Si nous voulons dire quelque chose sur l'intelligence de ces mots, il nous dit qu'il les faut entendre, nonselon nostre sens, mais selon son interpretation. Si nous voulons reuoquer en doute l'authorité de son interpretation, il nous dit que tant s'en faut que nous deuions en des mander quelque autre preuue que le tes-moignage qu'il luy rend, que la Parole de Dieu mesme ny ne peut, ny ne doit auoir aucune authorité enuers nous, sinon celle qu il luy donne par son tesmoignage. Que sanscela on n'en feroit pas plus de cas que des fables d'Esope, ou de l'Alcoran de Mahomet, & qu'enfin apres toutes questions, toutes interrogations, toutes ratiocinas tions, il faut croire ce qu'il a dit, pource qu'il l'a dit, & ne croire pas à Dieu mesme qui parle dans le Vieil & dans le Nouneau Testament, sinon autant qu'il plaira au souuerain Pontife de Rome. Qui se perfuadera qu'vn homme foit plus croyable que Dieu, ou que les Constitutions du siege Romain portent plus de marques de diuinité que les escrits des Prophetes & des Apostres? On tient en la communion Romaine que l'Eglise ne peut errer : mais quand il faut expliquer en qui reside cette grace de l'infallibilité, les opinions se partagent. Les vns disent qu'elle reside au Concile, qu'ils esseuent au dessus du Pape à cette occasion: les autres soustiennent qu'elle reside au Pape, qu'à cette raison ils mettent au dessus du Concile. La Sorbonne a esté autrefois de ce premier senti-

207

ment; & a esté suiuie par ce qu'il y auoit de plus sain & de plus sçauant en cette communion. Les Iesuites qui sont venus depuis ont pris determinément l'autre party, & ont tiré beaucoup de gens apres eux, & peut-estre quelques-vns de la Sorbonne mesme. Ceux-cy accusent les autres de rebellion contre le chef de l'Eglise de Iesus-Christ reeux-là accusent le Pape de presomption, & d'entreprendre dessus les droits de l'Eglise. Et pource que le Pape n'oze hasarder la decision de cette quéstion, & qu'à son aduis il est beaucoup plus expedient de gaigner pied à pied dans les esprits par les escrits de ses Docteurs, & par l'entremise de ses emissaires, que de s'exposer au iugement d'vn Concile, qui selon l'apparence se porteroit à la defense deses propres droits gil souffre en sa communion ceux qui ne luy accordent pas cetre puissance souveraine. Pourquoy donc nous hairoit-on pource que nous la luy refusons, & que nous nous opposons encore plus vigourensement qu'aucun à sa tyrannie ? Quant à ce qui est de la puissance temporelle qu'il pretend auoir dessus les Rois, les esprits n'y sont pas moins par tagez, & la qualité de ceux qui y ont inte208

rest rend la dispute plus esclatante; car il est question de la souveraineté des Potentats, que le Pape & ses adherans pretendent estre soumise à sa domination, au lieu que les Princes & leurs bons sujets la maintiennent estre absolument independante. Et icy encore veritablement nous meritons la bien-veillance des gens de bien, & qui sont affectionnez comme il faut à leurs Princes & à leur Patrie; car bien que ceux qui fauorisent les desseins du Pape en cet esgard, disent de cette puis-sance temporelle qu'il affecte sur les Estats, qu'elle ne luy convient qu'indirectement seulement, pource qu'elle ne luy a esté donnée sinon pour seruir à la manutention de l'autre, & pour la faire valoir, si est-ce que directement ou indirectement, il assujettit tant qu'il peut les Couronnes à sa Tiare. Les Parlemens à la verité s'opposent ouuertement à cét attentat; la Sorbonne par ses Decrets, les a secondez où l'occasion l'a requis; &, ce qui vaut mieux que ny les Arrests, ny les Decrets, nos Rois, où la necessité l'a voulu, n'ont la mais manqué d'y dégainer leur espée. Mais on nous permettra pourtant de dire, que la façon dont nous nous sommes pris à en

à en arrester les progrez, est de toutes sa plus efficace, si on nous vouloit entendre. Tandis qu'on permet à l'Euesque de Romedese preualoir de cette puissance spirituelle & directe qu'il viurpe effectiuement, quoy que le droit ne luy en ait point encore esté octroyé par les Conciles, & tandis qu'on souffre qu'il en espande la creance par tout, & mesmes dans les Conseils des Rois, il raisonne tousiours assez probablement qu'elle luy auroit esté donnée inutilement, si l'autre pour la soustenir ne venoit en consequence. Et s'il est vray qu'il soit le Vicaire de nostre Seigneur enuers les Chrestiens, pour leur donner des loix selon lesquelles ils se reglent en ce qui est de la pieté & de la vertu, il semble qu'il ait quelque apparence de raison de vouloir estre son Lieutenant, en ce qui est de l'vsage de la puissance temporelle; car si nous considerons nostre Seigneur comme Mediateur seulement, l'authorité que son Pere luy a donnée dessus toutes choses a ces deux relatios, qu'entant qu'elle s'estend dessus les consciences des hommes, pour les former aux vertus qui sont necessaires au salut, elle luy appartient directement, pource que sa char210

ge de Mediateur regarde directement le salut & la redemption de l'ame. Mais entant qu'elle s'estend sur les choses de la vie presente, & dessus l'authorité des Rois, elle ne luy a esté donnée sinon, pour le direainsi, aucunement indirectement, afin de gouverner tellement toutes choses icy bas, que rienne puisse empescher le salut de son Eglise, pour laquelle seule il est Mediateur actuellement. Comme donc elle luy a esté donnée à cet effet, & comme sa charge de Mediateur n'a peu s'en passer, celuy qui s'attribuë l'honneur d'estre son Lieutenant en vne partie de son authorité, n'est pas sans quelque couleur de raison enuers ceux qui la luy veulent accorder, de pretendre encore la communication de l'autre. Et il sçait si bien mesnager cette probabilité de son raisonnemet, & a tant de gens à sa deuotion pour gouuerner les esprits de la pluspart de la Chrestienté, qu'elle passe pour demonstration enuers vne infinité de personnes. Ainsi les Parlemens, par l'affection qu'ils portent à l'authorité des Rois, & par le iuste interest de la leur propre, conseruent les bons sentimens, & les authorisent tant qu'ils peuuent. La Sorbonne, ou par zele à la

Royauté, ou par l'amour de sa propre liberté, ou par quelque autre telle consideration, ne s'est point iusques icy absolument laissée corrompre. Enfin, la puissance & la generosité de nos Rois a tousiours vaillamment soustenu les droits de leur Estat, & la splendeur de leur Couronne. Mais cela n'empesche pas qu'il n'y ait dedans tous les Ordres, quantité d'esprits infectez de cette pernicieuse opinion, que les Papes sont au dessus des Rois, & que leur authorité est dependante de la sienne. De façon que s'il arriuoit quelques fascheux temps, comme nos peres en ont veu, où les bons sentimens ne fussent pas armez de toute la puissance qu'ils ont maintenant, il ne faut pas douter que les mauuais n'en prissent l'occasion pour esclorre. Quant à nous, nous auons porté la hache à la racine de cette ambition, en ostant à l'Euesque de Rome la puissance spirituelle qu'il pretend, & auons par ce moyen rendu nos ames impenetrables à toutes sortes d'opinions, qui seroient pour y choquer tant soit peu la fidelité que nous deuons à nos Princes; car ne recognoissans au monde, hors nostre Seigneur Iesus, homme quelconque au dessus d'eux, on se 212

peut bien asseurer que nostre obeissance & nostre fidelité demeure absoluëment inuiolable. Tellement qu'en cette partie en laquelle on nous accuse de n'estre pas assez bons Chrestiens, nostre doctrine nous oblige à estre parfaitement bons François;au lieu qu'autant qu'on s'éloigne de nostre sentiment en cela, autant donne t'on sans y penser, d'ouuerture & d'auantage à l'ambition estrangere. Mais certes c'est à grand tort qu'on nous accuse de n'estre pas bons Chrestiens en cét esgard. C'est le zele que nous auons à la gloire de Iesus-Christ, qui nous rend irreconciliables auec l'Euesque de Rome, & cela pour trois raisons principales. La premiere est, que de ce siege là, comme d'vne source seconde à merueille, sont venuës en l'Eglise toutes ces doctrines que nous ne pouuons croire, & que nous estimons ne s'accorder nullement auec la Religion de Iesus-Christ. Ou si ce ne sont les Euesques de Rome qui les ayent inventées, ils les ont receuës auec tant d'auidité, ils les ont prouignées auec tant desoin, ils les ont defenduës auec tant de chaleur, ils les ont tellement appuyées de leur authorité, & ont excité tant de persecutions contre

ceux qui ont voulu y resister, que sans leur saire fort on leur en peut bien attribuer l'origine. Ayans donc en l'ame vne persuasion si profonde, que ces dogmes ont gasté la pureté de l'Euangile de Christ, comment pourroit-on trouuer mauuais que nous ayons cette implacable animosité contre çeluy que nous en croyons estre la cause ? La seconde est, que comme nous l'auons veu cy-dessus, il s'attribue quantité de choses, qui n'appartiennent sinon à nostre seul Redempteur, & dont la communication à qui que ce soit, ou ruine, ou au moins elbranche trop notablement la Souveraine authorité que son Pere luy a donnée; car il veut regner dedans les consciences des Chrestiens, quoy que ce soit l'empire de la seule Diuinité, où l'homme mortel ne doit rien attenter, & où il nesçauroit atteindre. Il ordonne comme i'ay dit, de toutes choses à sa fantaisse, & denonce eternelle damnation à ceux qui n'obeiront pas; il pardonne comme il luy. plaist, & veut qu'on soit aussi asseuré de son pardon, que si on l'auoit receu de la bouche de Dieu mesme. Il determine de ce qu'il faut croire, & commande qu'on y adjouste foy comme aux oracles divins

Apologie 214 Il dispense de ce qu'il veut, & mesmes des commandemens de Dieu, & pretend que sa dispense met à couvert des menaces du Souuerain Iuge du monde. En vn mot, si Iesus-Christ estoit descendu du Ciel, il ne requerroit pas de nous vne plus entiere ny plus absoluë obeissance à ses ordonnances. Or nous ne croirions pas estre bons Chrestiens si nous consentions à cet attentat, & penserions trahir indignement la gloire de nostre bon Maistre. La troisséme finalement est, que par quelque rencontre que ce soit, il est arriué qu'vne infinité de choses que nous voyons auoir esté predites d'yn certain ennemy iuré de Christ, se rapportent merueilleusement à ce qui paroist en l'Euesque & en la Cour de Rome. Et pource qu'il est dit que cét ennemy doit estre manifesté aux derniers temps, & que desormais apres seize ou dix-sept cens ans tous ces temps doiuent estre estimez faire partie de ces derniers, toutes choses de cette nature nous sont suspectes; car nous ne nions pas qu'il n'y ait quelquesfois de la fallace dans les apparences, & qu'il y a beaucoup de choses qui ont quelque res-

semblance de ce qu'elles ne sont pas, & d'autres qui sont ce dont elles ne portent

pas les marques bien euidentes. Nous sçauons mesmes que lors qu'il est question de l'interpretation des Propheties, on est sujet à s'y tromper auant qu'elles soient esclaircies par les euenemens, & qu'encoreapres les euenemens, on ne rencontre pas tousiours à les parfaitement adjuster ensemble. Mais tant y a que la desfiance estant la mere de seureté, & les Chrestiens s'estansbien passez de Pape au commencement, nous aimons mieux nous en pafser, & nous abstenir de toute communion auec qui que ce soit, qui ait quelque air de cetaduersaire. En quoy l'on peut penser que nous ne sommes menez d'autre consideration sinon du zele de nostre Seigneur, & du desir de nostre salut, qui nous deuroient sans doute excuser, quand il y auroit, ce que nous ne croyons pas, quelque chose d'vn peu scrupuleux en nostre conduite.

Ic penserois auoir satisfait aux plaintes les plus importantes qu'on fasse ordinairement contre nous à l'égard de ce que nous ne croyons pas, sinon qu'on nous accuse encore de n'auoir pas assez deseré à l'authorité de l'Eglise, & de ne recognoistre pas assez les bien-faits que nous en auons receus; car quoy qu'il en soit; on dit que c'est elle qui nous a ensantez à Dieu par le Baptesme, & qui nous a donné la connoissance de Iesus-Christ. C'est à elle à qui Dieu auoit donné l'authorité de nous gouverner comme à nostre mere, & à qui il auoit remis le soin de nostre education. Et neantmoins nous nous sommes separez d'elle comme d'auec vne estrangere, & luy faifons tout ouvertement la guerre, comme si c'estoit vn ennemy. Au lieu de supporter doucement ses defauts, en cas qu'elle en eust, & de respecter plustost ses rides, que de luy infulter; pource que l'aage de tant de siecles a gasté quelque chose de sa premiere beauté, nous l'auons diffamée de tous costez; & luy auons fait les reproches les plus scandaleux 3 & donné les titres les plus iniurieux du monde. Estans sortis de ses entrailles, ne deuions nous pas gar-der quelque reuerence à son nom, & conseruer autant que nous pourrions sa bonne reputation deuant les hommes? Ce sont les accusations qu'on nous fait, & Ivn des principaux sujets pour les quels ceux qui sont demeurez dans la communion dont nous sommes sortis,

ont de l'auersion contre nos personnes. Certainement s'il estoit permis de distinguer entre nous & nos peres, en ce qui est de la Religion que par la grace de Dieu nous tenons, la plus-part de ces accusa-tions ne nous toucheroient aucunement; car pour ce que par l'Eglise on entend seulement la Romaine, nous pourrions incontinent respondre, que quant à nous elle ne nous a point engendrez à Iesus-Christ, & que ce n'est point d'elle que nous auons receu le signe du sainct Baptesme, ny nostre education en l'esperance du salut. Nous tenons toutes ces choses de la communion Reformée, dans laquelle nous fommes nez, & n'en auons l'obligation à aucune autre. Nos ayeuls sont bien sortis de la communion de Rome à la verité, pource qu'ils y estoient auparauant: mais pour nous, qui n'y auons ia mais esté, on ne nous peut accuser de l'auoir abandonnée? Quand donc l'action de nos peres auroit esté tachée de quelque manque de respect. & de quelque deffaut de gratitude enuers cette Eglise-là, il ne seroit pas raisonnable d'en faire tomber le blasme sur nous, ny que s'ils ont mangé l'aigret, nous en ayons les dents agacées. Quant à nous,

pour ce que c'est l'Eglise Resormée qui nous a engendrez à Dieu, & qu'elle nous nourrit en la cognoissance de lesus-Christ beaucoup plus purement que ne sçauroit faire la Romaine, si nous nous separions d'elle pour entrer en la communion de l'autre, veu que nous n'en auons point de sujet, & que nous ne voyons rien en elle qui nous offense, ne meriterions-nous pas qu'elle fist contre nous en beaucoup plus forts termes, les plaintes que la Romaine fait contre l'action de nos ayeuls? Ce qu'on dit qu'ils ont eu tort de se separer de l'Eglise en laquelle ils estoient nez, & à laquelle ils auoient tant d'obligations, ne iustifie-t'il pas clairement la resolution que nous gardons de demeurer en celle où nous sommes? Car autrement nous ferions tout de mesme que si estant arriué de la dispute entre nostre mere & nostre bisayeule, nous abandonnions la maison de celle qui nous a prochainemet donné nostre estre, quoy qu'elle ait vn merueilleux foin de nous, & qu'elle nous esleue à toute forte de vertu & de pudeur, pour nous attacher à celle que nous ne recognoissons pour origine de nostre estre sinon de loin, & à qui la foiblesse de l'aage ne permet pas de remedier aux desordres que la plus-part des siens commettent chez elle. Mais, bien: souffrons qu'on nous impute la faute de nos peres, s'il y en a, & voyons si leur action est telle qu'elle merite ce nom, & qu'elle ait deu attirer la mauuaise volonté du reste des Chrestiens dessux & dessus nous. Il est certain que c'est de l'Eglise Romaine qu'ils ont receu le Baptesme, & qu'ils ont succé le premier laict de la cognoissance du Sauueur. Et tandis qu'ils ont esté comme des enfans en intelligence, & qu'ils ne se sont point apperceus de la façon de laquelle on les nourrissoit, ils ont vescu dans vn merueilleux respect à toutes ses ordonnances; à peu prés comme les petits enfans aiment leurs nourrices, pource qu'elles les portent au col, qu'elles les jouent & les ébatent, & qu'elles leur donnent la mammelle, sans discerner quand ilstettent si c'est de bon ou de mauuais laict. Depuis qu'ils sont deuenus grands, & que Dieu a illuminé leur raison, ils ont recognu que ce qu'ils auoiet succé de la mammelle de leur mere, & de leurs nourrices, estoit corrompu, & que les alimens qu'on leur presentoit continuellement, estoient quasi tous si gastez,

qu'auec fort peu de nourriture qu'ils y trouvoient, ils en tiroient quantité de suc qui auoit des qualitez extremement veneneuses. On seur enseignoit bien qu'il y auoit vn Dieu & vn Mediateur entre Dieu & les hommes: mais on enuironnoit celà d'vne telle foule de Sain & de Sain & s. qu'on leur proposoit pour objet de leurs adorations, que leur deuotion s'arrestoit d'ordinaire toute sur eux, & ne paruenoit pas jusques au vray Dieu & au vray Mediateur, sur lesquels seul elle doit tendre. On leur disoit bien que le Seigneur Iesus a souffert la mort en la Croix pour eux; mais on ne faisoit autre insistance sur cette doctrine sinon de leur monstrer vn Crucifix; du reste, les satisfactions des Saincts, les souffrances des Martyrs, le thresor des Indulgences, les peines du Purgatoire, la propitiation de la Messe, les merites des œuures, & les autres aydes de cette nature, que les hommes auoient trouuez contre le sentiment du peché, leur estoient tellement inculquez, que la satisfaction de Christ demeuroit estoussée là dessous, & ne desployoit quasi aucune efficace en la conscience. On leur disoit bien que lesus-Christ est là haut au Ciel: mais

on leur repetoit si souuent qu'il estoit aussi dans l'Hostie, on le mettoit en cét estat si assiduellement deuant leurs yeux, on y attachoit leurs esprits de telle façon, on leur en recommandoit si diligemment & la veneration & l'vsage, qu'au lieu d'esleuer leurs ames en haut pour chercher le Sauueur à la dextre du Pere en vn estat glorieux, tous les mouuemens de leur pieté s'espandoient dessus les accidens d'vn petit morceau de pain, sous lesquels on leur .disoit qu'il estoit enueloppé icy bas en terre. On les aduertissoit quelquessois qu'il y a vncertain liure qu'on nomme la Parole de Dieu: mais ils n'en tiroient non plus d'instruction ny de consolation que s'il eust esté aux Indes. Les exemplaires en estoient rares à merueille, comme maintenant encore en Italie & en Espagne c'est vn liure quasi entierement incognu.Ceux qui leur en pouuoient tomber entre les mains estoient en langue où ils n'entendoient du tout rien; ou s'ils y entendoient quelque chose, il ne leur estoit pas permis d'y lire. Au lieu de cela tout estoit remply de Legendes de Sain as, de constitutions Papales, de recits de faux miracles & de vaines visions, & de liures de deuotion esgalement remplis d'attraits à la superstition, & d'inutiles impertinences. On leur faisoit bien à la verité quelquesfois quelques Sermons; mais on n'y entendoit resonner autre chose sinon, ou la commemoration de la vie des Saincts, ou des exhortations au seruice de la Vierge, ou la recommandation des pardons émanez du Siege Romain, ou le debit des merites de surerogation, ou des contes extrauagans & fabuleux, sans aucune solide instruction en la doctrine de l'Euangile. On les exhortoit à estre pieux & deuotieux: mais cette deuotion consistoit à frequenter souuent les Eglises, pour y marmonner quel-ques prieres ausquelles ils n'entendoient quasirien, à assister aux processions sans sçauoir à quel dessein, à chanter quelques Litanies aux Saincts de Paradis, à faire des offrandes aux Autels, & à faire force fondations de Messes pour eux & pour les ames de leurs peres. Enfin, les chapelets, les Agnus Dei, les grains benits, les aspergés d'eau consacrée, les petits morceaux de bois de la Croix enchassez precieusement, quelques esclats de vieux ossemens de morts, quelques lambeaux de leurs habillemens, quelque petit ais demy pourry

resté de leurs bieres, quelques chandelles offertes à vne image, quelques agenouillemens deuant vn Crucifix,& quelque pelerinage au sepulchre d'vn Martyr, estoit cela en quoy consistoir alors le principal de la pieté en laquelle on exerçoit nos ancestres. C'estoient là les alimens dont on les nourrissoit, au lieu de la bonne doctrine de la Parole de Dieu, qui seule peut donner & vne salutaire instruction, & vne solide consolation, & de bons motifs à la vraye sanctification, & de bons & fermes fondemens à l'esperance. Et ie ne crains pas qu'on m'accuse d'en vouloir faire accroire quand ie parle ainsi; car ceux de l'Eglise Romaine mesme, qui ont quelque cognoissance de ce qui se faisoit il y a deux cens ans en la Chrestienté, & qui veulent parler auec ingenuité, aduouent franchement que sans la predication de Luther & de ses compagnos, le nom de Iesus-Christ s'en alloit quasi entierement esteint dans la memoire des hommes. Quand donc Dieu a fait cette grace à nos peres de recognoistre la mauuaise disposition que ces alimens auoient donnée à leurs esprits, & les mauuaises habitudes qu'ils en auoient contractées, ils ont crû estre obligez par

toutes fortes de deuoirs & enuers autruy, & enuers eux-mesmes, d'aduertir leur mere de ce mal, & de la prier d'y donner ordrc. Ce qu'ils ont fait tant afin de corriger leur propre temperament, en se seruant desormais de viandes plus salubres, que pour empescher que leurs freres, qu'elle enfantoit iournellement, ne fussent à l'aduenir aussi mal nourris & aussi mal esteuez qu'eux. Et nul ne peut douter que la charité fraternelle, que les Chrestiens se doiuent porter les vns aux autres, ne les y obligeast estroitement, comme les affections naturelles obligent ceux qui sont les plus auancez en aage entre les enfans d'vne maison, de pouruoir entant qu'en eux est que les plus petits soient nourris comme ils doiuent estre. Or le moyen d'y donner ordre estoit que la mere mesme changeast la premiere le regime de sa vie, afin de faire de bon suc pour le donner à ses enfans: qu'elle eust soin de la conduite des nourrices ausquelles elle les commettoit, afin qu'elles ne gastassent pas leur propre sang par leurs débauches; ce qu'elles ne pouuoient faire sans vitier les parties nobles de ceux qu'elles allaitto ient: & enfin, qu'elle changeast tout le gouverne-

ment

ment de sa maison, afin que ceux qui auoient le soin de faire les prouisions, ou n'y apportassent que de bons & salutaires alimens, ou ne les gastassent point euxmesmes de leurs empoisonnemens. Pour cela il falloit que Rome se reformast la premiere, puis qu'elle se yante d'estre la mere de tous les Chrestiens. Il falloit qu'elle pourueust en toutes les parties de la Chrestienté, à ce que les Euesques & les Prestres, ausquels elle pretend auoir le droict de donner ses enfans à nourrir, ne leur enseignassent que les doctrines de l'Euangile, & qu'ils les destournassent de tout ce qui peut endommager la pureté de la pieté. Bref il falloit qu'elle s'employast à ce que les Vniuersitez, les Academies, & les Colleges, qui sont comme des lieux publics, dont on apporte les do-Arines en l'Eglise, suffent repurgez de toutes erreurs, afin que ceux qui en viendroient n'instillassent rien dans l'esprit du peuple, qui ne fust conforme à la verité,& propre pour engendrer la pieté, la consolation, & l'esperance. Cét aduis donc que nos ayeuls ont donné à l'Eglise Romaine, meritoit-il blasme, ou louange, & dequoy deuoit-il estre recognu, de haine, ou

d'amour? Et maintenant encore que nous persistons à luy departir ces bons aduertisl'émens, qui ne procedent sinon du zele de la gloire de Dieu, & de la charité que nous auons pour le falut de nos prochains, y a t'il sujet de crier contre nous comme contre des enfans desobeissans & rebelles à leur mere? Pour ce qui est de l'authorité que nostre pere celeste luy auoit donnée, nous recognoissons certes que nos ayeuls ont esté obligez d'en faire consideration. Mais aussi prions nous tout le monde de recognoistre que cette authorité-là n'est ny infinie, ny illimitée, ny si absolument souueraine, qu'elle les ait deu empescher de pouruoir à ce qu'ils ont crû estre de leur deuoir enuers Dieu, & de l'esperance de leur salut; car il n'y a authorité de mere si respectable en la terre, qui oblige les enfans à se laisser empoisonner, quoy qu'il n'y aille sinon de la vie presente seulement. Que peut-ce donc estre lors qu'il y va d'vne selicité eternelle? Et si on dit que les ensans doiuent auoir assez bonne opinion de leur mere, pour ne croire pas qu'elle soit ny si meschante qu'elle voulust, ny si imprudente que sans y penser elle permist qu'on

leur donnast du poison, à la verité tels soupçons ne doiuent pas venir legere-ment en la pensée. Mais quand on se sent desia le corps affecté, & que toutes les son-Etions en sont alterées; quand apres auoir attentiuement consideré les qualitez des alimens que l'on prend, on les a recognus pernicieux, & qu'on a toutes sortes de preuues certaines & indubitables que le mal est venu de là, alors il n'y a personne. qui ne doiue pouruoir à sa seureté, & n'y a respect de mere qui tienne. Nos peres donc ayant recognu à toutes les operations de leurs ames, que la doctrine qu'on leur enseignoit estoit toute imbue de venim, que leur pieté enuers Dieu en estoit gastée d'idolatrie & de superstition, que leur charité enuers le prochain en estoit toute languissante, que la paix de leurs esprits estoit continuellement troublée, & leurs consciences pleines d'inquietude & d'ardeur, que l'esperance de la bien-heu-reuse immortalité estouffée par des doutes & des craintes irremediables, & que generalement toute l'economie de leurs esprits estoit en desordre, que pouuoient-ils faire sinon rechercher la cause de leur mal, & apres

l'auoir cognu courir promptement au remede? Et puis que la reuerence que leur Pere celeste leur auoit enjoint de porter à l'Eglise, n'auoit pour but sinon leur salut, estoit-il raisonnable qu'ils la gardassent encore quand elle y deuenoit pernicieuse? Adjoustez à cela qu'en vne telle occurrence, apres qu'vn bon enfant auroit fait sa plainte à sa mere, il se trouueroit merueilleusement surpris si au lieu de luy donner quelque satisfaction, il n'en remportoit que ces responses. Ie ne sçaurois vous tromper, & ne sçaurois estre trompée moy-mesme. Ie ne puis faillir en vostre conduite, & suis impeccable en la mienne, & yous deuez vous laisser mener à mon authorité aueuglément. Ce n'est pas à vous à iuger de la qualité des alimens dont on vous nourrit; c'est à moy que vostre pere a laissée en son absence dispenfatrice des biens de sa maison, administratrice deses affaires, tutrice & curatrice de ses enfans, auec vne authorité independante & souveraine. Ie vous prie cette procedure ne seroit-elle pas indigne d'yne bonne mere, & n'augmenteroit-elle pas les soupçons que ses enfans auroient dessa de son gouvernement? Ie diray encore

pour ceux de la Relig. 229 quelque chose dauantage. Si pour faire semblant de donner quelque satisaction à ses ensans, & de leur oster ces sascheux scrupules de l'esprit, elle faisoit vne assemblée de Medecins pour examiner ces alimens, & qu'elle n'y appellast sinon ceux qui leur sont suspects, & de l'ignorance ou de la perfidie de qui ils se plaignent, & qu'en cette congregation on ne vist rien finon des menées & des artifices pour prononcer à quelque prix que ce fust en faueur de son authorité, & pour affermir sa domination, cela fans doute augmenteroit encore leur mécontentement, & leur mettroit de plus mauuaises pensées en l'a? me. Or c'est ce que l'Eglise Romaine a fait à nos peres; car au lieu d'escouter leurs plaintes,& de leur y donner quelque iuste satisfaction, elle a respondu, qu'elle ne pounoit errer, que Dien l'auoit establie la dispensatrice de ses secrets, qu'elle auoit dans l'ecrain de sa poietrine tous les mysteres du Royaume des Cieux, qu'elle estoit la depositaire de la Tradition, qu'à elle appartenoit la decision des Controuerses pour y prononcer infailliblement, qu'elle seule pouvoit interpreter la parole de Dieu sans peril de s'y tromper, que l'Escriture n'est que la lettre de creance, & l'Eglise

l'Ambassadeur à qui les dogmes divins avoient esté commis pour les reueler; que cette lettre de creance mesme n' avoit de credit & d'authorité sinon autant que l'Eglise luy en donnoit, & qu'elle l'authorisoit envers nous par sontémoignage. Puis quand à la sollicitation des Rois & des Empereurs elle s'est disposée à conuoquer vn Concile pour, vuider les differens suruenus entre elle & nous, elle n'a pas voulu permettre qu'aucun s'y trouuast, sinon ceux qu'elle sçauoit estre nos ennemis, & a si bien sçeu mesnager toutes leurs intrigues, que de Rome on enuoyoit à Trente la decisson toute nette de ce qui s'y disputoit ; iusques là que mesmes les Ambaffadeurs de nos Roys n'ont pû s'empefcher d'en tesmoigner ou leur mespris, ou leur indignation par des sarcasmes : car, c'est à cette occasion que Monsieur de Lansac disoit, au rapport de Mosseur de Thou, & du Pere Paul, Qu'on y apportoit de Rome le S. Esprit dans une valise. Et la belle histoire que ce dernier, l'vn des plus grands hommes de ces derniers temps, & de communion Romaine pourtant, a mise en lumiere touchant ce Concile, est vne preuue tres-euidente & tres-authentique, que Romen'y a vise à autre chose qu'à l'establispour ceux de la Relig. 231 sement de sa grandeur. Au nom de Dieu, qu'elle opinion nos peres pouvoient-ils auoir de cette conduite? Et que peuvent, des enfans, qui sont en cette extremité, penser ou soupçonner de leur mere : Sur tout il est souverainement à considerer, que quand auec de si violentes presomptions d'empoisonnement, il y a encore des indices tres-preignans que la mere fausse la foy à son mary, & qu'elle se laisse cageoler & posseder à des gens qui la corrompent, il est certes naturel aux enfans. de pouruoir par toutes voyes raisonnables à la conservation de leur vie, mais il est de leur deuoir inuiolable d'empescher autant qu'il leur est possible, le des-honneur de leur pere, & le diffame de sa maison. Partant puis que ceux qui nous ont, deuancez en nostre profession ont eu cette creance, & si profondement emprainte, & si parfai tement bien fondée, qu'en l'Eglise Romaine non seulement ils couroient risque ineuitable de leur salut, mais qu'elle se laissoit aller à des services religieux enuers les creatures, qui sont dans la Religion la mesme chose que l'adultere est au mariage, il n'y a personne si déraisonnable qui ne les exempte de blasme s'ils ont tasché

232 Apologie de remedier à l'vn & l'autre de ces maux. Pour ce qui regarde la separation d'auec elle, c'est bien certes vne chose qui semble aucunement scandaleuse, de voir des enfans abandonner la demeure de leur mere, pource qu'ils blasment sa façon de viures& qu'ils disent hautement qu'ils ne s'y trouuent pas en seureté. Mais quoy? Pour demeurer dans les mesmes comparaisons dont nous nous sommes serus, ie fais toure personne raisonnable iuge de cette action. Nos ayeuls estoient dans la maison de leur mere à table auec elle & auec ses autres enfans; ils se sont apperceus qu'on ne leur seruoit sinon des viandes dangereuses, & ont aduerty & leur mere & leurs freres de s'en abstenir, de peur de quelque funeste accident. Au lieu de faire profit de cét aduertissement, on les a premieremet estimez des insensez. Puis quad eux-mesmes les premiers, afin d'en donner l'exemple, ont voulu s'en abstenir, & la mere, & les autres, apres diuerses paroles outrageuses & iniurieuses, leur ont jetté les flambeaux & les affiettes à la teste auec quelque espece de fureur. Ils se sont retirez doucement, & pour ne mourir pas de faim, ils ont dressé vne table à part dans

la mesme chambre de leur mere, ou au moins dans la court de sa maison: Car au commencement nos peres prescherent en diuers lieux dans les nefs des mesmes Eglises, où leseruice de la Religion Romaine se faisoit. Aux lieux où on ne leur permettoit pas de se seruir des mesmes Temples à des heures differentes, ils prefchoient dans les carrefours, ou dessous les Halles des villes, & par tout ailleurs où on leur en donnoit la commodité. Là on ne les a pas encore voulu fouffrir, & leur mere a premierement fait des proclamations violentes, qu'elle ne les tiendroit pas pour ses enfans, & qu'elle leur defendoit l'entrée de sa maison, s'ils ne se laissoient nourrir, & s'ils ne luy permettoient de se gouverner entierement à sa fantaisse. Puis elle a armé ses autres enfans & ses seruiteurs à l'encontre d'eux, & les a essoignez d'elle tant qu'elle a peu à belles harquebusades: Car comment pouuons nous autrement appeller les Anathemes qu'elle a fulminez contre nous, les Canons qu'elle a dressez dedans ses Conciles, & ses horribles persecutions dont elle a tasché de nous ruiner? l'appelle donc icy Dieu & les hommes à iuger, à qui d'elle ou de nos

234 Apologie

ayeuls doit estre donné ce blasme du schisme qui nous separe. Enfin, pour ce qui est des termes qu'on appelle scandaleux & iniurieux dont on se plaint que nous l'auons diffamée, à la verité si nous n'eussion's deu auoir aucuns autres esgards sinon ceux de la retenue des enfans, & de leur soin à couurir les defauts de ceux qui les ont engendrez, le silence nous eust eité plus conuenable, que les bruits. & les vacarmes qui naissent de ces contestations. Mais nous auons deu auoir en singuliere recommandation le salut de tous les Chrestiens, & n'auons peu le leur procurer sinon en disant ouuertemet la verité. Comment pouuions nous les retirer de l'égarement de ses erreurs, de la tyrannie de son gouvernement, & du service ou qu'elle fouffre, ou qu'elle veut que l'on rende aux creatures, sinon en nommant, les choses par leur nom? Et veu qu'encore auec toute la vehemence des paroles qu'on peut employer en telles occasions, les hommes font naturellement si attachez aux creances dont ils sont imbus de longue main, qu'on a toutes les peines du monde à les en déprendre, n'eust-ce pas esté trahir la cause de Dieu & leur salut, si par complai-

sance & par dissimulation, nous leur eussions caché le peril où ils estoient, & le vicede leurs creances? Nous ayons deu tafcher à reformer l'EgliseRomaine mesme, & à la ramener à meilleur sens, & n'auons peu le faire autrement sinon en parlant à elle franchement, & en luy découurant les manquemens dans lesquels elle estoit tombée. Et comme quand le Prophete Ieremie dit que luy & ses compagnons ont essayé de medeciner cette grande Metropolitaine des Chaldeens, il a voulu donner à entendre qu'ils luy ont monstré ses playes, afin de l'induire, s'il estoit possible, à receuoir les remedes dont elle auoit besoin; nous n'auons peu nous mettre en deuoir de guerir celle qui se pretend estre la souveraine de tous les Chrestiens, que nous ne luy missions tout à nud deuant les yeux les viceres dont elle est gastée. Mais nous prions ces Chrestiens de considerer que s'il y a quelque vehemence en nostre procedé, & quelque chose de tranchant en nos expressions, c'est à l'Eglise de Rome, qui resiste à sa guerison, & non à eux que nous en voulons, & que nous n'auons autre passion contr'eux, sinon yne incomparable ardeur d'affection de les détacher

236 Apologie

d'auec elle: Car ce n'est pas sans vne douleur incroyable, & que nous ne pouuons assez exprimer, que les voyant communiquer à ses pechez, nous les voyons aussi dans le peril de participer à ses playes. Comme ce n'est pas non plus sans quelque admiration de ses appas, & de la force de fescharmes, qu'estant detoutes les societez Chrestiennes celle parmy laquelle le Christianisme s'est le plus corrompu en toutes façons, & qui par consequent merite le moins qu'on respecte sa communion, les autres Eglises pourtant, & la Gallicane notamment, qui s'est tousiours le plus vi-goureusement opposée à son ambition, est sisserupuleuse en cét esgard, qu'elle penseroit s'estre separée de Christ, si elle auoit rompu auec Rome. Qu'auons nous à faire d'estre Romains pour estre Chrestiens?Le Christianisme n'a-t'il pas esté salutaire & en Ierusalem, & en Antioché, & en diuers endroits de l'Orient, auant que Rome en eust ouy parler? Et depuis que Rome en a ouy parler, où sont dans les Epistres de S. Paul, ou dans les autres éserits du Nouueau Testament, les traces qu'il fallust necessairement entretenir communion auec elle pour jouir de l'esperance de la gloire?

Sain& Pierre mesme nous parle-t'il d'autre chôse que de la foy en la Croix de Christ, & de la vraye sanctification, pour meriter le nom de Chrestiens? Paroist-il en ses escrits seulement vne ombre d'enseignement, ie ne diray pas qu'il ait estably l'Euesque de Rome son successeur en son authorité, mais qu'il ait desiré qu'on tint sa communion plus necessaire à salut, que celle des autres Apostres? Enfin, en cette Eglise de Rome; le vray objet de nostre indignation est celuy de qui nous auons cette opinion, comme je disois cydessus, qu'il l'a corrompue, & qui sous le nom de Dieu en terre, semble se vouloir mettre en la place de nostre Pere qui est aux Cieux. Si donc elle auoit resolu de faire diuorce auec luy, & de se remettre en cet estat de pureté auquel elle estoit auparauant, nous oublierions volontiers tout le passé, & ne ferions point de disficulté de nous reunir auec elle. Si mesmes elle nese contentoit pas que nostre Eglise la recognust pour sa sœur, comme elle a fait celle d'Angleterre, & d'Alemagne, & des Pays-bas, d'autant qu'elle s'imagine que c'est de Rome que l'Euangile est paruenu iusques à nous, nous luy donnerions

tels titres qu'elle voudroit, pour auoir paix auec elle; car quelque droit d'ainesse qu'elle pretendist entre ses sœurs, ou de quelque autre qualité qu'elle voulust qu'on l'honorast, nous supporterions doucement ce petit reste de vanité, pourueu que cela n'allast point iusques à preiudicier à la gloire de nostre commun Seigneur & Maistre. Mais tandis que nous l'y voyons si fort interessé qu'il est, le respect que nous luy portons, & le soin que nous deuons auoir de nostre propre salut, nous est vne pleine & entiere iustification deuant les yeux de l'Uniuers, si nous ne portons pas plus auant les effets de nostre condescendance.

SECTION VII.

Qu'en ce que ceux de la Religion croyent effectiuement, ils ne sont dignes de l'auersion de personne; au contraire, qu'ils doiuent estre tenus pour bons Chrestiens.

I E n'ay donc plus sinon à representer simplement ce que nous croyons, &

ce que nous faisons en la communion Re-formée; à ce que ceux qui n'en ont pas la cognoissance, en puissent estre informez, & qu'ils iugent par là ce qu'on doit esti-mer de nous. Peut-estre qu'il ne seroit pas absolument necessaire que ie m'arrestasse icy bien particulierement: pource que nostre Confession de Foy, & la Liturgie de nos Eglises peut en instruire tout le monde. Neantmoins, pour ne renuoyer point mon Lecteur ailleurs, & pource qu'en nostre Confession de Foy nous ne nous sommes pas contentez de mettre les articles positifs de nostre creance, nous y auons aussi messé ceux que nous ne receuons pas; afin qu'on voye nostre Religion tout à nud, & que sans preoccupation l'on puisse d'autant mieux iuger de fon excellence, i'extrairay de cette commune declaration de nostre doctrine, ce qu'effectiuement nous croyons, sans y rien adjouster de ce que nous auons rejetté.

Dés aussi-tost donc que nous commençasmes à paroistre en ce Royaume, nous declarasmes publiquemet que nous croyos qu'il y a vn seul Dieu, qui dans l'immensité & simplicité inenarrable de son essence spirituelle, & eternelle, & incomprehen-

fible en toutes manieres, comprend toutes sortes de vertus, de Bonté, de Iustice, de Sagesse, de Misericorde, auec vne Puissance infinie, en vne si eminente persection, qu'il surpasse infiniment la portée de l'esprit des hommes, & de l'intelligence des Anges mesmes. Cela posé pour fondement de nostre creance, nous adjoustasmes que Dieu nous a manifesté cette cognoissance de son estre par deux voyes: à sçauoir par l'ouurage du Monde & de ses parties, conjointement auec la Prouidence qui les conserue & qui les gouverne : & par les reuelations de sa Parole, qu'il nous a laissée par escrit. Et chacun sçait, sans que i'en fasse le catalogue, que nous auons recognu pour parties de cette diuine Parole, dans le Nouueau Testament tout ce qui a tousiours esté recognu pour tel par les Chrestiens, & dans le Vieil, tout ce qui est dans le Canon des Hebrieux, & que l'Eglise Iudaïque a crû estre d'origine celeste. Or bien que nous parlions ainsi, si estce que nous ne croyons pas que ces liures soient diuins pource seulement que c'a tousiours esté le consentement vnanime de l'Eglise, & que tous les Chrestiens en font d'accord; car si nous n'auions autre fondefondement de nostre foy, elle seroit appuyée sur le tesmoignage des hommes, qui s'accordent bien aussi quelquessois à receuoir ce qui est faux. Mais comme ainsi soit que ces liures ne peuvent estre divins, & procedez de l'Esprit de Dieu, qu'ils ne portent une infinité de marques de leur origine, chaque effect ayant toûjours des marques indubitables de sa cause, Dieu par vne secrette & interieure operation de son Esprit, ouure tellement les yeux de nos entendemens, qu'il les rend capables de recognoistre ces characteres de la Diuinité, & nous fait discerner ces liures d'auec tous les autres escrits purement humains, de quelque nature qu'ils soient : de sorte que nous les receuons auec vne perfuasion pleine & entiere pour la regle trescertaine & tres-parfaite de nostre foy) & pour l'instrument efficacieux par lequel, il a pleu à Dieu nous reueler sa cogno ssance. Car quant à ce qui est du monde & de ses parties, & de toutes les œuures de la diuine Prouidence, la cognoissance qu'on en peut recueillir a cela de particulier, qu'elle est exposée aux yeux & aux esprits de toures les Nations, & de tous les hommes de la terre, en quelque lieu qu'ils 142

soient espars. De saçon qu'il n'y en a aucomme il faut, qui n'y peust recognoistre que Dieutest vne nature telle que ie l'ay descrite au commencement; & qui par consequent ne peust estre induit par là à luy rendre l'honneur, le seruice, & les actions de graces, aufquelles la cognoifsance de ces vertus, & les bien-faits que les hommes en ont receus, inuitent naturellement. Maispour ce qui est de la reuelation de la Parole, qui est contenuë en ces liures, elle a cet aduantage qu'elle est incomparablement plus claire & plus distincte, & qu'elle nous apprend pour nostre salut vne infinité de choses qui ne nous peuvent estre enseignées par la contemplation de l'Vniuers. Car elle nous descouure premierement qu'en cette souueraine Diginité, que sa nature, & la creation du monde nous monstre clairement he pouvoir estre qu'vne, il y a neantmoins trois personnes, qui y subsistent distincte-ment: c'est à sçauoir le Pere, que nous recognoissons estre la premiere cause, le principe, & l'origine de toutes choses: le Fils, qui est sa Parole, & sa Sapience eternelle: & le S. Esprit, qui est sa vertu, son

pour ceux de la Relig.

243

efficace, & sa puissance, qui execute tous les conseils que le Pere a formez par sa Sapience, qui est son Fils. Que le Fils est eternellement engendré du Pere; que le S. Esprit procede eternellement du Pere & du Fils, & qu'encore qu'ils n'a yent qu'vne mesme essence, si est-ce que leurs Personnes ne sont point consules entr'elles, & gardent vne eternelle & inuiolable distinction. En vn mot, tout ce que les anciens Peres, comme S. Hilaire, S. Athanase, S. Ambroise, & S. Cyrille en ont dit, tout ce que les anciens Conciles en ont decidé, pource que nous le voyons tresconforme à cette parole de Dieu, nous le tenons pour tres veritable & tres-orthodoxe. En apres, le Monde, si nous y eussions esté bien attentifs, nous eust bien peu apprendre que c'est ce grand Dieu qui l'a creé: Car les cieux & la terre rendent assez de tesmoignages à leur autheur, si les hommes apportoient à les contempler vne assez pure & assez lumineuse intelligence. Mais pource que le peché nous a aueuglez, les vns ont absolument ignoré cette verité, les autres ne l'ont cognue que tres-imparfaitement, & de ce qu'ils en ont cognu, ils n'en ont point eu de persuasion

Qij

finon douteuse & chancellante, iusques à ce que cette diuine Parole nous en a trespleinement & tres-certainement informez. Car c'est en elle qu'il nous est recité, comment ce Dieu, lequel s est manifesté à nous en trois personnes, a au commencement forme les cieux & la terre, & toutes les choses qui y sont; tant celles qui n'ont que l'estre, ou la vie, ou le sentiment seulement, que celles qui sont douces de raison, & mesmes celles qui estansspirituelles & inuisibles de leur nature, ont vn estre qui consiste quasi tout en intelligence: Car c'est de ses enseignemensque nous recueillons certainement qu'il y a des Anges & des Demons, qui sont tous esgalement créez de la main de Dien mais dont les vns ont abandonné leur origine par la reuolte, & sont deuenus ennemis de leur autheur & de tout bien; les autres, qui ont persisté en leur integrité, sont employez à l'execution des volontez de leur Createur, notamment en ce qui concerne les hommes, & plus particulierement ceux d'entr'eux pour lesquelsila de plus tendres & de plus vehementes affections. Et quoy que la raison nous deust affez aduertir que Dieu n'a

pour ceux de la Relig.

point creé ce grand ouurage du monde pour l'abandonner, si auons nous eu besoin que cette parole nous esclaircist cette verité, & nous affermist en cette creance, que toutes choses sont maintenues, conseruées, regies, & gouvernées par la Prouidence de leur Createur. Tellement que dans les causes naturelles, & dans les choses qu'on appelle communément contingentes, il n'arrive aucun euenement qu'il n'ait eternellement preueu & preordonné en sa Sapience, & sur lequel il n'ait presidé par la conduite & par l'efficace de sa main. Et bien qu'il semble que les hommes & les Anges ayent plus de liberté en la production de leurs actions, que n'ont toutes les autres creatures, & que de fait ils s'y portent par les mouvemens de l'intelligence, & les executent volontairement, neant? moins cette liberté s'accorde tellement auec la Prouidence dinine, que tout ce qui depend des causes intelligentes, est sousmis à son gouvernement. Il est vray que les meschans hommes & les demons semblent auoir voulu se soustraire de son Empire; mais si sont-ils pourtant sujets à sa volonté. De sorte qu'ils n'entreprennent rien que comme il le permer, & n'executent rien sinon comme il leur en donne la puissance; & sur tout il a vn soin special de veiller sur leurs actions, ence qui concerne ceux d'entre les hommes qu'il aime particulierement. Car pource que ces meschantes creatures les haissent à merueille, & machinent toutes sortes de maux à l'encontre d'eux, il est necessaire qu'il pouruoye à leur protection d'vne facon speciale, autrement ils auroient trop asouffrir de la part de leurs aduersaires, veu qu'ils sont si enuenimez, en si grand nombre, & si puissans. Cette mesme Parole nous instruit encor, & de la condition de nostre premiere origine, & de la façon de laquelle nous en sommes descheus, & de l'estat auquel nous nous trouvons maintenant naturellement par cette cheute. Car c'est elle qui nous raconte comment Dieu auoit creé l'homme en vn estat d'integrité, & de felicité excellente, & de tout poinct accomplie, autant que la condition de la Nature le pouvoit porter. C'est elle qui nous recite comment l'homme en transgressant volontairement la loy que son Createur, luy avoit donnée, s'est rendu indigne de la seligité en laquelle il auoit esté mis, & s'est luy mesme corrompu. De maniere qu'au lieu que Dieu luy auoit donné vne intelligence lumineuse, & rem-plie de la cognoissance de son autheur; & vne volonté toute encline à suiure les. mouuemens de cette belle intelligence en toute pieté enuers Dieu, & en toute sorte de vertu; & finalement des appetits bien reglez, & parfaitement assujettits à l'empire de la raison: ses appetits ont par le peché secoué le ioug de la raison, & se sont emancipez d'yne façon merueilleusement licentieuse; sa volonté est deuenue deprauée & portée à toute sorte de mal; & les tenebres ont tellement saisison intelligence qu'elle n'a plus esté capable ny de gouuerner les appetits comme il faut, ny de tourner la volonté vers les objets bons & louables, ny de iuger des choses conuenablement. Vray est qu'il semble que pour ce qui regarde les choses politiques & morales, il soit resté dans l'entendement de l'homme quelque faculté de discerner entre le bien & le mal. D'où vient qu'il n'y a iamais eu de nation deffus la terre, pour si barbare qu'elle fust, parmy laquelle il ne soit demeuré quelque trace de l'estime de la justice, de l'honne.

steté, & de la vertu. Mais outre que c'est encore vn effect de la diuine Prouidence qui a voulu conseruer ce petit reste de cognoissance parmy les hommes, afin de seruir de lien à leur societé; lors qu'il est question de Dieu, & de le cognoistre comme il faut, & de luy rendre le seruice qui convient à l'excellence de sa nature, ils y sont entierement aueugles, si Dieu ne les y adresse & ne les illumine pour cêt effect extraordinairement. Ainsi, encore que l'homme soit libre, en ce qu'il est porté à ses actions par le mouuement desa volonté, & que sa volonté y est portée pource que son entendemet dis-court & raisonne sur les choses qui se presentent pour iuger de leurs qualitez, il est neantmoins esclaue, en ce que sa malice naturelle est si grande, & qu'elle a tellement saissi toutes les puissances de son esprit, que si Dieu par la vertu du sien ne le deliure de cette seruitude volontaire, il ne luge point, & ne peut luger des choses autrement que mal, & par consequent il ne fait que mal, & ne peut rien sinon mal faire. Or pource que tous les hommes sont descendus de ce premier, qui s'est ainsi mal heureusement corpour ceux de la Relig. 249

rompu, si nous eussions retenu la cognoissance de nostre origine, elle nous eust pû apprendre, outre les autres preuues que nous en auions en nous mesmes, que nostre premier pere a prouigné cette sienne corruption en nous tous. Mais pour ce que cét aueuglement naturel, qui nous empesche de juger de toutes autres cho-ses, nous a aussi osté la cognoissance de nostre principe & de nous-mesmes, il a fallu que cette mesme Parole nous apprist que tous les hommes du monde en sont naturellement gastez. Tellement qu'il n'y a aucun des descendans d'Adam, en qui par la generation des peres aux enfans, cette corrupció ne se soit écoulée; car ce que les Pelagiens ont voulu dire, que nous ne sommes mauuais que par imitation, est vn pernicieux erreur, que nous detestons: nous sommes aussi outre cela mauuais de nature, de quelque façon que cette tache originelle se prouigne en nous. Cognoissans comme nous faisons si certainement le mal, nous ne nous donnons pas beaucoup de peine de sçauoir la façon comment il se perpetuë au monde. Et ce mal est si grand, que quand nous n'en commettrions point d'autre, il nous

rend coupables deuant le jugement de Dieu, & nous assujettit à la mort. Bien est vray que Dieu le nous pardonne, & qu'il nous donne le feau de cette remission par le Baptesme; mais neantmoins il garde tousiours sa nature; car pour n'estre pas puny, vn peché ne laisse pas d'estre peché pourtant. Et qu'il garde toussours sa nature, il en appert par experience; çar c'est de là, comme d'vne source inespuisable, que viennent toutes les mauuaises passions, toutes les mauuaises pensées, toutes les mauuaises actions, & toutes les mauuaises paroles, par lesquelles les hommes attirent dessus eux ire & malediction, Maisbien que la Parole de Dieu soit admirable en la reuelation qu'elle nous donne de toutes ces belles cognoissances, si ne l'est-elle point tant qu'en la declaration qu'elle nous a faite du moyen par lequel Dieu nous retire de cette malediction, & des motifs qui l'ont porté à nous en garentir; car pour ce qui est des motifs, elle nous enseigne qu'outre cette charité, inenarrable qu'il a tesmoigné enuers le monde, en ce que sans y estre incité d'aucune. autre cause, que de sa seule bonne volonté, il a voulu donner son Fils vnique pour

l'abandonner à la mort, afin que quiconque croiroit en luy, fust sauué par luy, nous auons encore en elle la reuelation d'vn mystere que nous ne pouuions iamais apprendre d'ailleurs. C'est que Dieu, meu de sa pure volonté, & sans y estre inuité par aucune bonne qualité qui fust en l'vn plustost qu'en l'autre d'entre les hommes, à de toute cternité, & dans le conseil qu'il en a formé deuant la fondation du monde, mis de la distinction entre eux; car il a eu le salut des vinstellement à cœur, qu'il les a mis à part des autres, afin de leur donner de croire en ce Redempteur, & de les amener par ce moyen indubitablement à la jouissance de sa felicité eternelle. Au lieu qu'il a laissé les autres en arriere pour les abandonner à eux-mesmes, & à l'aueuglement de leurs cœurs. Leur aueuglement donc estant tel que nous l'auons cy-dessus representé, il est absolument ineustable qu'ils ne croiront point en l'Euangile, & ainsi qu'ils demeureront en leur naturelle perdition. De sorte que comme sa misericorde paroist merueilleusement riche en la dispensation de laquelle il a vsé enuers les vns, cette seuerité dont il a vsé enuers les autres, Apologie bien qu'elle ne soit nullement iniuste, pour ce qu'ils ont bien merité d'estre ainsi abandonnez, donne de l'estonnement pourtant, & est enfin suivie de l'execution d'vne ire & d'vne vengeance espouuantable. Et l'experience nous ratifie ce que la Parole de Dieu nous en apprend; car comme ie l'ay dit ailleurs, puis que les vns croyent en Iesus - Christ, & les autres n'y croyent pas, & que nul n'y croid sinon par la grace que Dieu luy en donne, il faut necessairement qu'il ait mis distinction entre les hommes en cét esgard, & que ce que nous en voyons arriver maintenant, soit l'effet de la resolution qu'il en auoit prise auant la fondation du monde. Do-Arineà laquelle le Cardinal Bellarmin,& les autres principaux Docteurs de l'Eglise Romaine consentent. Quant à ce qui est du moyen que Dieu a suiuy pour nous tirer de cette condamnation, qui est-ce qui peut porter le nom de Chrestien, s'il ne croid ce que nos Eglises en enseignent? Elles disent premierement qu'en lesus-Christ Dieu nous a offert & communiqué tout ce qui nous est necessaire pour nostre salut; en ce qu'il a esté fait sapience, pour nous reueler toutes les lumieres & toutes les cognoissances qui concernoient la gloire de Dieu & nostre souveraine se licité: & iustice, pour nous faire absoudre deuant le iugement de Dieu par le moyen de sa satisfaction: & sanctification, pour nous communiquer de son Esprit, & reparer en nous l'image de la saincteté du Pereceleste: & redemption, pour ce qu'il nous retirera enfin de la main de tous nos ennemis, & de celle de la mort mesme. Tellemet que qui s'addresse à luisil y trouue tout ce qui luy est necessaire pour estre sauné; & qui se destourne de luy, renonce à la misericorde de Dieu, laquelle il luy a plû de reueler en son Vnique. Elles ad joustent qu'encore que ce Iesus Christ soit la sagesse de Dieu, & son Fils eternel, & Dieu beny és siecles des siecles, si est-ce qu'il a vestu nostre chair, & joint en vne mesme personne en luy la nature humaine auec la diuine. Par ce moyen non seulement quant au corps il a esté fait semblables à nous en toutes infirmitez, mais aussi quant à l'ame il n'a point differé de nous en toutes sortes de passions, sinon entant qu'en l'vn & en l'autre il a esté parfaitement exempt & des pechez que nous y commettons, & du vice qui y est inherent de nostre nature. Mais quoy que c'en soit, il a esté homme veritablement, & comme il estoit descendu de la race de Dauid & d'Abraham, ainsi que les sainces Oracles l'auoient promis, il a eu vne nature toute semblable à la leur, mise à part la corruption laquelle y est suruenue. Et s'il y a eu; ou entre les anciens, ou entre les modernes, quelques gens qui en ayent crû autrement, nos Eglises ont tousiours eu leurs erreurs en vne abomination extreme. Et afin que personne ne se trompast en l'intelligence de leur sentiment, elles en ont donné par tout vne interpretation & vne declaratió tres-expresses car elles ont toùjours crû & toû jours dit, que ces deux natures, diuine & humaine, sont tellement conjointes en vne mesme personne en lefus-Christ, qu'encore qu'elles soient inseparablement vnies, chacune d'elles y garde distinctement ses proprietez. Comme donc la nature divine y demeure increée; infinie, & immense tout a fait; la nature humaine y demeure limitée des bornes qui luy sont propres comme aux autres hommes. & reuestuë de sa figure, & conformée en sa stature ainsi que les autres corps humains. Vray est qu'en la resurreCtion le corps de Nostre Seigneur Iesus a acquis des qualitez fort differentes de celles qu'il auoit en l'infirmité de sa chair! car il est deuenu incorruptible, & immortel: mais neantmoins il a toûjours coserué la nature d'vn vray corps, & la possede là haut en la gloire des lieux celestes. Or bien qu'il nous reuienne vne infinité d'auantages & d'incomparables vtilitez, de l'enuoy de Nostre Seigneur icy bas, & qu'on y puisse remarquer vne infinité de characteres admirables des vertus que Dieu y a voulu découurir, le principal sujet pourtant de tout ce merueilleux mystere, a esté que Dieu nous a voulu monstrer son inestimable charité, & son amour inenarrable enuers nous, en ce qu'il la liuré volontairement à la mort, afin d'y satisfaire pour nos pechez, & qu'il la ressuscité d'entre les morts, afin de nous attester que la satisfaction estoit parfaite, & qu'elle auoit esté acceptée de luy, puis qu'il liberoit nostre caution. De sorte que par ce moyen nous à esté acquise, & la justice en vertu de laquelle nous comparoissons hardiment deuant luy en jugement, & la vie eternelle, qui est le but de nos souhaits & l'objet de nos esperances: Pour nous obtenir cela,

nous croyons que Nostre Seigneur Iesus a offert à Dieu son pere yn seul sacrifice en la Croix, par le moyen duquel nous sommes reconciliez à Dieu, & tenus pour iustes en sa presence. Et cela estoit absolument necessaire pour nous faire obtenir la vie à laquelle nous aspirons; car nous ne l'obtenons sinon comme vn heritage, & en qualité d'enfans: & ne sommes enfans de Dieu sinon par son adoption. Or ne pouuions nous estre participans de son adoption, que premierement il ne nous pardonnast & n'enseuelist toutes nos offenses. Pour ce donc que nos fautes sont des debtes & des crimes, comme ie l'ay dit cy-deuant, & que pour des debtes & des crimes il faut vne satisfaction & vn payement, qui foit proportionné à l'obligation & à la peine que la loy denonce, comme il n'y auoit aucun qui peust faire cela parfaitement sinon le Seigneur, aussi l'a t-il si parfaitement accomply, qu'il n'est desormais plus de besoin d'autre satisfaction ny d'autres souffrances. Or comme qui a payé, est quitte de son obligation, & qui pareillement a souffert, est quitte de l'obligation à la vengeance, soit qu'il l'ait fait pour soy-mesme, ou par l'entremise de sa caution

caution, Nostre Seigneur ayant ainsi & payé & satisfait pleinement pour nous; nous fondons là dessus la pretention que nous auons d'estre absous & iustifiez de Dieu, qui à cette occasion ne nous punit pas, mais nous remet gratuitement toutes nos debtes & tous nos crimesscar puis qu'il est entierement satisfait en Nostre Seigneur, il n'a plus rien à demander à nos personnes. Pour cela nous estimons nous souuerainement heureux, ainsi qu'a fait Dauid autrefois, de ce que n'ayans rien en nous mesmes dequoy contenter la iustice de Dieu, ny en merites ny en satisfactions, nous auons tout en Iesus-Christ, qui pat cette sienne satisfaction nous a acquis la remission de nos pechez, & nous a esseuez à l'esperance certaine de la felicité eternelle. Ainsi nous jouissons par la grace de Dieu de paix & de repos en nos cœurs, au lieu qu'autrement nous serions tousiours agitez d'apprehensions, si nous auions à respondre de nous-mesmes, & sur l'asseurance de nostre propre iustice, à son iugement. C'est aussi en cette mesme confiance, que nous inuoquons Dieu comme nostre Pere, & que nous sommes asseurez d'estre exaucez en tout ce que nous de258

manderons au Nom de ce grand Mediateur; car puis qu'il est nostre Moyenneur, il rendra nos prieres agreables à son Perei puis qu'il est celuy auquel nous auons esté adoptez, il sera que nos supplications seront receuës de Dieu, comme venant de ses chers enfans, & puis qu'il est nostre chef,& nous ses membres, il ne se peut que la faueur que le Pere celeste luy porte, ne se respande dessus nous, & dessus les prieres que nous luy presentons par luy. Au reste, comme ainsi soit que les promesses de toutes ces graces, qui nous sont faites en l'Euangile, soient vniuerselles sous la condition de la Foy, selon ce qu'il est dit, qu'il a souffert pour nous acquerir salut, afin que quiconque croira en luy ne perisse point, mais qu'il ait la vie eternelle, nous nous rendons ces promesses particulieres, & les nous approprions par la Foy. De sorte qu'au lieu que les autres n'en sentent aucun effet, pource qu'ils n'y croyent pas, nous en sentons quant à nous, pource que nous les acceptons. Et comme en les acceptant de nostre costé nous demeurons persuadez que Dieu ne manquera pas d'exe-cuter ce que de sa bouche sacrée il a promis: Dieu de sa part les execute effective-

ment en nostre elgard, & nous rend participans de cette iustice de son Fils en la remission de nos pechez, iusques à ce qu'il nous introduise en la joüissance de la vie. Cependant ce que nous croyons, nous ne le nous attribuons pas à nous-mesmes; mais nous recognoissons le tenir tout de la grace de Dieu; car les promesses, comme i'ay dit cy-dessus, sont offertes generalement à tous, mais la grace de les receuoir est vn don gratuit & particulier que Dieu donne à qui bon luy semble. Tellement qu'au lieu que les vns ont seulement cette obligation à Dieu en ce qui regarde leur salut, qu'il leur a esté offert de sa part dans les promesses de l'Euangile de Christ, les autres luy sont obligez au double, en ce qu'en la distribution de la grace par laquelle on les embrasse, ils ont esté preserez. Et l'obligation qu'ils en ont à Dieu est d'autant plus grande, que cette illumination interieure & secrette de l'esprit de Dieu, par laquelle ils sont rendus capables de recognoistre la verité de l'Euangile du Sauueur, ne se desploye pas en eux pour vne fois seulement, comme si Dieu les vouloit seulement mettre dans le chemin du salut, pour les laisser là puis apres à leur propre conduite. Ce qu'il commence en eux, il le continue & le paracheue aussi. Et de fait comme luy seul en a pû donner les commencemens, aussi peut-il seul don ner la perfection à son ouurage. Et pource que la promesse de l'Enangile ne regarde pas seulement la remission des pechez, mais aussi la vraye sanctification dont le fain & Esprit est autheur, quand nous difons que nous receuons cette promesse par foy, nous donnons assez à entendre que la foy ne nous met pas seulement en la possession de cette remission, mais aussi nous obtient l'Esprit de sanctification qui nous regenere. Tellement qu'outre ce que la foy d'elle-mesme excite l'affection de bien & saintement viure, en ce que nos entendemens ne peuvent estre illuminez d'vne si belle verité, que nos affections ne s'enflamment de son amour, & ne se conforment à sa sain & eté; elle produit encore la vraye regeneration en nous, en ce qu'ayant par la grace crû à la promesse de Dieu, il nous donne plus liberalement son S: Esprit, pour nous reformet à son image. Et pour ce que c'est en cela que consiste le suc & la mouelle de la doctrine de l'Euangile, & quant & quant le corps & la verité

de ce qui estoit autressois representé dans les sigures de la Loy, nous ne consideront plus ses ceremonies que comme des chorses, passées, & ne nous servons de la Loy morale mesme, sinon pour estre la regle de nostre conduite & de nos deport temens.

Pour ce que ce grand salut que nous auons en Iesus-Christ nous est communiq qué par l'Euangile, & ratifié par les Sacremens, & qu'au reste ny l'Euangile ne nous est presché, ny les Sacremens ne nous sont administrez, sinon par l'ordre de l'Eglise, tel qu'il a pleu à Dieu de l'establir, il est raisonnable que l'on sçache aussi ce que nous croyons de toutes ces choses, & que l'on voye combien la creance que nous en auons est non seulement innocente, mais conforme à la verité divine, & digne de l'approbation de tous les Chrestiens. Afin donc de commencer par là, nous croyons que Dieu a estably vn certain ordre en fon Eglise, selon lequel les vns sont ordonnez pour estre Pasteurs & Docteurs, & les autres pour receuoir leurs instructions, & que cét ordre doit estresacré & inuiolable. En telle maniere que les vns, que Dieu a douez des dons necessaires pour celas

262

soient appellez à ce ministere par des voyes conuenables, & qu'ils l'exercent en toute fidelité, & que les autres escoutent auec respect & reuerence, & fassent profit de leurs enseignemens. Ce n'est pas que s'il eust pleu à Dieu choisir quelqu'autre voye de nous enseigner ce qui est de nostresalut, il ne l'eust peu faire. Ny sa Sapience, ny sa Puissance n'estoient pas tellement astreintes & determinées à ce moyen-là, qu'il fust absolument ineuitable. Mais l'ayant iugé le plus propre, & le plus accommodé à la nature de l'homme, ainsi qu'il a fait, c'est luy resister que de ne s'y assujettir pas, & ruiner l'edification de ses enfans, que de vouloir abolir vne si bel-le discipline. Et de là s'ensuit necessairement qu'encore que chacun doiue auoir le soin de s'instruire en particulier en la cognoissance de la verité, & que chaque pere de famille soit particulierement obligé à l'instruction de ceux qui sont dessous son gouvernement, neantmoins il y doit avoir des assemblées publiques, où tout le monde soit endoctriné en commun par ceux à qui Dieu en a commis la charge, tellement que ceux qui se separent de ces assemblées, contrarient à

l'ordonnance de Dieu, se soustrayent du ioug de nostre Seigneur Iesus-Christ, & rompent l'vnité de son Eglise. Et cela a esté iugé si necessaire par les Apostres & & par les anciens Chrestiens, qu'ils l'ont tousiours pratiqué nonobstant les Edicts des Empereurs, & toutes les persecutions qui leur ont esté faites pour les en empescher; car pource qu'ils ont crû que cela estoit de l'institution de Dieu, ils ont estimé qu'il estoit plus iuste & plus raisonnable d'obeir à Dieu qu'aux hommes. Or est-il bien aisé de recueillir de ce que i'ay dit cy-dessus, que c'est que nous croyons de la nature de l'Eglise; car si vous considerez les fidelles entant qu'ils se trouuent actuellement ensemble pour ouir la predication de la Parole de Dieu, & vaquer aux exercices de pieté, l'Eglise est l'assemblée de ceux qui conviennent en mesme lieu à cette intention de tesmoigner la foy qu'ils ont en nostre Seigneur Iesus-Christ, & de s'auancer en sa cognoissance salutaire par l'ouie de la predication de sa Parole, & par la celebration de ses Sacremens, comme aussi pour prier Dieu, luy rendre actions de graces d'vn commun consentement, & se fortisier de plus

264 en plus en l'esperance de la bien-heureuse immortalité: selon que nous auons tous besoin de faire progrés en toutes ces choses, iusques à ce que nous soyons paruenus à la perfection à laquelle nous aspirons. Et si vous les considerez separez, comme il n'est pas possible qu'ils vacquent tousiours ensemble à ces saincts exercices, l'Eglise est la societé de ceux qui entretiennent communion ensemble par vne mesme foy en Iesus-Christ, & par la participation à mesme esperance, & qui donnent des tesmoignages de cette communion où les occasions s'en presentent, par toutes les choses que ie viens de rapporter. Or quand nous composons ainsi l'Eglise de fideles, nous ne pretendons pas dire qu'il ne se messe point parmy eux des gens qui ne meritent pasce nom. Car il n'y a que trop d'hypocrites; qui pour que sques considerations demeurent exterieurement en cette societé. Mais cela n'empesche pas que la societé ne subsiste, & qu'ellene doine estre nommée du nom d'Eglise, à cause que le nombre des vrais sidelles y est plus considerable & plus grand, & que la Religion qui les rend tels, est pratiquée comme il faut en toutes ses

parties. A la verité, où la Parole de Dieu n'est point preschée, où les Sacremens ne sont point administrez, où il n'y a point d'ordre estably pour le seruice de Dieu & pour la conduite de son peuple, on ne peut pas dire qu'il y ait aucune Eglise, quelle qu'elle soit. Où la parole de Dieu est preschée en quelque façon, mais meslée des erreurs & des superstitions des hommes; où les Sacremens sont administrez, mais gastez & corrompus en diuerses manieres : où il y a quelque ordre pour la conduite de ceux qui font profession du nom Chrestien, mais alteré & degeneré de l'institution du Sauueur du monde, il se peut faire qu'on donnera le nom d'Eglise à vne telle societé, mais elle ne sera telle pourtant sinon à proportion de ce que toutes ces choses y seront ou pures ou contaminées. Car puis que ce sont ces choses - là qui à proprement parler, & constituent & marquent l'Eglise de Dieu, nulle societé ne peut porter ce glorieux nom, finon autant qu'elles s'y rencontrent. Et ce n'est pas sans raison que i'ay fait mention d'vn ordre sous la conduite duquel l'Eglise soit gouvernée; car nous tenons cela pour certain, que c'est

vne chose necessaire à la subsistance de la vraye Eglise, qu'il y ait vne certaine police establie pour son administration, qui soit entierement conforme à l'institution de Iesus-Christ, ou au moins qui approche le plus que faire se peut de la pratique des saincts Apostres. C'est pourquoy outre les Pasteurs qui sont ordonnez pour instruire le peuple, & pour luy administrer les Sacremens, nous estimons qu'il faut qu'il y ait des Anciens & Surueillans, & des Diacres, dont la charge consiste principalement à remedier aux scandales qui peuuent arriver par les mauuais deportemens des vicieux, à soulager les necessitez des pauures, & seruir à la consolation des affligez, à donner ordre que les assemblées se tiennent auec la decence conuenable, & fanstumulte ny confusion, & en vn mot, à seruir à l'edification détous, & à contribuer auec les Pasteurs à l'auancement de la doctrine du fainct Euangile. Entre ces Anciens & ces Diacres, & les Pasteurs qui preschent la Parole & qui administrent les Sacremens, nous mettons vne notable differece quant à l'ordre de leurs charges, & ne croyons pas qu'ils soiet d'égale authorité en l'Eglise de Dieu.

Mais quant aux Pasteurs, nous estimons que leur charge les esgale, & ne reco-gnoissons point d'autre difference entre eux, sinon celle qu'il plaist à nostre Seigneur lesus d'y mettre par la distinction de leurs dons. Car comme c'est luy qui est le Chef de son Eglise, & son souverain Pasteur, aussi est-ce luy qui orne de ses dons comme il luy plaist ceux qu'il employe en ce ministere. Mais tant y a que ny l'ordre de leurs charges, ny le lieu auquel ils sont establis, ne leur donne aucune prerogative, ny aucune domination les vns sur les autres entre nous. En quoy nous sçauons bien que tout le monde n'est pas de mesme sentiment auec nous. Mais puis que nous ne suivons cette esgalité sinon pour suïr l'ambition & la tyrannie, qui sont les pestes de l'Eglise de Dieu, il n'y a nulle apparence qu'on nous doiue sçauoir mauuais gré d'vne institution si conuenable à l'humilité, qui sied si bien à tous les Chrestiens, & notamment aux Ministres de l'Euangile. Quoy qu'il en foit, esgaux ou inesgaux, que l'on consti-tuë les Pasteurs, nous estimons que nul ne se doit ingerer de son propre mouuement en l'exercice de cette charge, mais que

ceux qui y seruent y doiuet estre legitime. ment appellez selon l'ordre de l'Eglise de Dieu. À la verité si quelque Chrestien de condition priuée s'estoit rencontré seul parmi des barbares, qu'il peust conuertir à la cognoissance de Iesus-Christ, nous estimons qu'il seroit assez authorisé par la necessité de la chose, par la charité enuers le prochain, par le zele de la gloire du Sauueur, & par la conduite de la prouidence de son Pere, d'entreprendre d'y former vne Eglise, & d'y faire les fonctions de Pasteur. Et le consentement de ceux qu'il auroit conuertis y suruenant, nous tiendrions sa vocation pour parfaite & pour authentique. Si puis apresil pouuoit auoir quelque communion auec yne autre Eglise, & estre consirmé en l'exercice de sa charge par ceux qui y auroient esté establis plus regulierement, asseurément cela seruiroit à l'edification commune, & il a esté ainsi pratiqué entre les anciens Chrestiens. Mais si cela ne se pouvoit, com: me tout le monde est legitimement appellé par la regle de la charité, à sauuer son prochain d'vn embrasement & d'vn naufrage, nous estimons qu'yn tel en beaucoup plus forts termes auroit yne iuste va-

cation à retirer les hommes de la malediction. Et n'y a rien au monde de si raisonnable. De mesmes, s'il estoit arriué à quelque Chrestien de condition priuée, dese trouuer en vne Eglise en laquelle le seruice de Dieu, la predication de la Parole, l'administration des Sacremens, & la conduite de l'ordre, fussent tellement corrompus d'idolatrie, d'heresie, de superstition, & de tyrannie, qu'il fust absolumet impossible de faire son salut en cette communion, nous estimons que son deuoir seroit d'aduertir premierement ceux qui y porteroient la qualité de Pasteurs, d'y apporter la reformatió necessaire, & de pouruoir à leur salut & à celui de leur troupeau. Si apres les en auoir auertis ils n'y vouloiet pas colentir, nous tenons pour indubitable que plûtost que d'endurer la ruïne de la religió, la profanatió de la gloire & de la verité de son Sauueur, & la perte du salut des homes, il deuroit en entreprendre la reformation de soy mesme, principalement si Dieu luy auoit donné les dons de cognoilsance, d'éloquence, de prudence, & de zelepour cela. Car en vne necessité extraordinaire,& d'vne telle importace, l'ardeur du zele de l'entreprédre, & les dons necessai270

res pour l'executer, sont vne marque assez authentique de la vocation de Dieu. Bien est vray que si les Ministres ordinaires y vouloient mettre la main, il ne s'y deuroit ingeter que conjoinstement auec eux & par leur affociation; pource qu'en4 tant qu'il se peut, il faut tousiours deserer à l'ordre des choses qui sont dessa legitimement establies. Mais si les Ministres ordinaires ou negligeoient de le faire, ou s'y opposoient, aussi bien icy qu'en toute autre police, le salut du peuple est la souueraine loy. Où donc l'ordre public vient à manquer, la voix de la necessité est la voix de Dieu, qui appelle à la restauration de sa verité ceux à qui il a donné la faculté de la pouuoir deliurer de l'iniustice où les hommes là detiennent. Hors ces deux occasions, nous croyons qu'il faut tres-religieusement obseruer cette regle en ce qui est de l'establissement des Pasteurs; qu'on y suiue quelque ordre public, & que la mission de chacun soit ratisiée par de bons & authentiques témoignages. Quant à ce qui est de la Discipline par laquelle l'Eglise doit estre gouvernée, nous esti-mons que c'est aux Ministres de l'Euangi-le, conioinctement auec ceux que l'on a choisis pour Surueillans, à en dresser les reglemens, en telle sorte qu'ils se conforment entierement à la Parole de Dieu, & qu'ils ne visent à autre chose qu'à l'edification commune. Il est vray qu'en telle nature de choses qui regardent la police exterieure de l'Eglise, la parole de Dieu s'estant quelquessois contentée de donner des regles generales, lesquelles il faut appliquer aux circonstances particulieres des choses, des personnes, & des temps, & ces circonstances là n'estant pas semblables en tous lieux, & mesmes ne perseuerant pas toûjours en mesmes lieux en vn estat vniforme, il est aucunement ineuitable, & qu'entre diuerses Eglises il y ait quelque diuersité en cét esgard, & qu'en vne mesme Eglise quelquessois on en varie la constitution selon les occurrences. Mais cela n'arriue sinon en choses legeres, & qui ne sont pas d'importance pour le saluti en celles qui sont de quelque consequence, on doit estre beaucoup plus exact à suiure ponctuellement ce que la Parole de Dieu en ordonne. Et d'autant qu'entre autres choses elle s'explique disertement en ce qui est de l'excommunication de ceux qui sont incorrigibles en

leurs vices, & opinialtrement refractai-resà l'ordre de l'Eglise de Dieu, nous ne failons nulle difficulté qu'il n'en faille vser où l'occasion le requiert, en y obseruant toutes les precautions de prudence & de charité qu'il est possible. Car nostre Seigneur Iesus le nous a en joint, quand il a donné à ses seruiteurs l'authorité d'appliquer la rigueur de ses chastimens selon les occurrences. Quant à ce qui est des Sacremens, nous croyons que Dieu les a ad. joustez à la predication de sa Parole pour nous confirmer & ratifier de plus en plus la verité des promesses qu'il nous y fait. Car pource que nostre felicité despend de la persuasion que nous auons de la verité des promesses divines, & que l'infirmité de nostre chair a besoin de beaucoup d'aydes pour les nous persuader, Dieu ne s'est pas contenté de les nous faire annoncer de viue voix, il nous en a encore voulu donner des gages & des asseurances visibles. Et comme il sesert tellement de la predication desa Parole, qu'il ne veut pas seulement que ce soit vn son exterieur qui batte les oreilles de nos corps, il l'accompagne de l'efficace de son Esprit, par le moyen de laquelle elle s'insinuë en nos

ames:

ames: aussi quandil nous fait administrer les Sacremens, il ne se contente pas de faire que ce soient seulement des signes exterieurs qui se presentent à nos yeux, il y déploye la mesme vertu de son Esprit, pour les rendre efficacieux en nos consciences. Mais comme c'est de l'essicace de l'Esprit qui accompagne l'vn & l'autre que toute leur vertu depend, aussi n'ont-ils autre vertu ny l'vn ny l'autre non plus, finon de nous amener à Iesus-Christ, seul autheur de nostre salut, & le seul objet de la veneration & de la deuotion de nos ames. Nous sçauons qu'en l'Eglise Romaine on croid qu'il y a sept Sacremens, & nostre intention n'est pas de disputer contre cette opinion maintenant. En quelque nombre que les Catholiques les reçoiuent, tant y a qu'ils ne nous contestent pas que ceux que nous croyons estre tels, ne le soient veritablement, à sçauoir le Baptesme la sainte Cene, qu'on nomme autrement l'Eucharistie. Et bien qu'à l'esgard de ces saintes ceremonies ils tiennent beaucoup de choses que nous ne tenons pas quant à nous, si cst-ce que pour ce que nous en croyons, ils ne sçauroient y rien trouuer à reprendre. Car quant à ce qui est du Baptesme, nous 274

croyons auec eux qu'il nous est donné pour gage que Dieu nous adopte en son Fils, pour estre du nombre deses enfans: & que comme l'eau est propre pour nettoyer les souilleures de nos corps, le sang de Christ, qu'il a respandu en la Croix, & le Sain& Esprit qu'il nous donne lauent les souilleures de nos esprits, l'vn par la remission qu'il nous a obtenuë, & l'autre par la sanctification qu'il nous communique. Nous croyons encore comme eux, que le Baptesme ne doit estre administré qu'vne fois à chaque personne, & ne se doit point reiterer: mais que quant à son fruict & à son efficace, il s'estend à toute la vie, pour nous asseurer que nous trouuerons toûjours en Iesus-Christ & la remission de nos offenses, & la grace de la sanctification. En fin nous sommes encore d'accord auec eux, que quoy que ce soit vn Sacrement de foy & de penitence, & que ceux qui viennent grands à la cognoissance du Christianisme, doiuent tesmoigner qu'ils croyent & qu'ils se repentent, auant que de le receuoir, neantmoins il doit estre administré aux petits enfans de ceux qui sont desia en l'Eglise, & que nostre Seigneur Jesus-Christ l'a ainsi voulu. Pour ce qui est

de la Saincte Cene, on ne nous conteste non plus que tout ce que nous en croyons ne soit absolument veritable. Car premierement nous tenons que c'est le tesmoignage de la communion que nous auons auec nostre Seigneur Iesus Christ, laquelle consiste en ce qu'il n'est pas seulement vne fois mort pour nos offenses, & ressuscité pour nostre iustification: mais aussi qu'il se communique tellement à nous; qu'il n'est pas plus vray que le pain & le vin nourrissent nos corps, qu'il est certain & indubitable que sa chair & son sang sont la nourriture & le breuuage de nos ames. Il est bien vray que nous croyons qu'il est au Ciel, comme aussi ceux de l Eglise Romaine le croyent; & est bien vray encore que nous sommes en la terre, & qu'ainsi il y a vn merueilleux interualle entre lûy & nous. Mais cela n'empesche pas que par la force de la foy, par laquelle nous l'embrassons, & par la vertusecrette & incomprehensible de son Esprit, dequel il nous communique, nous ne nous ioignions tel2 lement à luy, & qu'il ne se ioigne telle ment à nous, que nous sommes nourris & soustenus de sa substance. Et confessons que cette communion de Christ auec nous

276

& de nous auec luy, est vn mystere dont nos esprits ne sont pas capables de com-prendre toute la grandeur & l'excellence. Neantmoins quoy que nous ne le comprenions pas entierement, si sommes nous pleinement & profondement persuadez, comme le l'ay desia dit cy-dessus, que ny le Baptesme, ny la Cene, ne sont pas des signes creux, qui ne contiennent & qui ne communiquent pas effectiuemet ce qu'ils representent. Car nous croyons fermement qu'au sainct Baptesme nostre Seigneur lesus-Christ, par l'efficace de son sang & par la vertu de son Esprit, nous laue de nos pechez, aussi certainement qu'il est vray que l'eau nettove les souillures de nos corps. Et qu'en la Cene il nourrit spirituellement nos ames de sa chair & de fon sang, aussi certainement que le pain & le vin seruent à la nourriture de nos corps. Ainsi disons nous qu'il faut bien soigneusement distinguer entre les choses exterieures qui nous sont communiquées aux Sacremens, à les considerer precisément en elles mesmes, & la vertu que nostre Seigneur leur a donnée par son institution, de nous en representer d'autres, & de nous en mettre en possession; car quant à ce

qu'il a d'exterieur, l'eau de loy-mesme est vn element caduque & contemptible, qui n'a en elle aucune vertu en ce qui est de nostresalut. Mais l'institution de nostre Seigneur Iesus-Christ fait qu'elle nous represente nostre lauement spirituel, & qu'a ctuellement, autant qu'vne telle chose exterieure le peut, elle nous en met en jouissance. Le pain & le vin aussi, à les considerer precisément en eux-mesmes, n'ont aucune vertu de nourrir nos esprits en vno vie eternelle, ny de les esleuer à l'esperance de la bien-heureuse immortalité. Mais l'institution de nostre Seigneur Iesus -Christ les a non seulement rendus capables de nous representer sa chair, & son sang, comme si nous les voysons à l'œil, mais de nous en mettre en actuelle possession, autant que des choses de cette nature en sont capables. Car ce n'est pas certes pour neant que nostre Seigneur Iesus a prononcé ces paroles, Cecy est mon Corps, son intention a esté de donner au pain qu'il nommoit ai nsi, & vne particuliere dignité, & vne singuliere efficace. C'est pourquoy nous celebrons ce Sacrement auec toute sorte de respect, & en y participant comme il faut, nous pretendons en-

Sij

278

trer en la communion de nostre Seigneur, & en la participation de toutes ses graces, Il ne me reste plus qu'vn mot à dire de nostre creance; non pour ce qu'il soit absolument necessaire de m'en énoncer icy, pour ce que ie m'en suis assez expliqué lors que i'ay parlé de la relation que nous auons & au Roy & à l'Estat: mais seulement afin qu'il ne manque rien à l'abregé que i'ay voulu faire icy de la Foy de nos Eglises. Nous croyons donc finalement, que comme Dieu est l'autheur de la Religion, en quoy il a voulu auoir soin du salut des hommes, il est aussi l'autheur du gouuerment politique, en quoy il a voulu pouruoir à la conseruation de leur societé; &il estoit ainsi absolument necessaire, autrement les passions des hommes, qui sont naturellement effrenées, cussent tout renuersé c'en dessus dessous. Pour obuier à ce desordre, Dieu a estably les Royaumes,& les Republiques, & toutes fortes de Principautez: & bien qu'il y ait vne merueil-leuse diuersité tant en leurs formes, qu'en la maniere de leur establissement, & en l'ordre de leur succession, les vnes estant electives, & les autres hereditaires, & la façon mesme ou d'en heriter, ou d'y estre

esleu, n'estant pas esgale par tout, si est-ce que c'est Dieu qui y preside, & qu'elles doi-uent toutes estre rapportées à son institution. Et afin que le charactere de son authorité qu'il y imprime, ne soit pas mesprisé par l'audace des meschans, il a mis le glaiue en la main des Puissances superieures, pour punir les pechez qui tendent à la ruine de cette societé, soit qu'ils violent les commandemens de la seconde Table, où sont contenus les deuoirs de la charité enuers le prochain, soit qu'ils soient commis contre la premiere, où sont contenus les commandemens qui concernent les deuoirs de la pieté enuers Dieu; car la Religion estant vn desprincipaux liens de cette societé, le Magistrat doit auoir soin de sa conservation, au moins certes autant que le mespris qu'on en fait, en ébranle les fondemens & la subsistance. Non seulement donc Dieu ne veut pas qu'aucun entreprenne de renuerser cét ordre politique qu'il a ainsi authorisé, mais il veut que chacun s'y sousmette auec respect, en rendant obeissance tant au Souuerain Magistrat, qu'à ux qu'il a ordonnez pour suppléer à son absence, & faire ses fonctions comme Lieutenans, chacun selon le degré

280 Apologie

qu'il tient, & selon l'estenduë de sa Iurisdiction & de sa puissance. Et pour ce que cét ordre public ne se maintient que par les Loix, & qu'il n'y a pas moyen de faire valoir les Loix, si le Magistrat qui les establit & qui les conserue, n'est en estat de les deffendre, & que pour le maintenir en cét estat, il faut saire des despenses ausquelles il n'y a moyen de fournir sans subsides & sans imposts: nous croyons que chacun non seulement est obligé d'obeïr à ces Loix, mais aussi de contribuer à ces dépenses. Tellement qu'en toutes les necessitez publiques, chacun est obligé de porter volontairement ce joug, selon que la Puissan-ce superieure en distribuë le saix par sa prudence. Comme donc les sainces Apostres nous ont donné ces instructions en vn temps auquel les souuerains Magistrats estoient infideles, & comme les premiers Chrestiens les ont fidellement pratiquées enuers les Empereurs & Payens & persecuteurs, ainsi croyons nous qu'en ce temps, la diuersité de Religion n'empesche nullement ny l'authorité des Magistrats, ny la sujettion des inferieurs, & que la cognoissance & la profession de la verité ne dispense aucunement de ce respect, enuers

ceux à qui Dieu n'en a pas encore donné l'illumination par sa grace. Voila donc ce que nous croyons effectivement, que i'ose bien prononcer estre tel, qu'il n'y a personne qui sçache que c'est du Christianisme, qui y trouue rien à reprendre. Car tout cela est conforme aux commandemens de Dieu: à l'oraison que nostre Seigneur à enseignée à ses Disciples; au Symbole que nous appellons communément des Apostres; à celuy du Concile de Nicée; à celuy qui a esté composé par S. Athanase, & approuué par tous les Orthodoxess aux decisions des premiers Conciles de l'Eglise, & generalement à tout ce que l'Eglise Romaine mesme croid, en cela en quoy il n'y a point de different entre nous. Partant nous sommes persuadez que tant s'en faut que cette creance nous doiue produire l'auersion de ceux auec qui nous viuons, qu'au contraire, elle nous deuroit consilier la bien-vueillance de tout le monde.

SECTION VIII.

Qu'en ce que ceux de la Religion font en leurs exercices de pieté en consequence de leurs dogmes, il n'y a rien qui merite qu'on ait aucune auersion pour eux.

A PRES auoir exposé ce que nous croyons, il est raisonnable d'informer ceux qui ne le sçauent pas, de ce que nous faisons en consequence, en ce qui est de nos exercices de pieté. Si nos plus grands aduersaires auoient la curiosité de venir seulement en nos Temples, à l'heure que nous y sommes assemblez pour le seruice de Dieu, pourueu qu'ils peussent vn peu mettre à part leur passion, ils en remporteroient sans doute vne grande edification, & nous n'aurions point à faire de nous estendre en cette partie de nostre defense. Mais pource qu'ou bien les Directeurs de leurs consciences les en destournent, ou bien ils y ont de la repugnance d'eux-mesmes, ou ils craignent de scandaliser ceux de leur profession, & d'engendrer en leurs esprits de mauuais soupçons, ou bien sinalement les occupations de la vie presente, & quelque nonchalance les retient, ie representeray icy briesuement ce que c'est, asin qu'au moins quelques-vns s'instruisent en particulier, de ce contre quoy tant de gens crient ordinairement, sans en auoir aucune certaine cognois-sance.

Outre les prieres particulieres de chaque personne & de chaque famille, qui se font soir & matin dans les maisons, & la lecture de la Parole de Dieu, qui se fait reglément en diuers lieux apres les repas, nous auons, où la commodité le peut permettre, diuers iours en la semaine destinez à la predication, & aux autres parties du culte diuin. Sur tout y auss nous si particulierement consacré le sain& Dimanche, à l'imitation des Apostres & de toute l'Eglise ancienne, en memoire de la resurrection du Sauueur, qu'il n'y a lieu où il nous soit permis de le faire par les Edicts, auquel ceux de nostre prosession ne s'assemblent ce iour-là solemnellement vne ou deux fois, pour rendre à Dieu les deuoirs de leur pieté, & en s'auançant en la sanctification, se confirmer de plus en plus 284 Apologie

en l'esperance de la vie. Là donc la premiere chose qu'on fait est qu'apres l'inuo-cation du nom de Dieu, quelqu'vn qui est destiné pour cela lit hautement l'Escriture en langage populaire, afin de donner au peuple la cognoissance de l'histoire sain-&e, quelque teinture des predictions des choses futures lesquelles y sont contenues, & sur tout l'intelligence des mysteres de nostre redemption. Ce qui ne se peut faire sans luy inculquer les enseignemens à la pieté & à la vertu, & les consolations, & les exhortations qui nous y ont esté laifsées par les Prophetes & par les Apostres. Et on ne sçauroit suffisamment representer combien cette lecture a d'efficace pour esmouuoir les consciences, & pour imprimer de bonnes pensées dans les ames des Chrestiens. Aussi a t'elle esté si soigneusement pratiquée en l'Eglise Primitiue, qu'il y a eu des Lecteurs en charge particuliere pour cela, qui depuis ont tenu rang entre les ordres de l'Eglise. A cette lecture on entremesse le chant de quelques Pseaumes de Dauid, comme ils ont esté mis en rime par Clement Marot & par de Beze. Or d'autant que de tout le Vieux Testament le liure de cessainets Cantiques est

sans aucune difficulté le plus beau, & le plus capable de former les hommes à la pieté, ce n'est pas chose conceuable à ceux qui ne l'ont point experimenté, combien ce chant adjouste à la deuotion, ny quelle vtilité ceux qui y ont de l'attention en recueillent. Car il n'y a personne en affliction, qui n'y trouve de la consolation, il n'y a qui que ce soit en prosperité, qui n'y trouue dequoy s'exciter à louanges & à actions de graces. Les prieres y sont ardentes tout ce qui se peut, les louanges des vertus de Dieu y sont illustres & magnifiques. Les accouragemens à la patience y sont souuerainement puissans, les promesses & les asseurances de la bonne volonté de Dieu y sont expresses à merueilles. Les exemples de ses iugemens & de ses benedictions y sont en grand nombre dans les histoires du temps passé, les predictions de ce qui deuoit arriver à nostre Seigneur y sont si exactes & si precises, que vous diriez que ses actions, & notamment ses passions, y ont esté peintes. Les exhortations à la pieté, à la saincteté, & à la vertu y esleuent l'ame iusques dans les Cieux, les imprecations prophetiques que Dauid y fait contre les meschans, & les denon-

ciations des iugemens de Dieu dessus eux; font capables de mettre la terreur & l'espouuantement dans les ames les plus insensibles. Au reste tout cela y est semé de sibeaux ornemens, enrichy de si glorieux emblémes, & rehausse de pensées si sublimes & si celestes, qu'il faut estre plus brutal que les brutes mesmes, & plus endurci qué les rochers, pour n'en estre point rauy en admiration, & pour n'en sentir point d'incomparables eslancemens de pieté, & d'i nenarrables esmotions de devotion en la conscience. Nous sçauons bien qu'il y a quelques esprits mal formez, & mesmes entre les Predicateurs, qui taschent autant comme ils peuuent de rendre ce sain& exercice ridicule. Car ils trouuent estrange premierement qu'vniuersellemet tout le monde y chante, tant les petits que les grands, sans en excepter les femmes mesmes. Puis apres ils cherchent par cy par là quelques vieux mots & quelques locu# tions surannées, qui se rencontrent notamment dans la rime de Marot, qu'ils tournent en derission; iusques-là qu'il y en a quelques-vns qui les veulent faire seruir à engendrer dans les esprits, des pensées sa-les & profanes. Or pour ce qui est de ces

derniers, ie ne leur responds point. Ils ne sont pas dignes que les gens d'honneur s'amusent à eux, & beaucoup moins d'estre receus à monter dans les chaires destinées à la predication, lesquelles doiuent estre si sainctes & si venerables. Ie diray seulement que pour ce qui est de la vieillesse de l'elocution, si nous voulions nous entrechicaner, & nous rendre ridicules les vns les autres, il se trouueroit d'aussi mauuais mots, & aussi peu congrus pour le moins, dedans le Latin de la Messe, qu'on en rencontre dans le François de la rime de Marot. Chacun sçait combien nostre langue est exposée au changement, 80 comment au bout de neuf ou dix ans pour le plus, vne façon de parler qui a eu de l'elegance en son temps, devient quasi barbare & estrangere à nos oreilles. Tant y a que ces Pseaumes, dont on se rit à cette heure, estoientily a cent ans l'admiration des Cours des Rois, & qu'auant que l'vsage auquel nous les auons employez les eust rendus odieux, ils estoient vniuersellement estimez par tout le Royaume. Et ceux qui ont quelque sens, & tout ensemble quelque candeur, aduoiient que si l'on en oste quelques-yns des plus vieux ter-

mes, qui sont en assez petit nombre pour-tant, ils ont en leur simplicité vne grace tout à fait incomparable. Tellement que les efforts qu'y ont fait les Des-Portes & les Marillacs, & generalement tous ceux qui se sont estudiez à estendre ces saincts Cantiques en Paraphrases, les ont bien surmontez en pompe & en elegance quelquessois, mais n'ont iamais sçeu appro-cher de cette claire naisueté qui respond si parsaitement au texte originel du saince Prophete. Mais nous viuons en vn temps auquel on ne fait plus de cas ny de la beauté des pensées, ny de la grace naturelle d'vne diction simple & sans fard, ny de cét air genereux & quelquesfois vn peu nonchalant d'vn genie qui enfante ses produ-ctions sans peine, ce qui a rendu si recommandables les ouurages des plus anciens Autheurs, si le moindre petit mot qui n'est pas à la mode les des-honore. La pieté mé-me n'est pas agreable si elle n'est aiustée selon le temps, & pour plaire, il faut qu'elle estudie tous ses pas, & qu'elle pese tous ses mots, & que toutes ses periodes tom-bent en cadence. Certainement cette curiosité aux choix des mots, ce nombre & cette mesure qu'on affecte maintenant auec

auec tant de soin dans les periodes, & cette iustesse si parfaite qu'on obserue dans la structure des termes, & dans la mesure des vers, a quelque chose de singulierement elegant. Mais outre qu'il a esté ingenieusement & iudicieusemet dit par quelqu'vn; que c'est vne faute en matiere de bien dire, que de ne faillir du tout point, & qu'vn soin si scrupuleux semble auoir quelque chose de seruile, c'est bien souvent vne gesne des esprits, qui leur fait perdre quant tité de beaux essans & de genereuses pensées. Quoy qu'il en soit, car ie m'auance peut estre vn peutrop, la Religion n'a iamais esté superstitieuse en matiere de pa roles,& comme elle n'emprunte point son efficace de l'eloquence du fiecle, aussi ne se donne-t'elle pas beaucoup de peine d'estre parée de ces ornemens. Il luy suffit qu'on l'entende seulement; & semble qu'elle se plaise à triompher en sa simpliciré, de la pompe & de la magnificence du monde. Pour ce qui est de permettre que toutes personnes chantent en nos assemblées, ceux qui nous en blasment ne sça-uent pas que l'Eglise Primitiue le pratiquoit ainsi, comme il y en a de beaux enseignemes dans Pline Second, dans ChryApologie fostome, dans fainct Augustin, & quantité d'autres. Veritablement si cela engendroit quelque confusion, il s'en faudroit abstenir, afin qu'en l'Eglise de Dieu tout se fist, selon le precepte de sain et Paul, honnestemet & par ordre. Mais bien que ces Pseaumes ayent esté mis sur vne musique vn peu difficile en quelques endroits, nous sommes tellement accoustumez à les chanter dés nostre bas aage, que les plus simples du populaire s'y rencontrent en vn parfaitement bon accord auec les meilleurs Musiciens, & que du messange de tant de voix se forme ie ne sçay quelle harmonie, dont le seul son a quelquessois rauy les passans, tant l'air de ce chant est melodieux, & tant il est propre à donner à l'esprit des esmotions extraordinaires. Pour nous certes nous pouuons bien parler de ce que nous en experimentons, & dire en toute verité qu'il y a telle occasion où ces diuines paroles animées de la façon, mettent quasi nos ames hors d'elles-mesmes. De sorte que ie ne croy pas qu'il se puisse voir en la terre vne plus belle image de ce que nous esperons quelque iour en Pa; radis, qu'vne telle congregatio de personnes assemblées pour les actions de pieté,

lors qu'elle pousse vers le ciel les louanges de Dieu sur tant de voix, où reluisent de tous costez les estincelles de sa deuo+ tion & de son zele. Le Ministre estant venu apres cette lecture & ce chant, il fait assez ordinairement lire les Commandemens de Dieu, que l'on escoute auec reuerence, les hommes àyans la teste descouuerte par respect, & tout le reste de l'assemblée en profond silence. Ce qui donne de la reuerence pour la Loy de Dieu, & la ramentoit à chacun de nous, pour enfaire la regle de nostre conduite. Cela fait, le Ministre monte en chaire; & commence son action par vne generale confession des pechez de toute l'assemblée, par vne protestation solennelle de repentance, & par vne priere bien expresse & bien emphatique pour demander pardon à Dieu, & implorer l'assistance de la grace de son Esprit au nom de Nostre Seigneur Iesus-Christ. Apres cela il fait chanter vne pause d'vn Pseaume ou choisi expressement pour son action, ou suiuy selon l'ordre estably dedans l'Eglise, & le Cantique acheué, il recommence vne autre priere, dans laquelle, recognoissant la sublimité incomprehensible des myste191

res de la Foy, & l'imbecilité naturelle de l'entendement de l'homme, il demande à Dieu l'illumination de sa grace, pour bien comprendre ses diuins secrets, & la faculté de les énoncer en pureté & en verité, à l'edification de ceux qui l'entendent. Sur tout il le prie qu'il rende sa parole efficace par sa benediction, à ce qu'elle entre bien auant dedans les esprits de ses auditeurs, & qu'elle y soit comme vne semence seconde de sanctification, qui produise abondamment des fruiets de iustice & de pieté, à la gloire de Dieu, à l'edification du prochain, & au salut de chacun particulier; puis il conclud par l'oraison Dominicale. En suite, apres auoir aduerty d'escouter auec reuerence & obeissance de foy, il lit quelque partie de l'Escriture, qu'il se propose d'exposer, & puis s'estant composé à parler, tout le monde se dispose à l'escouter en silence. Alors apres vne preface accommodée à son texte, ou à quelque occasion qui se presente, il explique son sujet le plus exactement qu'il se peut, se tenant serré aux paroles & à l'intention de son autheur, sans se laisser emporter ny à des digressions inutiles, ny a des narrations d'histoire hors de pro-

pos, ny à des amplifications pedantesques, ny à beaucoup de citations d'anciens autheurs, de quelque nature qu'ils soient, & se contente d'expliquer, d'illustrer, & de confirmer ce qu'il se propose, par passages de la Parole de Dieu, & par les raisons qui s'en desduisent. S'il se presente en suite quelque controuerse, à la decision de laquelle la matiere dont il se traitte puisse seruir, il la y applique modestement, sans autre chaleur & sans autre passion que celles qui sont permises par les Loix de disputer, & que la vehemence ordinaire de la predication donne. En quoy il luy est souverainement recommandé de ne tesmoigner point qu'il aime la controuerse auec qui que ce soit, & de n'insulter point aux personnes auec qui est le demessé, ny mesmes au dogme qu'il entreprend de refuter, sinon autant que la gloire de la verité le requiert, & que l'amour de la paix, & le respect des personnes le peut permettre. En fin il vient aux enseignemens que le passage qu'il a traitté luy fournit, pour les appliquer en remonstrances, en exhortations, en consolations, & en accouragemens selon la necessité des occurrences. Particulierement 294

il infilte sur les exhortations à la pieté, à la saincteté, à la vertu, à la charité, au mespris des choses du monde, à la patience en affliction, à la confiance en la bonté de nostre Seigneur, à l'obeissance aux Magistrats, tant Souuerains que subalternes, & à dresser toutes ses pensées vers le prix de l'immortalité, dont il ramentoit tousiours l'esperance à la fin de son propos, selon les promesses de l'Euangile. Tout cela se fait auec vne simplicité & vne grauité digne de la saincteté de l'action, & du sujet qui s'y traitte; sans gestes de basteleur ou de charlatan, sans contenances de bouffon ny d hypocrite, sans affectation d'eloquence ny de vaine erudition, sans marques de vanité, sans ostentation & sans parade. De sorte que s'il y paroist quelque vehemence & quelque grace dans la prononciation, c'est l'excellence du sujet & la nature du predieateur qui la donne. S'il y a quelques fleurs en son langage, & quelques ornemens en son propos, on les y void naistre d'euxmesmes, & non y estre amenez de loin;& quoy qu on n'y vienne point sans premeditation, l'action est toussours pleine d'autant de simplicité, & autant esloignée do

la magnificence de l'art, que si elle estoit impremeditée. De sorte qu'à l'imitation de l'Apostre S. Paul, toute l'esficace de telles predications des pend, non des discours attrayans de la sapience du siecle, mais de la Parole de Dieu, & de la vertu de son Esprit qui l'accompagne. Mais elle s'y deploye de telle saçon, que souvent il y en a peu dans l'assemblée qui n'en soient esmeus; & quelquessois on y experimente detels transports, que s'il plaisoit à Dieu retirer du monde à l'heure qu'on est ainsi rauy, on en sortiroit non seulement sans regret, mais auec vne allegresse incomparable. Le Presche acheue le Ministre se met à prier, ou bien en termes qu'il conçoit luy mesme, ou bien selon les formulaires que nous en auons en nos Eglises. Quoy qu'il en soit, tous les Dimanches il récite en la presence du peuple, qui le suit des mouuemens de sa denotion, vne assez longue priere, dans laquelle nous auons recueilly tout ce qui est necessaire de demander à Dieu, tant pour le public que pour les particuliers, tant pour ce qui regarde la vie presente, que principalement pour ce qui concerne celle qui est à venir. Là donc apresauoir declaré que c'est en la

T iiij

196 Apologie

seule confiance des promesses que Dieu nous a faites en Iesus - Christ, que nous nous presentons devant luy, pour luy addresser nos oraisons, nous commençons à le prier pour les Puissances du monde, & notamment pour le Roy qu'il nous a donné, luy demandans ardemment toute sorte de faueur, de protection & de benedi-&ion pour sa personne, & pour son Estat. En suite nous ne manquos iamais de prier pour la Reyne, pour Monseigneur le Frere du Roy, Monseigneur le Duc d'Orleans, Messeigneurs les Princes du Sang, & tous ceux de la Maison Royale, & du Conseil de sa Majesté, auec tous ceux qui sont en authorité en l'administration des affaires du Royaume. Nommément nous respandons nos vœux en la presence du Seigneur pour les Gouverneurs des Provinces & des Places dans lesquelles nous habitons, & pour les Magistrats à qui la Iustice & la Police en est commise, à ce qu'il luy plaise les benir & les conduire par son bon Esprit en l'exercice de leurs charges, & qu'il encline leurs cœurs vers ceux qui le seruent en pureté. De là nous passons à prier pour les Pasteurs que Dieu a establis dessus son Eglise, à ce qu'il leur donne de s'acquiter fidelement de leur deuoir; pour tous hommes generalement, à ce qu'il les appelle à sa cognoissance; pour tous ceux qui sont affligez, à ce qu'il les console & qu'il les deliure; pour tous ceux qui souffrent persecution pour la verité, à ce qu'il les soustienne & qu'il les rende inuincibles; & en fin pour nous mesmes, à ce qu'il nous rende capables de la iouissance de son Royaume; puis nous finissons par l'oraison de nostre Seigneur, & par le recit du Symbole des Apostres. Quelquessois dans les afflictions publiques, dans la celebration de nos ieusnes, ou quand quelque autre occasion le requiert, nous suiuons vn autre for, mulaire de priere, que nous auons encore en la Liturgie de nos Eglises, dont toute la matiere est à peu pres semblable à la precedente, sinon que la cósession des pechez y est encore plus expresse, les sentimens de repentance aucunement plus vifs & plus profonds, les vœux encore ie ne sçay com-, ment plus feruens, & les marques de l'humiliation de l'esprit, telles qu'elles doiuet estre en vn dueil public & en vne affliction extraordinaire. Or ie ne veux point autrement recommander ces prieres que par le jugement que nos ennemis mesmes en

ont fait. Car ils les ont trouuées si dignes du Christianisme, si propres à enslammer la pieté, si pleines d'esprits & d'action, si belles & si efficaces, que quelques Curez de Paris les ont inserées dans le volume des prieres qu'ils ont recueillies pour mettre entre les mains de leurs parroissiens; de forte qu'il y a tel qui sans nous cognoistre nous maudit, qui prie Dieu comme nous pourtat, & à qui nous fournissons le moyen de nourrir & de fomenter ce qu'il y peut auoir de bon dans sa pieté, sans qu'il y penfe. Apres ces prieres, s'il y a quelqu'vn des Sacremens à celebrer, on le fait autant que l'on pot auec la reuerence conuenable; Car s'il faut baptiser vn enfant, on l'apporte en la presence de toute l'Eglise, afin d'estre consacré à Dieu le plus solennellemet qu'il se peut, & là estant presenté au Ministre par le pere, & en son nom par ceux qu'il a choisis pour cet effect, on lit publiquement le formulaire dans lequel nous auons compris l'institution du S. Baptesme, son but, ses fruits, son efficace, & les principales choses pour lesquelles nous croyons qu'il doit estre administré aux petits enfans. Puis par vne priere solennelle on offrecet enfant à Dieu, en demandant

pour ceux de la Relig.

au nom de nostre Seigneur Iesus-Christ qu'il soit fait participant de son salut, & que le Baptesme produise en luy sa vertu, en remission du peché originel, & en san-Etification, lors qu'il en sera venu en aage. Et apres auoir tiré promesse de ceux qui le presentent, quils l'instruiront en la foy de l'Euangile,& en l'amour de la picté,on lui verse de l'eau sur la teste, en le baptisant au nom du Pere, & du Fils, & du S. Esprit. Si c'est le temps & l'occasion de participer à la Cene, on adjouste premierement quelque chose à la priere publique, pour demander à Dieu qu'il nous dispose à communiquer deuotieusement à ce Sacremet, & qu'il le rende efficacieux au salut & à la consolation de nos consciences. Puis on lit le formulaire dans lequel nous auons compris son institution, comme elle est rapportée par S. Paul, & briefuement expliqué l'vsage de cette ceremonie, sa nature & son efficace, conjointement auec les exhortations par lesquelles le Ministre reueille les consciences des affistans. Par là il les incite à s'examiner eux mesmes,& à se disposer à la communion par foy & par repentance, & par de sainctes dispositions à la charité, en denonçant à ceux qui

ne sont pas bien preparez, de s'abstenir de ces saints mysteres. Ce qui ayant esté fait auec toute la grauité conuenable, le Ministre prononce quelques paroles tirées de l'Ecriture sur le pain & le vin du Sacrement, communie auec ses collegues, & en suite donne à communier à tous ceux de l'assemblée qui s'y veulent presenter, & qui portent auec eux certaine marque qu'ils sont reconnus pour estre de nostre profession. Là viennent premierement les hommes, selon la prerogative de leur sexe, la teste descouuerte, & en estat de respect & d'humilité: puis les femmes en vne modeste contenace, sans pompe d'habillemens, & sans marques de vanité; & ainsi chacun estant aduerty par la bouche du Ministre que c'est la communion au corps & au sang de Christ, qu'on luy donne pour seau de la remission de ses pechez, prend le pain & la coupe de sa main, communie debout en tesmoignage de reuerence, & puisse retire en sa place sanstumulte ny confusion. La communion paracheuée, le Ministre remonte en chaire, rend graces à Dieu solennellement de ce qu'il a fait la faucur à l'assemblée de l'ateirer à la communion de son Fils, & le prie pour ceux de la Relig.

301

d'en imprimer bien profondement la souuenance dans la conscience de ses fideles, & de leur rendre cette sainte ceremonie fingulierement efficace en sanctification. Quoy fait, on chante le Cantique d'action de graces, à l'imitation de nostre Seigneur & de ses Apostres. Si ce n'est point iour de celebrer les Sacremens, apres la priere dont i'ay cy-dessus parlé, on chante vne pause de Pseaume, apres laquelle on donne la benediction au peuple par les paroles que Dieu auoit autrefois ordonnées en sa Loy, & le renuoye-t'on en paix auec exhortation de n'oublier iamais la charité enuers les pauures. Outre tout cela, dans les Eglises vn peu populeuses, & où ny l'esloignement du lieu, ny les autres incommoditez qui trauersent les exercices de plusieurs, n'empeschent pas l'obseruatió d'vn ordre vn peu plus exact, on explique le Catechisme le Dimanche à l'apresdisnée. Car nous auons fait soubs ce nom vn recueil de toutes les doctrines fondamentales à la religion Chrestienne, disposé par interrogations & par responses, accommodé le plus qu'on a peu à la capacité des enfans, & où on a briefuemet touche les principales controuerses de nos

temps. On en prend donc vne section, qu'on fait reciter à quelques enfans, puis on l'expose deuant le peuple le plus intelligiblement qu'il se peut, afin de donner à la ieunesse de bonnes impressions, tant pour ce qui est de la doctrine, que pour ce qui regarde la pieté & les bonnes mœurs: ce qui renouuelle en l'esprit de tous les assistant les ideées des connoissances qu'ils avoient desia acquises. Tellement que tous les ans; car le nombre des sections est à peu pres comme celuy des Dimanches de l'année; on donne au peuple Chrestien vne exposition populaire de tous les mysteres de la Foy, & on le premunit des principales raisons par lesquelles il en faut defendre la verité contre les erreurs les plus importantes. Ce qui est accompagné de prieres, de chant de Pseaumes, & de toutes les parties du Culte que i'ay cydeffus descrit.

Or ne veux-je point icy faire de comparaison entre ce service que nous rendos à Dieu par nostre Seigneur Iesus Christ,& celuy qui est receu en la communion Romaine. Les Ceremonies y sont si diuerses, le langage si different, & generalement toutes choses y sont si diametralement

303

opposees, qu'il faudroit trop allonger cette Apologie pour bien expliquer & bien demonstrer les raisons de si differentes institutions, les auantages de l'vne pardessus l'autre, & l'édification & la san. ctification que le peuple en peut rempor-ter. Chacun peut assez faire cette compa-raison de soy-mesme, & qui qu'il soit, s'il ne se laisse point trop maistriser par les passions & les preiugez, nous ne craignos pas que le iugement qu'il en fera, nous soit autre que fauorable. Et quant à ceux qui ont quelque connoissance de la premiere antiquité de l'Eglise, comme nous en auons les enseignemens dans les Escrits des Apostres, de Iustin Martyr, de Tertullian, & de quelques autres, ils ne nieront pas que nostre Culte ne luy soit sans contredit plus conforme, que celuy que l'Eglise de Rome pratique maintenat. le diray seulement que toute comparaison mise à part, & à nous considerer purement & simplement en nous-mesmes, il n'y a rien en tout ce seruice de nos Eglises qui merite la haine publique, que plusieurs essayet de nous faire porter depuis si long temps. Car tout ce que nous y faisons estant conforme à nostre creance, & non

304 Apologie
stre creance estant, comme nous l'auons veu cy-dessus, de l'adueu mesme de nos aduersaires, le Christianisme en tous ses principes, & dans ses plus belles & plus importantes conclusions, le service qui est edissé dessus ne peut sinon estre propre à éngendrer la pieté enuers Dieu, & la charité enuers les hommes. Or si nous fommes dignes de haine pour estre pieux enuers Dieu, & charitables enuers nos prochains, par quel moyen nous concilierons nous la bonne voloté de nos concitoyens, & qu'est-ce qui nous pourra ren-dre recommandables enuers nos Superieurs, pour obtenir leur protection, & les effets de leur equité, si ces qualitez nous les alienent? Il est vray qu'il y en a quelques-vns qui sont equitables iusques à ce point, que de confesser que nous ne sommes point dignes de l'auersion qu'on a pour nous, à cause de ce que nous croyos; mais ils pretendet que pour ce que nous n'en croyons pas assez, nous n'en faisons pasassez aussi, & qu'encore que nous embrassions vne partie du seruice de Dieu, si ne peut-on pas supporter que nous en reiettions l'autre. Car comme ceux-là sont odieux qui commettent quelque chose contre

contre les regles que Dieu nous a don-nées pour conduire nostre pieté, aussi ceux-là tombent-ils dans vn notable defaut, qui ne remplissent pastoute la mesure de ces regles, & qui retranchét quelque partie de la pieté que nous luy deuos. Pour donc satisfaire à cette plainte, qui seule reste à faire contre nous, outre les reflexions que nous auons faites cy-dessus, ces Messieurs sans doute trouueront bon que nous leur representions deux choses: L'vne est, que quand on s'abstift de quelque partie du seruice de Dieu par mespris, il n'y a point d'excuse pour celuy qui le fait, ny deuant Dieu, ny deuant les hommes. Mais quand on le fait par mouuemet de la conscience, & pource que n'estant pas bien informé de la volonté de nostre Seigneur, on a peur d'en faire trop, il a sans comparaison plus agreable cette modeste timidité, que la temerité de ceux qui se portent indifferemment & sans aucune circonspection, à ce dont ils n'ont aucune certitude qu'il soit legitime. Car quoy que c'en soit, la timidité en telles choses est vne marque de respect, au lieu que la precipitation. qui induit à faire à tors & à trauers tout ce que la fantailie

nous suggere, ou à receuoir sans exami-ner tout ce qui nous est sourny par autruy, monstre qu'on ne se donne pas beaucoup de sollicitude si le service qu'on rend à Dieuluy peut estre agreable ou non. C'est pourquoy S. Paul enteigne constamment & disertement, qu'encore que l'vsage de toutes sortes de viandes soit indifferent de sa nature, & permis par la doctrine de salut, si est-ce que celuy qui s'en abstient pource qu'il a peur d'offenser Dieu, & de violer quelqu'vne de ses institutions s'il en vsoit, luy est sans comparaison plus agreable que celuy qui nonobstant le scrupule qu'il en fait, s'y laisse emporter par l'exeple, ou par quelque autre tel motif. Puis donc que non seulement nous soupçonnons que ce qu'on estime estre de manque dans nostre creance, & dans le seruice qui s'en ensuit, est plustost vn excés que non pas vn defaut, mais mesmes que nous sommes viuement & profondement persuadez que ce sont choses ennemies de la gloire de nostre Sauueur, & pernicieuses à nostre esperance, nous serions dignes de beaucoup plus d'auersió qu'on n'en a pour nous, si nous nous laissions emporter pardessus cette persuasion & ce mouuement

pour ceux de la Relig.

307

de nos consciences. L'autre est, que si ceux qui estiment que nostre creance est defe-Étueuse, y veulet adiouster quelque chose, & nous persuader ce que nous ne croyons pas, il faut qu'ils prennent tout le contrepied de la violence & de la haine. Car outre que les creances ne s'impriment que par la raison, outre que la religion Chrestienne a cela de particulier pardessus toute autre discipline qui soit sur la terre, qu'à elle forme les esprits des hommes à la douceur & à la debonnaireté: diuerses cosideratios font que la haine & l'animosité, & les traittemes défauorables, produisent en nous yn effet tout contraire à l'intentio de ceux qui les employent en nostre endroit. D'yn costé nous sommes hommes, qui auons les ressentimens naturels tous semblables à ceux des autres, sinon autant que nous taschons de corriger par la parole de Dieu ce qu'il y a de vicieux. Or c'est le naturel de tous les hommes de se roidir contre la contrainte, & de tascher de maintenir leur liberté. Et bien que pour ce qui regarde les actions corporelles que nous pouuons faire en bonne consciéce, nous ployons volontairemet sous l'autorité de nos Superieurs, & qu'on ne nous

V ij

peut pas accuser d'y estre plus refractaires que celle de l'autre communion, si est-ce que pour ce qui regarde les opinions de l'esprit en matiere de religion, nous sommes esleuez dés nostre enfance à deferer peu à toute autre authorité qu'à celle de Dieu. Car on nous persuade par la connoissance de la verité, on force nos entendemens par son euidece, on nous fait voir à l'œil; & toucher à la main les raisons de ce qu'on veut que nous croyions, & nous sommes si habituez à cela, qu'vn seul passage de l'Ecriture que nous entendons bie, a plus de poids énuers nous que l'authorité de tout vn Concile. Tellement qu'en des ames ainsi disposees dés leur enfance, & qui ne sont menées en telles choses d'autre passion que du zele de la gloire de Dieu, & du desir de leur salut, il ne faut pas esperer de faire iamais entrer aucun dogme de la Foy, sinon à force de raisons accompagnées de demonstration de douceur & de bienveillace. D'autre costé cette façon de nous vouloir conuertir par des traittemens peu equitables, nous rend suspecte la creance de ceux qui en vsent enuers nous. Pource que de toutes les veritez qui sont au monde, la plus claire & la plus

pour ceux de la Relig.

euidéte est celle de la Religion de Christ, C'est elle sans doute qui a le plus d'attraits pour se persuader aux hommes aucunement raisonnables, & le plus de sorce encor pour conuaincré les contredisans. Et afin de faire d'autant plus paroistre cette clarté & cette force de la Foy Chrestiëne, Dieu a expressémet voulu que quand elle s'est establie en la terre, elle n'eust aucun support dans les puissances du monde, & qu'elle tirast tous ses auantages d'elle mes me & de sa naturelle beauté. Aussi a t'il esté sans doute beaucoup plus glorieux pour elle, que douze pauures pescheurs; qui auoient pour ennemis tous les Potentats de la terre, l'ayent neatmoins rendue victorieuse de tout l'Univers, & ayet amené les plus grands Empires sous l'obeis-sance de Iesus-Christ, que si Dieu l'eust armée des choses qui ont de l'éclat, & qui impriment de la terreur dans les entendemens des hommes. Si donc c'est la verité qu'en nous veut faire receuoir, on luy fait tort d'y employer, non certes les violences ouvertes & les persecutions, car la bonté de nos Roys, & la iustice de nos Gouverneurs nous en garentit, mais les iniquitez moins descouuertes, & les

traittemens peu fauorables que quelquesvns des officiers de Iudicature, & la pluspart des peuples pratiquent assez ordinairement enuers nous. Enfin, pour ce que les anciens Chrestiens ont dit alors qu'on les mal-traittoit, que la verité est estrangere en ce monde, & partant que ce n'est pas chose estrange sielle y trouue peu de faueur. Comme les esprits des hommes sont enclins à tirer toutes choses à leur auantage, nous ne sentos aucun effect de la mauuaise volonté de nos concitoyens, qu'il ne nous vienne incontinent en la pensée, que c'est la verité de Dieu que nous maintenons, & que l'on combat en nos personnes sans la connoistre. A quoy nous adioustos cette consideration, que le Seigneur Iesus & ses Apostres ont predit, que la religion qu'ils annonçoient fouffriroit beaucoup. de contradiction en la terre. Vous serez, dit le Sauueur, hays à cause de mon Nom. Nous sçauons bien qu'il faut vser de quelque retenue à raisonner de cette sorte, & qu'il faut estre persuadé par d'autres preuues que par les choses que l'on souffre, que c'est la verité qu'on dessend. Car les luifs endurent aussi de la part des Chrestiens, & quelques-vns d'entre les peuples Payens

ont esté exposez à beaucoup de calamitez de la part des gens qui font profession du Christianisme. Les Indes Orientales, & particulierement les Occidentales, en sont tesmoins; & bien que les Espagnols y ayét exercé des rigueurs & des cruautez sans exemple, on ne sçauroit pas pourtat exempter absolument de blasme en cet égard les autres nations qui les conquestent. Il se peut faire qu'en Angleterre & en Escosse les Catholiques Romains n'y ont pas tous leurs contentemens, comme au contraire on dit qu'en Irlande les Protestans ont souffert depuis peu de temps des inhumanitez épouuentables. Tantum religio potuit suadere malorum! Mais veritablement & les vns & les autres ont tort, si sous pretexte de religion, & si par le zele qu'ils ont pour celle dont ils font profession, ils commettent quelque chose contre ce qui est de l'humanité, & contre la iustice des loix fous lesquelles ils viuent. Et si les Catholiques d'Angleterre auoient eu par le passé, & auoient encore maintenant des Edicts, sous la protectió desquels ils fussent à couuert, comme nos Roys nous en ont donné, ie tiendrois les Reformez pour indignes de la qualité qu'ils portent, s'ils abu-

soient de leur authorité pour en eneruer la vigueur, & s'ils ne les obseruoient pon-Auellement en toutes occurrences. Car qui n'est pas iuste en sa conduitte, n'est pas veritablement deuotieux, & qui n'obserue pas les loix qu'il doit maintenir, soit en qualité de personne priuée ou de personne publique, n'est passiuste. Ce zele destitué de iustice & d'équité, est passion: & bien qu'elle nous aueugle quant à nous, & que nous pensions faire sacrifice à Dieu quand nous nous y laissons emporter, Dieu ne nous en aduouëra pas pourtant, & ne receura point en iugement nostre passion pour son zele. Car le vray zele n'est rien sinon vne certaine ferueur d'amour pour la gloire de Dieu & de sa verité; au lieu que la passion est vn excés de l'amour que nous nous portons à nous-mesmes. Or il n'est pas raisonnable que l'amour démesuré que nous nous portons, & aux choses que nous considerons pour nostre interest, nous soit alloué en compte, comme si nous n'y considerions rien sinon Dieu, & les choses qui le regardent. En fin, quand cette haine qu'on porte à nostre doctrine ne seroit point marque certaine & indubitable de sa verité, si semble-t'il qu'il est

pour coux de la Relig. 3

e de la bonté & de la prudence de ceux qui nous veulent attirer à eux, de s'empescher de nous donner les occasions que nous la prenions pour telle. Car tandis que nous le croirons ainsi, ce sera yn obstacle insurmontable à cette conversion, la quelle ils sont prosession de vouloir procurer de toute leur puissance.

CONCLVSION.

TCY ie prie le Lecteur de prendre en bonne part que ie donne la conclusion à cette Apologie, par quelques briefues reflexions sur les actions & les interests des Souuerains, dont les sujets professent diuerses religions: sur le deuoir des Magistrats inferieurs, à qui ils ont commis l'administration de la Justice & de la Police en leurs Estats: & en fin sur la disposition des esprits des peuples, & sur leurs deportemens en ces professions differentes. Et pour ce qui est des Souuerains, comme ils sont quant à leurs personnes, Chrestiens, & quant à leur charge & à leur dignité, Potentats, aussi ontils sans doute & des considerations, &

314

des interests yn peu diuers, selon la difference de ces relations: mais que la prudéce Politique & Chrestiene neantmoins, sçait fort bien accorder ensemble. En ce qu'ils font profession du Christianisme, non seulement ce n'est pas merueille s'ils s'affe-&ionnent à l'auancement de la creance qu'ils ont embrassée, mais il semble que chacun se doit estimer obligé en sa conscience de le faire, & que c'est vn instinct de la pieté. Car puis qu'il y va du seruice de Dieu, ce n'est pas en estre zelateur que de ne le prouigner pas autant qu'on peut, selon la persuasion qu'on en a; & puis qu'il y va du falut de l'homme,ce n'est pas estre émeu de charité comme il faut, que de ne tascher pas de ramener au bon chemin ceux que l'on pense qui s'en égaret. Neantmoins ny ce zele ny cette charité ne les doit point porter entant que Chrestiens, au delà des termes de la douceur & de la raison, seules voyes couenables pour faire entrer la religion de Iesus-Christ dans la conscience des hommes. Ny luy ny ses Apostres n'y ont point employé le fer & le feu, & s'il est arriué que l'Euagile qu'ils ont annoncé, ait esté cause dans le monde de quelques combustions, cela est arriué

par le vice de l'esprit humain, contre la nature de la doctrine de salut, & contre le dessein de son autheur & de ses Ministres. Entant qu'ils sont Princes & Potentats, ce n'est pas merueille non plus s'ils souhaittent que leurs sujets ne se bigarrent point en religions, & semble mesmes que leurs interests les y portent. Car leur gloire & leur grandeur consiste en l'entiere obeissance de leurs sujets, en la tranquilité de leurs Estats, & en l'vnion des parties qui les composent. Or est-il trop ordinaire que la division des sentimens & des creances partage les affections, & n'y a point de si violente passion que celle qui s'allume dans la conscience. Quand donc la diuersité des sentimens passe en difference de factions, il est comme impossible que le Prince, tant par le mouuement de sa conscience, que par la profession qu'il fait exterieurement, ne se declare pour l'yn des partis contedans, & qu'ainsi il n'affoiblisse beaucoup, s'il ne perd mesme tout à fait le respect & l'obeissance qu'il deuroit attendre de l'autre. C'est pourquoy tous Potentats s'opposent au commencement à toutes innouations, & nos Rois entre les autres, ou de leur propre mouuement, ou

par la suggestion de leurs Conseils, ont employé tout ce qui se peut imaginer de rigueur, pour estouffer dans leur Estat la Reformation en sa naissance. Enfin pourcant l'experience des choses leur a donné d'autres inclinations. Car pource que les prisons, & les gibbets, & les feux, dont on s'estoit serui pour en arrester le cours pendant le regne de François premier & de Henry second, ne peurent empescher que nostre doctrine ne gaignast das toutes les parties du Royaume, tellemet que l'Estat estoit alors partagé quasi également, & que sous le regne de François second ny le mal heureux succés de l'entreprise d'Amboise, ny la prison du Prince de Condé, ny la continuation de la persecution contre les autres, n'empescherent pas qu'ils n'allassent merueilleusement multipliant, la Reyne Catherine de Medicis, & ceux qui gouvernoient l'Estat sous la minorité de Charles, creurent qu'il valoit mieux consentirà vne chose que l'on ne pouuoit empescher, & donner quelque liberté à la ferueur d'yn zele absolument inuincible, Ainsi fut fait l'Edict qu'on appella de Ianuier, par lequel ceux de la Religion eurét la liberté de leurs exercices dans les fauxpour ceux de la Relig. 317

bourgs de toutes les villes, & generalement par tout où ils estoient en quelque nobre considerable : de sorte qu'il s'en forma deux mille Eglises come en vn momet. En quoy la Reyne Catherine, & les Prin. ces & Ministres de l'Estat firent sans doute eeder le zele de religion à la prudence politique, comme il est souvent absolument necessaire en telles occasions: & c'est chose qui n'est nullement desagreable à Dieu, quand on y est obligé par la necessité des occurrences. Car la Religion ne pouuant subsister sinon par la subsistence des Empires politiques, lors que les choses en sont venues à tel point, que pour empescher le progrez de quelque innouation, on met toute la Republique en peril, il est & de la pieré & de la sagesse de ceux qui en ont le gouvernement en la main, de pouruoir à ce que l'vne ne s'estouffe pas enfin sous les ruines de l'autre. Et si on eust perseueré en cette bonne pensee, on eust espargné à l'Estat les espouuentables confusions des guerres ciuiles, qui l'ont mis à deux doigts de son tombeau. Mais l'ambition de quelques-vns, & l'effroy & l'impatiéce des autres, & la suggestion des conseils de Rome notamment, ayant incontinent troublé le

repos de la France par l'infraction de cét Edict, & par les choses qui vinret apres, on ne sçauroit dire quelles horreurs ont esté exercées de l'vn à l'autre parti par l'espace de plus de trente ans. Et nous nous fussions asseurément entr'exterminez, sinon qu'en fin Henry le Grand, de glorieuse & immortelle memoire, ayant reconquis son Royaume de la main de ses ennemis, termina ces calamitez par l'Edict de Nantes, & reunissant tous ses sujets sous son obeissance, sans violenter la conscience d'aucun, esteignit autant que la prudence le permettoit, la semence de ces desordres. Ce qui luy reüssit si bien, que neuf ou dix ans de paix apres ces longues & continuelles desolations, remirent le Royaume en vn estat si puissant & si fleurissant, que quand cét incomparable Prince nous fut si mal-heureusemet rauy, il estoit non considerable seulement, mais redoutable à toute l'Europe. Sous le regne du feu Roy il est arriué quelques choses, qui ont deux ou trois fois interrompu le cours de cette felicité. Mais neantmoins diverses considerations luy ont tousiours fait solennellement declarer, qu'il ne vouloit aucunement entamer la liberté que le Roy son pour ceux de la Relig.

pete avoit donnée à ses sujets en ce qui est de leur religion, ny rien changer en l'establissement qu'il auoit fait par son Ediet. Car premierement le Roy son pere l'ayat fait perpetuel & irreuocable, & luy-mesme à son aduenemet, & depuis à diuerses fois, l'ayant confirmé comme tel, ainsi qu'il estoit Prince genereux, il a creu que la souueraineté independante de sa Couronne, & la puissance illimitée de sa Majesté ne le dispensoit pas de l'obligation de sa parole, & de ses promesses, en l'observation desquelles Dieu mesme met vne notable partie de sa gloire & de sa grandeur. Car bien qu'il soit infiniment plus esleué au dessus des Rois, que les Rois ne le sont au dessus de leurs sujets, & que quand il manqueroit aux conuentions de ses alliances, ses creatures pourtat ne pourroient l'en tirer en iugement, si est-ce que plus il est grand, plus estime-t'il qu'il luy convient d'estre iuste, & par consequent exact à l'execution de ce qu'il a promis, quad vne fois il a engagé sa parole. Apres cela Henry le Grand ayant estimé qu'en l'observation de cette sienne ordonnance, consistoit le principal fondement de l'union de ses sujets, de la tranquillité & du repos de son

Estat, & de son restablissement en sa premiere splendeur, comme le Roy son fils estoit prudent, il a bien apperceu qu'il en estoit veritablement ainsi; & que le danger estoit euident, si l'on renuersoit ce fondement; de rejetter le Royaume dans les ancienes diuisions, & de l'exposer en proye à l'ambition estrangere. Enfin il auoit reconnu que le zele de religion, qui auoit porté ses predecesseurs, ou à n'accorder rien, ou à rompre les Edicts qu'ils auoient accordez aux Reformez, auoit apporté sans comparaison plus de dommage à la pieté en general, & mesmes en la religion qu'ils pro-fessoient, que d'afsoiblissement & de diminution à celle qu'ils vouloiet esteindre. Car outre que chacun sçait que les guerres ciuiles produisent la licence & le déboxdement en la vie, & la profaneté & l'irreuerence aux choses divines, & qu'en s'efforçant d'étouffer la religion d'autruy, on s'accoustume à mespriser la sienne propre: la Romaine n'estoit aucunemet pratiquée où les Reformez estoient les plus forts, & où ils ne l'estoient pas, si n'estoit-elle exercée finon auec trouble & incommodité, par tout où ils pouuoiet porter le tumulte de leurs armes. Comme donc ce Prince estoit

estoit singulierement deuotieux en sa creance, il a creu que pour le bien & l'auan-tage de l'Eglise Romaine, il falloit laisser cette liberté à la Resormée en son Royaume. Et nous voyons que depuis la Regence de la Reyne, le gouvernement de l'Estat roule toûjours dessus les mesmes maximes d'vn train égal: ce qui a maintenu les sujets du Roy en vne parfaite vnion; con-serué l'obe issance qu'ils doiuet à leur souuerain, & donné le moyen de continuer les grandes & glorieuses conquestes que le feu Roy attoit commencées. Quant à ce qui est des Magistrats inferieurs, il me semble qu'ils doiuent regler toute leur conduite en cet égard, par ces deux ou trois pensees. L'vne est, qu'ils doiuent presumer que si Dieu les auoit appellez pres de la personne des Rois, pour auoir part en leurs conseils, ils auroient les mesmes considerations que ceux qui ont les premiers conseillé ces Edicts, & qui maintenant encor les entretiennent. Ny les Potentats, ny leurs Ministres ne sont pas moins deuotieux qu'eux, & leur zele ne seroit pas moins vehement, si d'autres égards n'en temperoient l'ardeur & la violence. Puis donc qu'ils ont souffert que

ces raisons d'Estat y apportassent de la moderation, & que depuis que les choses ont esté ainsi establies par l'authorité des loix publiques, ils ont estimé que leur foy y estoit engagée, & qu'ils ne la pouuoient violer sans flestrir leur propre gloire, & ternir en quelque façon le lustre de leur grandeur, les autres doiuent volontiers reuestir les mesmes sentimens, & ne prendre point à des-honneur de se conformer aux grands exemples. La seconde est, que comme ils ont deux relations, l'yne de Catholiques Romains; ce qui regarde le seruice qu'ils pensent deuoir à Dicuselo leur profession; l'autre d'Officiers du Roy, ce qui concerne le seruice qu'il faut qu'ils luy rendent en l'administration de leurs charges: comme ces deux relations sont fort distinctes, aussi en doiuent-t'ils tres-soigneusement distinguer les fonctions & les operations. Car quant à la premiere,qu'ils ayent à la bonne heure toute la ferueur de zele qui se puisse imaginer, & qu'ils escoutent les exhortations de ceux qui les y enflamment. Peut-estre que l'Esprit de Dieu les illuminera quelque iour autrement, & quand ils seront autrement esclairez, ils porteront cette vehemence de leur pieté

sur d'autres meilleurs objets que ceux qu'é leur presente ordinairement, & dont ils tireront plus de consolation pour leurs consciences. Mais tant y a entant qu'ils sont Catholiques Romains, ils sont personnes particulieres, & par consequent cette deuotion ne doit pas aller plus auant, sinon d'ouir quant à leurs personnes les Messes bien diligemment, de vacquer aux Sermons assiduellement, d'assister aux Processions auec soin, de communier le plus frequemment qu'ils pourront, & de pouruoir à ce qu'en leurs maisons la mesme deuotió regne entre leurs domestiques. Mais quant à la seconde, ils ne doiuent dans les fonctions qui en dépendent, regarder à autre chose qu'à la volonté du Souuerain, comme elle est declarée en ses Edicts, afin de s'y conformer exactement en toutes occurrences. Car quand il ne seroit point à presuposer que s'ils auoient esté appellez au Ministere de l'Estat, ils se laisseroient conduire aux mesmes raisons qui ont induit ces grands Rois à les nous donner, ce n'est pas à leurs Officiers à iuger des motifs qui les y ont portez, ny à pretendre de corriger par les mouuemens de leur pieté, les fautes que la prudéce Politique auroir

X ij

fait commettre contre la Religion Romaine. S'il y en a quelqu'vne en cette conduite, c'est aux Rois à en respondre deuant Dieu Quant aux Magistrats inferieurs, lors qu'il faudra comparoistre en iugemet deuant nostre Seigneur, pour rendre raison de leurs actions en cette qualité, on ne leur demandera pas s'ils ont esté grands zelateurs de la Foy de Christ; car cela regarde la relation qu'ils ont en qualité de personnes particulieres: mais s'ils auront esté fideles dispésateurs de ce que le Prince leur a commis, pour rédre la iustice à tous ses sujets, seló les regles qu'il leur en auoit données. En quoy s'ils ont plustost suiuy la suggestion de quelques-vns, dont le zele est inconsideré, seditieux & turbulent, que la volonté du Souuerain, comme elle est expliquée en ses loix, asseurément ils n'en remporteront point de contentement de deuant le grand & vniuersel luge du mode. La troissesme finalement est, que les Officiers de Iudicature ne sont point installez en leurs charges qu'ils ne prestent serment solennel de juger selon les Ordonnances des Rois, & de suiure leurs volontez en l'administration de la instice en toutes choses. Or chacun sçait quelle est

l'obligation du serment, & comment elle doit estre absolument inuiolable. Certes celuy qui sous pretexte de pieté enuers Dieu en ce qui regarde la Religion, viole le serment qu'il a fait au Roy en ce qui est de son service & de la coduite de son Estat, cettuy-là ne sert ny Dieu ny le Roy, & commet vn crime digne de punition, tant de la part de son Souuerain en ce siecle icy, que de celle du Souuerain des Souue-rains en l'autre. Enfin, pour ce qui est des peuples, ils ont aussi deux qualitez; l'vne de Chrestiens, & l'autre de sujets du Prince. Quant à l'vne, ils sont obligez de viure conformément aux loix de Dieu, selon la connoissance qu'ils en ont; quant à l'autre, ils sont tenus de se comporter conformément aux loix de l'Estat, come elles y ont esté publiées. Puis doc que les loix de Dieu sont qu'ils destrampent tout leur zele en debonnaireté & en charité, & que les loix du Prince sont qu'ils repriment leurs passions par la consideration de la paix commune, & par le respect qu'ils doiuent à sa volonté, tant s'en faut que les paroles injurieuses, & les traittemens violents leur puissent estre permis, s'ils veulent auoir la Jouange de bos sujets & de bons François,

326

que mesmes ils ne sçauroient estre bons Chrestiens, s'ils ne bannissent de leurs cœurs toute auersion contre nous, & s'ils ne nous portent vne affection veritablement cordiale. Nous les en supplions donc tres-affectueusement, & les en conjurons par la bonté de Iesus-Christ, par les entrailles de sa charité, par la gloire de sa verité, par le precieux depost de sa paix,qu'il a laissé à ses Disciples autrefois, & par l'incomparable douceur dont il leur a donné le patron en sa conversation en la terre. Neantmoins si nous ne pouuons obtenir qu'ils se monstrent veritablement Chrestiens enuers nous par les effets de leur humanité, c'est à nous à nous efforcer de nous monstrer tels enuers eux par tous offices de charité, & par vne inuincible patience. Car nostre bon maistre nous a commandé que nous aimions nos ennemis, que nous benissions ceux qui nous maudissent, que nous fassions du bien à ceux qui nous haissent, & que nous prions pour ceux qui nous persecutent & nous courent sus. C'est ainsi qu'il dit que nous ferons voir que nous sommes enfans de nostre Pere qui est aux Cieux, & que nous representerons l'image de cette diuine

pour ceux de la Relig. 319 perfection de charité, dont il nous fournit l'exemple.

FIN.

APPROBATION.

Cette Apologie a esté veue & approunée par Messieurs de la Cantinaye & Vacher, Pasteurs des Eglises de Baugé & de l'Isle Bouchard, Commissaires ordonez pour les liures de Religion en vette Prouince.

TABLE.

Essein de l'Ouurage, pag:t. Sect. I. Que si on considere ceux de la Religion dans les deuoirs ausquels ils sont obligez enuers les autres entant qu'hommes, ils ne sont dignes de l'auer sion de qui que ce soit, pag. 11.

Sect. 11. Que si on considere ceux de la Religion dans les deuoirs ausquels ils sont obligez enuers le Roy & l'Estat, entant que François, ils ne sont point dignes de l'auersion de qui que ce soit, pag. 38.

Sect. III. Que si on considere ceux de la Religion en qualité de Chrestiens, ils ne meritent l'auersion de qui que ce soit. Et premie-

TABLE.

rement à l'esgard des creances qu'on leur impute contre verité, pag.82.

Sect. IV. Que si on confidere ceux de la Religion à l'esgard des choses qu'ils ne croyent pas, ils ne meritent point d'auersion. Et premierement touchant l'inuocation des Saints, l'adoration des Images, & le Purgatoire, pag. 136.

Sett. V. Que pour ne croire pas ny la Transsubstantiation, ny le sacrifice de la Messe, ceux de la Religion ne meritent point l'auersion de personne.

fion de personne, p. 165.

Sect. VI. Que ceux de la Religion ne sont point dignes d'auersion, ny pour ne deferer pas à l'authorité de l'Euesque de Rome comme il le veut, ny pour s'estre separez de la communion de l'Eglise Romaine, p. 198.

Sect. VII. Qu'en ce que ceux de la Religion croyent effectiuement, ils ne sont dignes de l'auersion de personne; au contraire, qu'ils doiuet estre tenus pour bos Chrestiens, p. 238.

Sect. VIII. Qu'en ce que ceux de la Religion font en leurs exercices de pieté, en consequence de leurs dogmes, il n'y arien qui merite qu'on ait aucune auer sion pour eux, p. 282. Conclusion, p. 313.

FIN.





